

حكاوي سودانية

لبني عصام

(الجزء الثاني)



حكاوي سودانية

(الجزء الثاني)

لبنى عصام

2016م

الطبعة الأولى، 2016م

© حقوق الطبع محفوظة للمؤلفة

ISBN-13: 978-1530728770

ISBN-10: 1530728770

Printed by CreateSpace, an Amazon.com
Company

Available from Amazon.com,
CreateSpace.com, and other retail outlets

تقديم

هي مقدمتي في الجزء الأول من الحكاوي أعيد كتابتها هنا..

لا أحب المقدمات في القصص؛ رغم هذا وجدتني مضطرة لكتابة مقدمة لا بد منها؛ أرجو من القارئ إن كان مثلي أن يتجاوز هذه المقدمة تماماً ويعتبر أنها لم تكن وينتقل للحكاية الأولى. بعد تفكير بين السطر السابق والحالي أرجو من القارئ أن يقرأ المقدمة؛ هي كلها بضع أسطرٍ أخرى.

مجموعة الحكايات هذه صور من واقع مرير؛ مؤلم؛ قاسي؛ موجه يتنفسه كثيرون في مجموعة من البيوت بصورة أو بأخرى؛ كتبها من خلال مدونة حكايات سودانية وإرثايت أن أجمعها كما هي بلا تنسيق أو محاولة جعلها كتابا ورقيا جيدا أو تتميط ودونما حتى محاولة تنقيح..

العديد منها هو مساحة ومنتفس لتكملة الحكاية وسط الردود للمتابعين؛ إعتبروها "نسة" نقلتها لكم كما هي دون تنقيح بلهجتنا السودانية العربية القحة التي بها كتبنا وبها أحب أن أكتب..

لا مزيد لدي هنا؛ فقط اقلبو الصفحة وأبدؤوا أولى الحكايات..
هكذا كتبت في الطبعة الأولى؛ وهكذا أكتبها مره أخرى فهي دعوة لتقرأوا
بعضاً من وجعٍ يُدعى إنسانية الإنسان في وطني..

لبنى عصام

إهداء

كل الكتب تحوي إهداءً بصورة أو بأخرى..
أيمكنني أن أهدي بعضاً من وجعٍ لشعبٍ مَجوع؟
أن أخبره أنني إختَطَطْتُ بعضاً منه هنا؟
إذن هو إهداء وإلّم يقرؤه من يعينهم ..
لهم هم ..
إحلموا ف(باب الحلم فاتح مامسدود)..

الحكاية الأولى

داون وأشياء أخرى

"١"

(سليمة) زولة عندها متلازمة داون..

أمها لَمَن ولدتها وجابوها ليها مسكتها حضنتها وأدتها للممرضة قالت ليها:
"دي ما بتي" ..

أهمم شي الحزن ده..

موضوع "ما بتي" ده إتواصل لحد ما (سليمة) بقت زولة عمر إتناشر..
عشان يلقو ليها مدرسة قصة..

ف(سليمة) ما إتعلت لأنها لَمَن مشت المدرسة الحكومية العادية البنات إتريقو
عليها..

(سليمة) زولة خدومة شديد.. أي زول يرسلها تترسل ليهو.. أي زول يكورك
تجيهو جارية..

ود جيرانهم اسمو (جاد الكريم) كل مايشوفها قلبو يتقطع عليها..

(جاد الكريم) ده شغال عسكري..

بس مانوع العساكر البهرشو وللا يخمخمو الناس ولا يشيلو حق الغلابة..
 مما اشتغل عسكري ومشى معسكر التدريب ووزعوهو؛ صاحب ليك الناس
 ديل كلهم؛ فقال لضابط القسم: "ياخ أنا ما عايز أمرق الشارع أقبض لي زول
 .. ولا عايز أدق لي زول جوه الحراسة" ..

طبعا الضابط فقّع ليهو ضحكة كدة وقال ليهو: "فردة! إنت قايل روحك وين
 لمن تتشترط كمان!!!" ..

بس فعلاً؛ (جاد الكريم) بقى عسكري .. يكون قاعد في القسم بس بدخل
 الناس للضابط و بدخل الناس الحراسة بعد ما يعتذر كدة.. وقدر ما يقدر
 بجيب أكل ليهم.. حتى لو الزول مقبوض في قضية قتل..

أها ناس القسم شاميتو بس كمان ما بغلط مع زول ع العكس يشيل ويجيب
 ليهم إن شاء الله تسالي وللا فولية وللا ملاح مفروكة..

صحي اسم على مسمى (جاد الكريم) زولاً جواد كدة من قلبو من جوة.. أهم
 شي ما جواد عشان عايز شي من زول..

اها (جاد الكريم) ده في الحلة زاتها مشهور بإنو زول حارة.. صيوان العرس
 وللا البكاء بدقو أول زول ويرفعو أول زول.. بجيب الخدار و أي شي دايرنو
 ناس المناسبة بي بوكسي كدة هكرة حق أبوهو كان..

أبوهو زول عندو مزرعة كان زي مابسميها هو؛ وعندو بقرتين وغنماية زي مابقول (جاد الكريم).. كان بوزع اللبن بالبوكسي ده..

(جاد الكريم) محل يقبل يلقي (سليمة) دي جارية حفيانة تحيب ليها شي لزول.. حساها ملطشة كدة لأي زول.. يعني بعد تترسل زول بقول ليها شكراً وللا خير ماف.. الناس تضحك وتتغامز "دي المنغولية ياخ .. أي رسلوها ما زي البهيمة ما فاهمة شي .."

"٢"

(جاد الكريم) شايف إنو (سليمة) محظوظة عندها أم عايشة وهو زول أمه إتوفت وهي بتولد فيهو..

وكم ان شايف إنو حظها سجمان الخلاها الطفل التامن لأم مشغولة وسابئة للبت المنغولية البدلوا ليها في المستشفى زي ما قالت ..

الحلة كلها إقتعت بكلام أم (سليمة).. عاد كمان يغالطو المرة في ولادتها؟؟..

وأخوانها وأخواتها بتعاملو معاها زي الأم: إنو مقعدنّها حسنة فيها..

(سليمة) لمن كان عمرها أربعة سنين كان لسة ما إتكلمت ويكدة أكّدت حتة إنها منغولية دي..

غايَـتو البت دي غير سَمَح يَأْمِي ما عندها شي بتقولو تاني هُنْ كانت أمها
المرسلاها هُنْ كانوا ناس الحلة..

في يوم كدة (سحر) أخت (سليمة) القبها طوالي بتكورك: "يازفتة ياسجم"..
اها (سليمة) ماركَزت إنها الزفتة السجم..

جات (سحر) لِبَعَتِها لِيك في ضهرها لَبْ: "هوووي ياسجم مش بنادي فيك؟"..
(سليمة) عاينت ليها قالت: "اي"..

قالت ليها: "لَوَايَة تَقَطَّعِكُ حِنْتُ يامنغولية؛ شنو هو ال اي؟؟ وَكَيْتُ عارفة
مالك مارديتي؟؟"..

طبعاً الجملة دي كلها (سليمة) طلعت بانو (سحر) زعلانة منها بس مافهمت
ليه قامت قالت ليها : "ااي"..

(سحر) لِبَعَتِها لِيك تاني في ضهرها لِبْ وجرَّتْها من شعرها: "إنتي مالك عايزة
تَقَوَّرِي دَمِّي من الصباح؟؟ غبية خلاص.. مابتفهمني إنتي؟؟"..

اها المشهد الصباحي ده كان في سور الحصير قدام البيت العامليو لشجر
كدة ده لا قايم لا ميت؛ قال (سليمة) بتتَضَفُّ في الصَفْقُ برة.. الكلام ده
الدُّعْش قبل ما (سحر) تمشي مدرستها.. ممتحنة ثانوي وبت سَمِيحَة كدي
وعارفة إنها سَمِيحَة..

(جاد الكريم) كان طالع الشغل سمع ليك اللبع لبّ لبّ ده قام وصل سور الحصير وقال: "السلام عليكم" ..

(سحر) عاجبها جاد الكريم بس موضوع كمان تعالين لعسكري وهي زولة ممتحنة علمي وشاطرة وآمال وطموحات وكدة مااعندها.. قامت إتكببت لمن سمعت صوتو.. وعندها خصلة مطّعاها بالجنبه كدي قامت رجّعتها ورا أضانها والطرحه الرابطاها في نصها قعدت تقتش فيها في راسها..

"||| جاد أهلا.. إزيك؟ مالك صاحي بدري؟" ..

قال ليها: "أهلا بيك مرحب.. والله تقولي شنو؛ شقاوة الحال وأكل العيش.. اها بتدوري شي أجيبو ليكم قبل ماأمشي؟" ..

اها "بتدوري" حقتو دي كانت زي الكف الصحتها كدة.. "بتدوري"؟؟!! دورت الكلمة كدة في واسها وقالت لروحها : "أوووف بلدي بجد الله يطلعني من الحنة دي بس .. وبصوت عالي قالت ليهو: "لالا سلامتك.. برسّل (سليمة)" ..

قال ليها: "يابت الأكارم أختك شغالة من الدغش.. لو دايرة شي بقدر أجيبو الحقاك ليهو أخير والله بكون" ..

قالت ليهو: "أي شغالة خليها.. هي فاهمة شي؟ زاتو تعب ما بتتعب، زي الحصان بالله عندي نزلة وهي ولا يوم عطست" ..

(جاد الكريم) قلبو من جوة وجعو "حصان؟ ما بتتعب؟" ..

لكن عاد يقول شنو؟! .. قال ليها: "خير؛ السلام عليكم" .. ومشى بعد عاين

ل(سليمة) الدنقرت راسها وقامت نَقْشُ تاني في صَفَقُ الشجر ..

"٣"

(سحر) طبعاً نِسَتْ هي عايزة (سليمة) لشنو .. بقت تعالين ل(جاد الكريم) من

فوق الحصير - الأساساً ماعالي بطول شافع عمرو خمسة سنة - لامين

ركب بوكسيهو ومشى ..

(سليمة) لسة بتنقش كانت؛ أها وصلت حتا كُرعين (سحر) وبقت نقش

جنبيها ..

(سحر) يادوب صحت من الغيبوبة الكانت فيها .. نهرتها ليك: "يازفتة!!

وسخّيتيني إلهي تتوسخي بكمونية .. كلبة .. حيوانة" ..

وقامت طلعت بعد ما طلّعت ليها منديل تشو كدي ده ومسحت كَرِيَعَاتِها

ومشت مدرستها ..

وراها طوالي - بعد (سليمة) لَمَّتْ الصفق ودخلت جوة عايزة تكنس الحوش -

جا طالع (سامح) ده أخوها الكبير .. أكبر واحد .. معرّس وقااعد في البيت

معاهم.. فاصِل ليهو أوضة وبرنّدة في الحوش، بس ماعامل باب، كان كل يوم يقول بمشي يجيبو .. لامن مرتو (مدينة) عملت ليها ملاية ودقّتها من الطرف بمسامير..

اها لمن جا قام سلّم على (سليمة): "صباح الخير يا (سليمة)"..
 عاينت ليهو (سليمة) قلبها قلب طفلة.. للأسف رغم إنو قلب طفلة بس عندها مشكلة فيهو بنجيهها بعدين.. لكن بتريد أخوها ده شديد مع إنها ماعارفة يعني شنو ريدة بس وشها ده بيشرق كدة ويبقى مبتسم براهو لمن تشوفو..
 قالت ليهو: "شكراً".. قعد يضحك قال ليها: "عفواً"..

ماقال ليها شكراً ع شنو زي ماكانت ح تلبعها (سحر) بعد تقولها..
 قال ليها: "عايني أمشي جيبي ببيسي أشريهوه براك".. و أداها ثلاثة جنيه..
 (سليمة) شالتهم فرحانة.. قال ليها: "ببيسي.. كويس؟؟"
 هزت راسها إنو كويس وجرت قدّامو حفيانة الدكان..
 حفيانة ليه؟ لأنو ماف زول عندو إستعداد يجيب ليها شبشب قَطع مع أصبعها المشاتر وواقف براهو بالجنية ده ..

طيب الما قلناهو إتو (سليمة) دي إتولدت في نفس اليوم مع (أرد)..

(أريد) ده ولد حاجة (فاطمة) أم (سليمة).. بس (سليمة) بت (جميلة) قالت
 ماعايزاها وقامت أدت الممرضة والداية قروش عشان بيدلوا بتها دي بأبي
 شافع تاني إتولد..

وقد كان..

يعني حاجة (فاطمة) ماكانت غلطانة لمن قالت دي ما بتي..

(أريد) إترى عاد في بيت عز..

(جميلة) راجلها سفير سابق في أفغانستان وزول "جك" عديل مش "كوز"

وبس..

المهم البيت حدادي مدادي.. (جميلة) وسعادة السفير (سعيد) أولاد عم
 وعندهم حالات داون في أسرتهم فمتوقعين كان يولدو طفل عندو مشكلة..

لمن (سعيد) شاف (أريد) إستغرب.. بس (جميلة) ماكلمتو إنها عملت شنو..

بالنسبة ليها ده سر ح تموت بيهو ..

الممرضة (سعدية) البدلت (أريد) و (سليمة) هي الإقترحت اسم (سليمة) على
 حاجة (فاطمة) قالت ليها: "إقدام وشها بثصلح والبت مامنغولية البت دي

(سليمة) و زي الفل بس لأنو جريناها بي جفط راسها إنكعوج" ..

حاجة (فاطمة) قلبها أبا البت دي رضاعة مارضعتها.. بتجيب لبن البقر وتكُبو كان ليها.. لمن جارتهم (نفيسة) قالت ليها: "ياختي أنا برضّعا ليك لأنو البت صغيرة اللين ده بجيب ليها إسهال" ..

اها ما سألتوني كيف (جميلة) مرة السفير تولد في مستشفى الشرطة مع حاجة (فاطمة) ..

الحصل إنو (جميلة) لمن جاها الوجع وكسرت الهادية وخلااس كان ح تخش في غيبوبة راجلها كان موديتها الأطباء .. قومي ياالحتة كوني زحمة .. لف بالشارع الجايي من عبيد ختم ولقى مستشفى الشرطة في وشو.. مادخل ساهرون؛ دخل الشرطة.. بس قدر مع كواريك مرتو ومنظرها مافكر كثير ..

"٤"

(سليمة) يوم بقت زي البنات وبلَّغتْ جات جارية لأمها.. "أمي أمي أنا
إثعوقتْ" ..

أمها غايتو قَدْرُ ماشرحت وقالت (سليمة) دي بس البكاء هزأها مافهمت شي
غير إنها ح تتجرح وتثعوق طول عمرها حتى لو عملت حسابها..
(جاد الكريم) لمن بقي عمرها ثلاثاشر سنة جاء لأمها قال ليها: "ياخالتي أنا
ماقاري كثير بس قريت الأيام الفانتت عن طريقة ممكن أعلم بيها (سليمة) دي
لو سمحتي لي.. أهو منها تعرف الدنيا وشوية وشوية تقدر تشيل روحها"..
عاد أمها كل الشالت همو المراسيل والنضافة البسويها منو مادام البنات
مُتَكَلَّات على أختهم.. غايتو بعد ثلثة رَضتْ إنو يجي كل يوم بعد صلاة
العصر بكونو نامو الأولاد والخدمة متوقفة مؤقتا ويقعد معاها يقريها وللا يقول
ليها شنو ماتعرف وختمت كلامها بـ: "البت مافيها عَمَار ماتتعب نفسك ساكت
وكت عارفة اسمها وبنحش الحمام ما قصرت" ..

(جاد الكريم) بسبب (سليمة) دي قرر يقرا ويمتحن شهادة من أول ودخل دبلوم تربية ومثو بقى يساهر كل يوم ويمشي يسأل الدكاترة البدرسو عنها وعن مرضها.. اسمو ماكان بعرفو ياهو الاسم بتاع المنغوليين البقولو أي زول.. عرف إئو كل ماتتأخر في التعليم الخاص بيها كل ما مخها ما ح يتطور و ح تفضل زي ماهي.. وعرف إنو حدود مخها ماكبيرة وإنها عُرْضَة لأمراض تانية..

غايتو الزول ده إجتهد مع موضوع (سليمة) ده..

عشان تعرفو الدنيا دي ضيقة..

(أريد) عندو عربية بي إم دبليو..

اها اليوم داك سايق ماشي قال لصاحبو في (العرضة).. خَشَّ ليهو في ركشة الركشة راكبة فيها (نادية) بت الممرضة (سعدية) القلناها قبيل..

اها كسرت رجلها في الحادث ده و (أريد) دخلوهو الحراسة لأنو سيد الركشة قال لبوليس الحركة أصلو ماتخليهو.. وبوليس الحركة عاد كان زولاً حَقَّاني وكُرْهتو في الدنيا ال بي إم دبليو..

(أريد) ضرب لأمو و(نادية) بهنا في مستشفى أم درمان جاتها أمها جارية..

عادُ سمحَ القْرِشُ (أريد) مرق بكفالة وأمه قالت ليهو نمشي للبت في المستشفى عشان مايرفعو قضية وكدة نَحُتْ ليها قرشين ويتسكت..

اها إِنْخَمَمُو مشو المستشفى وإتلاقت (جميلة) مع الممرضة..
 أول ما الممرضة شافتها عرفتها عاد السنين المرّت في العز ما زي سنين
 الشقا.. قالت ليها: "يا (جميلة).."..
 (جميلة) نطّطت عيونها وختّت موضوع البت الجو عشانها قالت ليها:
 "بتعرفيني؟؟"..
 قالت ليها: "بالحيل من زمن مستشفى الشرطة وولادة البت" .. طوالي (جميلة)
 جرّتها لبرّه قالت ليها: "تعالى طيب نتفاهم"..
 اها نَقَّكَ نَقَّكَ وإِبْتَرَاكَ إِبْتَرَاكَ مع إنها مابتعرف الابترز سَمِحْ كان تسألني..
 المهم في النهاية عملو تسوية و(جميلة) قالت ليها: "كل ماتكوني محتاجة
 حاجة بيتي فاتح"..
 طلعت من المستشفى وهي بتفكر إنو السر الدَسْتُو وقايلة ماف زول ح
 يعرفو؛ شكلو ح يهدد حياتها لقدام..

"٥"

(سليمة) بقت عمر تمتاشر.. و(جاد الكريم) عدييل مَكْسَراهُو وبحبها..
 شرح ليها وفهّمها إنو في رب خلق الناس مختلفين وهي بالذات إختلافها
 معناتو تميزها مامعناتو منغولية زي ما بنادوها.. شرح ليها إنو رينا بحبها
 عشان أمها وأبوها قاعدين وبحبوها.. قال ليها: "حتى أخوانك ديل بحبوك
 وبرسّلوك عشان معتمدين عليك"..

شرح ليها كيف تصلي وكيف تصوم .. وشرح ليها أي مرسال تترسّلو تئوي
 إنو عملاً ل الله ما لزول..

حكى ليها قصص الصحابة.. حكى ليها عن سيدنا محمد وإنو ماكان بفرّق
 بين الناس..

وحكى ليها عن مرضها وإنو عادي ممكن ما يكون مشكلة..
 في الأول ماكانت فاهماهو لكن كانت بتسمعو وهي مبسوطه إنو في زول
 مهتم بيها وجاب ليها سفنجة وشبشب قَطِعْ.. زول علّمها كيف تصفّر شعرها
 وكيف تقرا القرآن..

الكلام ده أخذ خمسة سنين منو..

لا كَلَّ لا مَلَّ (جاد الكريم) بس عاد ناس الحلة ما ريّحوهو..

"هسه بدل تضيع زمنك مع المتخلفة دي ماتشوف ليك عماراً في حنة تاني" ..

"هسه بدل تقرا تربية ماكان في كلية الشرطة دي تبقى زول" ..

في الخمسة سنين دي أبوهو مات و(سليمة) عَزَّتْ زي التقول أبوها .. (سليمة)

حسَّتْ إنو الزول ده جَوَّاهَا كبير بس ماعارفة تسميهو شنو .. كلامها إتصلَحْ

وَبَقَّتْ تلبس طرحة طوالي وظيفرتها مارقة منها؛ مما كَلَّمَهَا إنو تلف شعرها ..

المشكلة ناس الحلة بقو يقولو من وراهو داير منها شنو؛ لآمِنِ يوم جاهو

(حسام) ..

(حسام) ده زول ما خلاَ ليهو بت حايمة ما حام معاها أو حاول يحوم

معاها ..

حتى (سحر) حاول يقنعهَا إنو هي والقمر أخوان ..

جاهو قال ليهو: "فردة عايزك ياخ في كلمتين كدة أخير تسمعهم مني .. بدل

يقولهم الغاشي والماشي من وراك .. ياخ وكتِ البت دي داخلة ليك مزاجك

أصلاً هي مافاهمة شي أنا عندي صاحبي عندو شقق بأجرها .. ياخ بحنَّكو

ليك ومابتدفع ولاشي وشوف شغلنك ياخ" ..

(جَاد الكريم) ده وشو قَلْبَ أَخدر وأسود .. ماينقدر نقول قلب أحمر لأنو

أخدراني ..

قال ليهو: "مأنا البَحْشُ بيت ويسرق منو ولا أنا البخون الأمانة.. البت دي أمانة في رقبتى.. كَوْنِي بَدْرَسْها ده مامعناتو كلامك الفاضي ده.. أمشي للبقولو وراي كلام وتمّ القول عندهم قول ليهم (جاد الكريم) مازول فارغة ولاهو الزول البِمْسِكِ بِنِيَّةٍ ويستغلها.. وقول ليهم البِنِيَّةِ دي أعقل منكم جتْ عليكم.. أنا يا(حسام) ح أفترض إنني ماسمعت شي منك.. لأنو ماف زول واجهني والقُوالة الجِبْتها دي ما كلام رجال خليها للنسوان"..

(حسام) مَرَق منو وقال: "وحات الله إلاً أوريهو؛ هُنْ ما خَلَيْتو يمشي يكَلِّم الحَيْط ماأبقى أنا ود (سكينة)".

اها بهناك (سعدية) جاتها بنتها (سوسن) الضربها (أريد) ديك.. جات داخله الأوضة لِقْتها بتعدّ في قروش خمسة رزم..

"ياأمي جبتي القروش دي من وين؟"..

قالت ليها: "يفرّش حلقومك كدي بس التجيبي طاريها لأبوك والله البسويها فيك ماتعرفيها"..

قالت ليها: "ياأمي أنا بسأل ساكت؛ لأنك الشهر الفات كنتي شايلة زيهم وقتي حافز من المستشفى"..

قالت ليها: "يحرّوك لدقّ العيش ياغبيانة.. دي المرة الولدها ضربك ديك"..

اليوم داك منتظرها وشاكي وقاطع نُصْ جنب باب القاعة.. مرقت كدة لقتو ليك في وشها..

"أووو سحور قلبي" ..

قالت ليهو: " (حسام) في شنو الليلة جايي بدري هنا؟" ..

قال ليها: "ده إستقبال ليك مع الناس؟" ..

(سحر) ماقلت لـ(حسام) سَمِحْ بحبك مثلاً ولا وَعَدْتَوِ .. مبسوفة هي إنو في زول من الحلة كان بجبها وما داسيها .. بس كمان عارفة إنو (حسام) حالتو ما بخليها بتاع بنات زي مابتقول ومافِ مَنُو أمل .. بالعربي بتقضي زمن إنو تسمع كلام حب بدون مايهز منها شعرة ..

الود المكسرها اسمو (أريد) .. عربيتو وأسلوب كلامو والعنقليزي الحاشرو في أي شي .. وقالت ح تجيب راسو ح تجيبو ..

المهم لمن شافت (حسام) بقت تفكرْ تَقَطَّعُو معاهاو كيف إنو ياخ: ما بريدك وحلّ عن سماي؟ ..

مشو قعدو في كافيتيريا ومع كبايتين عصير واصل هو حنك ..

قالت ليهو: "عاين يا(حسام) أنا همي قرابتي وأصلا ما وعدتك بشي .. فشنو؟ خلينا أصحاب وفرد .. إنت زي أخوي" ..

(حسام) بلع أخوي دي بججمة عصير.. وقال ليها: "لالا ياسحور ماتقولي كدة.. أنا عارفك مابتحبييني بس كمان أخوك دي قوية.. عاينيني هسه عايزك لموضوع مهم كدة" ..

قالت ليهو: "أنا مما شفتك عرفت في شي؛ اها قول" ..

قال ليها: "والله ماعارف أبدأ كيف.. بس إنتي زولة بتهميني والبحصل ليك بهمني" ..

قالت ليهو: "وقعت قلبي في شنو؟" ..

قال ليها: "ياخ (جاد الكريم) ده بصراحة كدة قال لي عايز شقة أشوفها ليهو" ..

قالت ليهو: "طيب ماتشوف!! شايفني أنا وكيل عقارات؟" ..

بلع المساخة دي بججمة تانية وقال ليها: "هو عايز الشقة عشان يسوق (سليمة) قال" ..

(سحر) نطّط عيونها: "يسوقها يعني شنو؟" ..

قال ليها: "قال منغولية ساي .. معلش إني بنقل ليك كلامو.. بس قال مافاهمة شي وعايز يظبط أمور ح يسوقها كدة ده عديل.. أصلاً ما ح تكلم زول هي" ..

المهم أفتتأك أفتتأك ملاً ليها راسها زييين تية وقامت متو على البيت عديل عايزة تكلم أمها ..

اها بهناك (حليمة) دي عندها ود أهلها كدة قالت ليهو عايزاك تجيب لي خبر سواق في السوق الشعبي كان زمان شغال اسمو (حسب الرسول)..

ود أهلها ده مادام بياخد قروش على الخدمة بقلب الواطة لامن يصل للخير..

بس المرّة دي لأنو هو زاتو شغال في السوق الشعبي عنده طبلية طوالي قال ليهها: "عرفتو ياخ عمك حسبو ده زول الله ساكت.. عايزة بيهو شنو؟" ..

قالت ليهو: "هو حي؟ لسة شغال هناك يعني؟ بتعرفو؟" ..

قال ليهها: "كيف مابعرفو ياخ بتبالغي والله" ..

قالت ليهو: "تمام.. عارفو ساكن وين؟" ..

قال ليهها: "آاي ياخ.. مرة كان عامل عملية بواسير مشينا ليهو في بيتو" ..

المهم وَصَّفْكَ وَصَّفْكَ .. و(حليمة) ذاكرتها غريبة عديل كانت حافظة كتبو شنو في شهادة ميلاد (سليمة) من قبل تمنناشر سنة.. وإثوتست كان مع عمك حسبو ده يوم الولادة..

ما تسألوني متذكرا هو مالها.. بس هي قالت ل(سعدية) زمان إنو بشبه المرحوم راجلها التقول أخوه.. يمكن عشان كدة ركزت..

المهم (حليمة) شالت الكلام زي ما هو وبضباننتو وصلتو ل(سعدية)..

"٧"

(سعدية) سمعت من هنا كلام الزولة دي وقعدت تفكر اهاااا ياربي تعمل
شوو..

حسبتها حساب منطوق..

الأدبخانة عايزة تقليها بير والناس دي تستمتع بالحمام الجديد.. وعايزة
غويشات تلبسهن في يدها.. وتدق سلسل ذهب لبتها باسمها..
المهم حلمت كويس مع القروش ال ح تجي..

قامت ركبت كرعيها والمواصلات ومشت ل(جميلة).. ما هي بتعرف البيت
ومشت كم مرة لمن (جميلة) تتأخر وماترسل السواق.. لأنها بين كسرة رجل
بتها وبين مشيتها دي طلبت زي خمستاشر مرة كدة قروش.. ده لو مبالغنا
وقلنا كان بتطلبم يوم بعد يوم..

دقت الباب؛ فتحت ليها الشغالة الفليينية.. ودخلتها الجنية برة.. قامت قعدت
في المرجيحة.. عاد قايلها كرسي وللا شنو ماعرفتو.. المهم عجبنتها ليك
فكرة إتو بدل حديقة القرشي تشوف الشفع بتلأحو - في الشي دي وهي
مكسورة وللا مترومة ماعارفة - تتلأخ هي..

وهي لسة بتدوّز في راسها تقول شنو جات (جميلة) لابسة ليها توب أبيض بزهور سودا تنفع نقشة حنة..

(جميلة) مخلوعة كانت لأنها مامواعيد الإبتزاز - مع إنو ماعندو مواعيد هو - ..

"في شنو" قالت ليها..

(سعدية) لسة بتلّولخ في روحها وكرعينها تكشّ في النجيلة قالت ليها: "لقبت بتك" ..

(جميلة) قالت ليها: "ماعندي بت.. الموضوع ده إنتهي.. ومنو القال ليك عايزاك تلقىها زاتو؟" ..

قالت ليها: "عايني بتك لقيتها لأنو ح تلقى رعاية عندك أكثر بحالتها الإنتي عارفاها .. حرام ترميها.. ياخ شلتها تسعة وكربتها نرعة.. قلبك ده ما حدّتك إنها كويسة وللا لا؟ مينة ولا حية؟ ما فراك تشوفها؟" ..

قالت ليها بحزم كده: "لا" ..

(سعدية) إنجمت ده ما الكان منتظراهو..

قالت ليها: "خلاص مامشكلة أنا أصلا كلمت أم (أريد) فشوفي شغلتك معاها" ..

(جميلة) قَرَّبْتُ لـ(سعدية) وجرَّتها من توبها لامن نزلتها من الطوطحانية قالت ليها: "قلتي شنو؟ أنا أم (أريد).. كلام زي ده ماعايزة أسمعو وأطلعني من هنا قبل ما أبلغ فيك"..

(سعدية) جرَّت توبها من يد (جميلة) و عدَّلتو كدة وقعدت تضحك قالت ليها: "بوليس شنو يا أم بوليس؟ عشان ح تقولي شنو؟ إتهجمت عليك؟ الشغالة هي الدخلتني.. ويقول جينك عشان عندك تبرع للمستشفى .. كترتيهو قللتيهو بكلم أبو (أريد).. هَي قصدي (سعيد) وطبعا عارفة إنو في دي ان ايه DNA وللا ماسمعتي بيهو؟ وفي محكمة.. بقول هددتيني إنك ح تسجنيني وإنتي زولة واصلة وأنا عيالي كانو صغار ح ينيتمو بلاي ما بتربو .. اها النشوف البوليس ح تناديه لشنو ياختي"..

(جميلة) وقفنها وهي طالعة كوركت ليها: "إنتي عايزة شنو بالضبط؟ حقا أخذتيهو وإذا أنا مجرمة زي ماعايزة تقولي إنتي كمان مجرمة إنتي البدلتي ماأنا.. ولو لي اللؤلؤة بعرف أتلولو عادي.. إنتي بدلتني البت وأنا عرفت هسه بعد كبرت وجيتيني تعترفي.. ولأني تعبت في تربية ولدي أكيد ما ح أصدقك ولمن جيتيني طردتك"..

(سعدية) ولااا عاينت ليها.. مرقت فانت..

(جميلة) قعدت في أقرب كرسي.. عاد جِينِنْتُهُمْ جِينِنْتُكُمْ إن شاء الله بكراسيها ومراجيحها..

و بقت تَدَوِّرُ في راسها الكلام.. إنو دي شوشرة ح تكون والانتخابات قريت وراجلها قالو ح يرجعوهو يبقي سفير في النمسا.. بريستيجها وسط النسوان و(أريد) الربتو ده..

غايته صَنَفَعَت دَنَقَرْتِ وقامت دخلت جوة لراجلها..

قاعد في الصالون ماجايب خبر.. بحضر ليهو في فيلم قال في شووتاييم.. قفلت التلفزيون قالت ليهو: "يا(سعيد) عايزاك في كلمتين كدة"..

(سعيد) ده زول هاالدي كدة ما زول نقة وكلام كثير.. فما قال ليها: "قفلتي التلفزيون لشنو"..

قال ليها: "امممم!!"..

قالت ليهو: "تتذكر ولادة (أريد)؟"..

قال ليها: "امممم؟؟؟؟!!"..

قالت ليهو: "إتخيل جات واحدة هسه ودخلتها البت مشيت ليها قالت هي ممرضة.. مابعرفها زاتو جابت وصف البيت من وين.. قالت إنها بدلت الولد وأنا أصلا والدة بت.. وقالت لَقَتُ البت هسه.. وقالت ضميرها أنبها.."

(سعيد) قال ليها: "دليل ناس لُبطُ!! تكون عايزة ليها قرشين.. ماأديتها؟"..

قالت ليهو: "أنا برضو قلت كدة.. هي جات قبل كم يوم وأديتها.. بس الليلة جات قالت ح تمشي تشتكيني إتي هددتها تبدل العيال.. والإنتخابات يا (سعيد) إهئ إهئ" ..

و حنّت توبها وعملت فيها بتبكي..

(سعيد) عاد كل شي ولا دموع (جميلة) دي.. فتحرك الجبل وقام ليها يهدي فيها "يا جميلتي إنتي البلد دي كل الناس دايرة تاكل بس.. خليك منها ده كلام ساي ولا بتقدر تعمل شي.. عرفتي اسمها طيب وللا شغالة وبين هسه؟" ..
واصلت (جميلة) النّهة..

"طيب عرفتي البت القالت بدلتها دي وبين؟" ..

هزّت راسها لا..

قال ليها: "طيب عليك الله ماتبكي والله بشوف الموضوع مادام زعلانة قدر ده.. لو عايزة ليها قروش بدّيا ونعتبرها صدقة ياخ .. وفداء لولادتك بالسلامة.. بتذكر أنا يوم ولادة (أريد) ده.. متين ياخ بدّلو هو؟ أنا كنت واقف برة وأول ماسمعت الكواريك بتاعتو كان جوني طالعين مبروك مبروك.. مع إنو أنا في رايي تنسيها ياخ يعني ح تعمل شنو؟ كترتو قلّلتو السجن اهو داك .."

اها من وسط إهئ إهئ قالت ليهو بصوت مكتوم: "لالا ماتسجنها.. حرام وعيالها ح يعملو شنو" ..

قال ليها: "و الله إنتي (جميلة) خلقة وأخلاق.. هسه همّاك ما نَسْجِنها وهي
بتهدّدك قلتي؟ ياجميلتي عليك الله ماتبكي"..
خلّونا منهم ديل ح يواصلو كتير كدة وعملو لي شلل رعاش في القولون..

"٨"

(سعدية) طلعت بنتنْفِقْ: "مش هي ماعايزة بتها تعرف؟ اها الليلة النورّيا إني
لا كضابة لا بريد اللؤلؤة.. تتلؤلؤ عليّ أنا؟؟؟ كلها كم مليون تشيلها من جيب
راجلها وتديني ليها!! مسخرة فارغة منها !! .. هسه كان تمّيت بيّري.. أنا
زاتي مادايرة لي شيئا كبير" ..

المهم؛ ركبت كرعينها وبعدهم المواصلات.. توشكّ لِحْد بيت ناس (سليمة)
الوصّفنو ليها (حليمة) الوصفو ليها ود عمها..
اها نزلت كدة و ماشّة مكّحة النقول كانت بنْفُش في الحوش..
اها عاينت كدي.. إيّاهو الباب اللبني ومطرَقَع كدة ده الوصفوهو ليها زانناتو
.. اها بالزعل زاتو ما فكرت..
كُو كُو دقت ليك الباب..

جات جارية (سليمة) بطرحتها البيضاء اللآقاها تفتح الباب..
"منو؟" ..

قالت ليها: "عايزة أمك حاجة (فاطنة).." ..

فتحت ليها.. "إتفضلي ياخالتي .. إتفضلي بناديها ليك هسه" ..

و جرت (سليمة) وخالّت (سعدية) واقفة مبخلقة عيونها في البتّ الجرت ..

"والااي دي إيّاها والله.. من شامتها الفي خدها دي عرفتها.. زاتو يا (سعدية)

ماعندهم بتاً منغولية تاني ولاشي؛ إتمنغلي إتي الله يعلم!! .. والااي البنية

النقول جدعت فوقى عمل؛ قلبي لامن قراني لمن شفها زي النقول بنيتي..

ياحليلها والله!! .. وكبرت ما شاء الله ولامن بتقول إتفضلي!! .. علا يا

(سعدية) الجابك شنو هسه للناس ديل؟؟!!" ..

اها (سعدية) تتكلم كدة مع روحها جات حاجة (فاطنة) منكولة ع البنية دي

"باقي الرطوبة قايمة عليها" زي ما قالت ل(سعدية).. "إتفضلي مالك واقفة في

الباب" ..

اها فضّلوها ليك في الراكوبة "عشان الكهرياء قاطعة وهو الله منّو ماف" ..

اها بعد البت جابت ليها عصير الليمون المسيوط و جعمت منو ..

(فاطمة) قالت ليها: "ماعرفتك" ..

قالت ليها: "أنا (سعدية) شغالة كنت في المستشفى بتاعة الشرطة لمن ولدتني قبل تمنناشر سنة كدة لورا" ..

قالت ليها مرحب بيك دي إنتي القلتي لي البت "سليمة" وسميناها عشان قولك مش كدة؟ إتذكرتك" ..

"إتذكرتك" دي كانت معاها مَصْمَصَة شفايف و حُدْرَة ل(سعدية) ..

(سعدية) قامت دنقّرت كدي .. وقالت ليها: "تقولي شنو !! قلت أطمنك" ..

قالت ليها: "سَمَحْ؛ هسه خير؟" ..

قالت ليها: "طيب البنيّة ماتمشي أول عايزاك في كلمتين كدة ده" ..

اها فَرْتِكُو البنيّة قالو ليها أمشي في حُدْرَة ورّقيها ..

(سعدية) إِسْتَعْدَلت .. قالت ليها: "الموضوع والله أبداهو كيفن ماعارفة .. أنا

زولة كبرت وعرفت قبل كم يوم إنو عندي المرض الكعب وتعبت لامن

فَتَشْتَكُم .. عايزة ألاقى ربي بقلب نضيف وأبري ذمتي" ..

حاجه (فاطنة) تَبَّتْ بكَرَاعَهَا اليمين في الواطة وضربت كُرَاعَهَا الشمال نظام

"قَبْلِكَ وَحَدِّكَ وَبِرَاك" وقالت ليها: "سلامتك" ..

قالت ليها: "يوم ولدتني كان في واحدة اسمها (جميلة) مرّة سفير ولدت معاك

في نفس اليوم والزمن .. غَمَمَتْ لِلدّاية عشان تبدّل شافعتها مع شافع أي

زول تاني ..

أنا الكلام ده عليم الله و أعدم أولادي ومن القعدة ما أقوم؛ عرفتو فُبال
 إسبوعين.. وأول ما عرفتو بديت أفتشكم اها إنشغلت بمرضي لمن عرفوهو..
 بس شاهد الله قلت قبل أبدا العلاج إلا لأفك أكلمك"..
 قالت ليها: "الداية منو؟ وبدلت ياتو شفح؟ قصدك دي ما بتي؟؟؟"..

"٩"

المهم أحكيك أحكيك.. و أَلْفني أَلْفك..
 اها (سعدية) بتؤلف و(فاطمة) بتسمع وما ركزو مع (سليمة) الوقت جنب
 باب المطبخ.. وشاية عَرِقْ خُدرة في يدها ودموعها عشرة عشرة..

مش منغولية؟ أكيد ما بتفهم - حسب فهمهم هم..
 مشكلتهم ما مركزين إنها بتسمع وبتفهم..
 إنها بعد (جاد الكريم) ما بجي يعلمها كل يوم عن الحياة بقت بتفهم أحسن
 من أول..
 بقت بتقدر تعرف شعورها حزن وللا فرح.. ما ح نقول غضب لأنها ما حصل
 غضبت من زول .. و(جاد الكريم) زاتو ما وراها الزعل ده شنو.. خلاها مع
 التعريفات البسيطة..

(سليمة) جد قلبها نضيف.. كان ممكن نَدَسَّا وتعمل ماسمعت لكن ما بتعرف لكدة..

جات لي برة قالت ليهم: "يعني دي مأمي؟؟ لالا دي أمي وأنا بحبها.. عليك الله ياخالتي ماتشيلوني منها" ..

خَلَعْتُهُم لِيكَ فِي صَمَةِ خَشْمِهِم الْإِثْنَيْنِ وَقَعْتَ فِيهِمْ صَاقَعَةً..

أمها عايزة تعمل حازمة ما قدرت.. صوتها كانت عايزاهو نهرة بس طلع حزين.. قالت ليها: "يا (سليمة) إنتي بتي" ..

و(سعدية) ما عرفت تقول شنو..

(سليمة) دي بتبكي الدموع عشرة عشرة قالت ليها: "يا أمي هي قالت أنا بت ناس تانيين أنا ما حبيتها خالتي دي.. ما حبيتها والله" ..

ووقعت وُرْدُلُبُ (سليمة) ..

مش قبييل قلت ليكم عندها مشكلة في قلبها بنجيتها بعدين؟..

أما (فاطمة) و(سعدية) أَرْفَعُكَ أَرْفَعُكَ ..

(سعدية) لأنها عارفة إنو متلازمة داؤن دي أصلها ما بتكون بس شي في الوش والخَلْقَةُ كَدِي ساكت.. وعارفة إنو اسمها متلازمة/ سيندروم عشان

لاقاها ليك (أريد) جنب البوابة القلبوها بتاعة قزاز ديك وتاني خلّوها فاضية..
أها "هاي وهاو آر يو HI, How are you؟" وكدة.. نست زعلها في
ثانيتين.. "مالك ميوّزة يا جميل" ..

إتذكرت كَرُو هي ميوّزة مالها.. وطوالي إتذكرت "بندوري" حقت (جاد الكريم)
وقارنتها مع هااي وبتاع بتاعة (أريد).. قالت ليهو: "جست بروبليمس just
problems كدة عائلية" ..

قال ليها: "فكك من البروبليمس" ..

أها عاد العنقليزي أنا مابدورو عشان كدة الخلاصة بتاعة الحوار.. إنو (أريد)
ده رغم إنو لعَبَجِي بس بحب يساعد.. و(سحر) دي عاجباهو إنها زولة
دُغرية مابفرق معاها من طبقتها وللا من طبقة وين ماتعرف المهم الحق حق
عندها.. ومكيفاهو إنها الوحيدة الما إتكسرت فيهو.. في رايو طبعا..
فقام قال ليها: "ياخ بَوَصَلْكَ قريب لمحل ماشة رأيك شنو؟" ..

و قد كان..

وصلها لحد خشم باب بيتهم.. عشان كَرُو يتصادف وقفة العربية مع فتحة
أخوها للباب..

قالت ليهو: "ده (أريد) معنا في الجامعة كنت تعبانة فأصرّ يوصلني" .. أخوها
ماركز معاها نهائيا.. قال ليهو: "أهلاً إنشرفنا" .. و قبّل على أختو: "عائني

أمي في المستشفى مع (سليمة).. أدي (أمجد) ده عصير ونادي ليهو
(حسن).. وقام جاري..

(أمجد) / (أريد) قال ليهو: "دقيقة ياخ إنت فهمت توتالي رونق totally
wrong.. أنا ماجايي أتقدم ل(سحر) مثلاً هههههههه جايي أقدّمها بس"..

الأخ عاين ل(أريد) حمّر ليهو زيببين تيّة قال ليهو: "عاين إنت جيت في
وقت غلط.. ف الله يرضى عليك عشان ماتطلع من هنا بإعاقه ياأعد
ياأمش.. أنا عايز ألحق أختي وأمي قلت ليكم في المستشفى"..

(أريد) قال ليهو: "أي قوت إت يامان I got it , man .. أقول ليك كلام! يلاً
أوصلك أسرع من المواصلات"..

المهم الشاهد: إنو (أريد) وصل (سحر) وأخوها المستشفى وفحط وهو بضحك
"والله عيلة فنني funny بشكل هههههههه"..

"١٠"

جاء بعد ثلاثة ساعات كدة دكتور كاشي سفنجتو الخدرا..

- أنا شاكة إنو نفس ذات الدكتور اللاقاني في القصص الفانت بس كمان ما ح أتهمو - ..

اها جا من هناك منكوش قال ليهم: "ياأخوانا ح نعمل شوية فحوصات كدة وحاجات تانية عايزين نتأكد من حاجة بالذات مع مرضها ده"..
حاجة (فاطنة) قالت ليهو: "طوالي ياولدي" ..

طبعا لحد الدكتور ده جا كان الأخوان الجوز وصلو حاجة (فاطنة) و(سعدية) وقاعدين معاهم.. وبسمعو في الكلام ده.. فقام (سامح) قال ليهو: "يادكتور هي مالها أول؟" ..

قال ليهو ؛ وهو بحك في راسو بقلم بيك: "الالا ماف شي واضح مابقدر كمان أديكم تشخيص قبل ماأأكد .. بس قلت أوريكم لأنو سيستر (سعدية) دي مازولة هينة.. المهم الكلام ده بنص القيمة" ..

(سامح) مشي مع الدكتور نظام يحاول يفهم منو في شنو.. وإنو القروش مامشكلة.. مع إنها أم المشاكل..

(سعدية) للأمانة يعني ح نقول ماقتصرت معاهم وواقفة معاهم زي كأنها ما من الأعراب .. واقفة معاهم أكثر من ناس الحلة الإثلمو عاينو ليهم راكبين الركشة وسمعو كواريك (سعدية) في سيد الركشة "أرحكاكا مستشفى الشرطة" .. وعارفين البيت مافيهو زول غير (مدينة) مَرَّة (حسام) الغاطسة في الجزو بتاعها .. و غير شافع جيرانهم الكان بلعب بي كورة شراب إنتنظر (سامح) جا راجع وكلمو ماكان في زول عرف شي وللا الناس ديل وين .. غايتو الناس نفوسها قستت ..

اها الدنيا مغزيت و(سليمة) دي رقدوها العناية .. المهم جا نفس ذات الدكتور بنفس ذات سفنجاتو الكاشيها .. قال ليهم: "ياأخوانا كدي فيكم زول قرأ جامعة؟" .. وعاين ل(سحر) و(سامح) .. قالو ليهو: "كدي إنت قول العايز تقولو فهمناهو سمح مافهمناهو بنكلمك .. بس عليك الله وقعت قلبنا في شنو؟" ..

(سعدية) طبعا قاعدة معاهم عايزة تشوف الدجاجة البتفقس بيض دي نهايتها شنو عشان تعرف تقول ل(جميلة) شنو وكيف .. اها الدكتور ده حكَّ عنقرتو كداللاااا بقلم البيك وقال: "طيب بحاول أختصر غايتو" ..

و إنْثَفَتْ على حاجة (فاطنة) المُتْبَلِّمَة بالتوب وقاعدة أم قَلَّو عاين ليها وعاين لباقيين ديل نفر نفر ..

"شفتو ياجماعة القلب ده عندو أربعة حجات أذنين وبطينين .. يعني بالضبط كدة زي أوضتين معكوسات ببرداتهم.. بس الأوضتين مامعكوسات جنب بعض قاعدات والبرندات برضو ..

اها لأنو دم الجسم كلو يَمُر بيهو زيو زي أيِّ مصنع بيبيسي بَعَبُو القَزَائِر تاني؛ وللا قولو زي طرمبة الموتور البترفع الموية للصهريج وبشربو منها باقي الناس في البيت موية ويستحمو لَمَن الموية تقطع..
فالبحصل إنو :

الدم بجلي بالأوردة للأذنين الأيمن بعدين البطين الأيمن بعدين منو للشريان الرئوي ومنو للرئة، الأوردة الرئوية، الأذنين الأيسر، البطين الأيسر بعداك للأورطة وباقي الجسم..

يعني من برميل البيبيسي للمواسير للقزائز.. بس هنا من القزائز البواقِي بَدَقَّوها تاني في برميل..

اها في حالة بتك دي عندها فتحة بين الأذنين بتخلى الضغط يزيد على الجزء اليمين في حين العادة الجزء الشمال هو الضغوط أعلى..

يعني بدل ماسورة الشارع بتوزع للبيت الموية ماسورة البيت هي البتودي للشارع..

بس مع السنين الضغط ببقى أعلى باليمين زيادة عندها والشريان الرئوي
ضغطو حيزيد..

العايز أقولو ليك إنو الموضوع ده حيؤثر على القلب ماحيشتغل زي أول..
أأي هو سترها معاكم لهسة وكان ممكن ما تعرفو عندها شنو لو ما وقعت
لأتو نوعية الخلل والفتحة دي بنكتشيفها لقدام من عمرها ده و أكبر؛ لكن
أحمدي ربنا إنو ظهرت هسه..

المشكلة ح تبقى إنو لو الفتحة دي ما إتقفلت بعملية؛ الدم ببقى مافيهو
أوكسجين كفاية للجسم و الأطراف ح تبقى زرقاء وبعدين الجسم ح يبقى كلو
أزرق و(سليمة) ح تدخل في فشل قلبي رئوي و تموت..

الموضوع ده لازم عملية ترميم؛ قفل ثقب ياخاله بعد ده.. مافيهو حل كدة
وللا كدة"..

"١١"

(سامح) بقى منكول في الحيطه وشغال "لاحول ولاقوة الا بالله.. لاإله إلا
الله".. و جا في وشو شكّل (سليمة) دي أول ما أمه جات راجعة بيها وكلهم
محتارين البت المنغولية دي شنو.. و إتذكر عُمُر خمسة و(سليمة) دي
مابتقدر تربط جملة مفيدة.. إتذكر طرحتها البيضاء اللمن لبستها جاتو فرحانة

"يا أخوي أنا إتْحَجَبْت" .. وهو فتح خُشْمُو "يعني شنو حجاب؟ إنتي فاهماهو يا (سليمة)؟" ..

قالت ليهو: "أبوة (جاد الكريم) ورَّاني إتو ربنا خلَّاني زي دهب خالتي (سكينة) ومفروض أدِسَّو عشان مايسرقوني.. فأنا ح أخلي ربنا يدِسَّني كدة من الحرامية وكدة ح أكون معاكم" ..

(سامح) إتذكر إنو - كَرَّرر دمعتو جَرَّتْ - مع أكل العيش ماكان عندو زمن ليها.. وإنو (سليمة) بقت زول بقول جمل مفيدة بمعاونة (جاد الكريم) ده..

(سحر) قعدت جنب أمها على رُكْبها وتبكي و تَتَمَخَّطُ في طرحتها وحاضنة أمها بيدها الثانية ..

أها حاجة (فاطمة) دي وقعت فيها جُلَّة؛ لا عرفت تستغفر لا عرفت تكورك.. (سعدية) زحَّتْ بعبيبيد منهم حبة كدة..

الدكتور الشَّلِيق واصل: "وبالمناسبة يوم العناية ده ما ح تدفعوهو عشان سيستر (سعدية)" ..

هنا كلهم رفعو راسهم ليها..

حاجة (فاطمة) أشرت ليها ده كلو منك إنتي..

الدكتور الأشلق من رحو لمن كان شليق قبل شوية قال ليها: "لالا ياخاله بتك دي عيانة شديد كدة كدة كان ح تعرفوها لقدام .. سيستر (سعدية) دي ما عندها ذنب" ..

سيستر (سعدية) بقت تعالين في الواطة وتغمر من معاينتهم ليها وتفكر "أيوواااااا دي كدة قروش ظريفة" .. و بقت تَمَحْمَحُ في راسها ح تقول شنو .. بعد داك رفعت راسها وعالنت ل (فاطمة) ..

قالت ليها: "دي حسنتي الجاية أوريك؟" ..

(فاطمة) قالت: "حسنة شنو؟ البت مرضت بسبب كلامك!!" ..

(سامح) قال ليهم: "ياأخوانا صلّو ع النبي في شنو؟" ..

(سعدية) قالت ليهو: "الفي إنو (سليمة) ما أختكم .. وأول أنا ما عرفت جيت

أكلم أمكم بعد فنتشتها إهى إهى" ..

نزلت ليها دمعتين كدة ما بعرف عَصَرْتُهُم من وين ..

ياخ (سعدية) دي قلبها قاسي كيف!! ..

طبعاً جُلَّة و وَقَعْتَهَا فيهم وعملت روحها ماشة ..

قامت (سحر) مسكتها: "ياخاله ده كلام شنو البتقولي فيهو ده؟ ده إتهام

عديل" ..

قالت ليها: "عاد يابتي ده الحصل و حكيتو لأمكم .. أنا مرة كبيرة و عيانة
البحليني شنو أكذب؟! .. ويا (فاطنة) لو عايزة نصيحتي وريتك أمها منو
ووين فممكن تعالجها ليكم بدل تموت" ..

هنا ماف زول وقفها و هي ماشة ..

قعدو يتلففتو ساكت ..

بعد مشت؛ (سامح) قعد في الواطة جنب أمه "يمة ده كلام شنو؟" ..
غايتو حاجة (فاطمة) ياحليلها كانت في عالم تاني ..
بس أحكيك أحكيك؛ حكّت السمعتو من (سعدية) ..

(سحر) قالت: "آاي بتكون ما أختنا .. زاتها مابتشبهنا يأمي أحمدي الله
العرفتي" ..

أمها حمّرت ليها وقالت ليها: "الجنا بالترباية ما بالولادة .. البت دي بتي لو ما
بتي زاتها بتي . أحبيي يا (سليمة) القلب أختك قاسي عليك" ..

خلونا منهم وتعالو لـ(سعدية) المشت زعلانة و تفتنق "قال أنا كذابة قال!!!
دي حسنتي؟ هسه لو ما أنا ماكان دفعنو دم قلبكم !! .. صحي الحسنة في

المُنعول.. غااااااايتوو تشييبببب.. تشييببب دي كانت صوت مَصْمَصَة الشفتين بحسرة كدة ..

(سعدية) طبعاً يومها كان طويل بالحيل..

قامت من محل إتصالات قريب للمستشفى ضربت ل(جميلة).. عاذ النمرة عندها..

"ألو أوعك تقفلي الخط .. بئك دي راقدة في مستشفى الشرطة العناية المركزة ..قالو إلا عملية وللا ح تموت" ..

"١٢"

الدكتور أب سفنجة داك كان واقف وفتح خشمو في المنظر ده كلو.. لا عرف يْحُكُّ عَنقَرَتو بقلم البيك لاعرِفْ يَحُتُّو في جيبو..

إتحنح كدة حتن ركزو معاها..

قال ليهم: "ها زي ماقلت ليكم لازم عملية بأسرع مايمكن.. إحنا ح نمسكها الليلة معنا .. وبكرة ممكن تسوقوها" ..

(سامح) قال ليهو: "طيب مش عيانة هي؟ خلوها لامن تبقي كويسة" ..

قال ليهو: "ما هي ما ح تبقى كويسة إلا بالعملية مادام الأعراض ظهرت معاناتها وقتها قَرَب" ..

حاجة (فاطنة) رفعت راسها قالت ليهو: "تبرا بتي .. خلاس إحنا بننتظر لامنْ نشوفها" ..

قال ليهم: "المشكلة ما ح تدخلو يبقى تنتظرو لشنو؟ دي عناية يا حاجة .. قومي أمشي البيت وصباحات الله بخيرها" ..

المهم ..

الناس ديل رجعو بيتهم يد ورا و يد قدام ..

وهم داخلين كدة في باب البيت لاقاهم (جاد الكريم) بدُق في الباب ..

(سحر) أول ماشافتو قالت ليهو: "ال الله قدرك عليهو داير تَعْشُ ليك واحدة منغولية وتخلا بيها" ..

نطط عيونو "ده كلام شنو يا (سحر)؟ أخلا بيها؟ في شنو يا أخوانا" ..

(سامح) قال ليها: "في شنو يا (سحر)؟ اليوم ده باين والله من قبيل الله يعدّيهو ع خير" ..

(سحر) ماسورة وإتفتحت .. طَرَشْتُ الكلام القالو (حسام) كلو ..

(جاد الكريم) بقى شغال "حسي الله ونعم الوكيل .. أنا؟ لاله الا الله" ..

(سامح) قال ليها: "جبتي الكلام ده من وين؟" ..

قالت ليهو: "سامح) شاهد قال ؛ أسألو" ..

(جاد الكريم) قال ليها: "وَكَيْتُ شاهد ما ح أرد إلا يكون حاضر عشان مأنا
البتكلم في زول من وراهو" ..

إتلفت على حاجة (فاطمة) قال ليها: "مأنا ال بخون الأمانة!! ولدك يا
(صالح)!!" ..

حاجة (فاطمة) قالت ليهو: "والله خابرك ياولدي .. والكلام ده ما وقتو ..
(سليمة) في المستشفى مامعروف تعيش وللا تموت .. أحبيبي يا بتي" ..

المهم دخلو حاجة (فاطمة) لأنو كرعينها بَقَن ماشايلاتتْها و رَقْدوها و(سامح)
ساط ليها عصير ليمون سكر و كثير ..

وبعد غطّاها بفَزْدَة كدة جا ل(سحر) "عايني تعالي عايزك" ..

مشو قعدو في الحوش تحت شجرة الليمون ..

"قولي لي براحة موضوع (سامح) ده؛ ويجيك إنتي لشنو مايجيني؟ والود
التاني ده شنو كمان؟ آخرتها بقيتي تركبي عربات؟" ..

(سحر) صَنَّتْ كدا بعدين قالت ليهو: "والله ماف قصة و لاشي .. (حسام) ده
من زمان بِلَمَحْ وكدة؛ ووقفتو في حدو" ..

قال ليها: "آي وفتيهو لامن جاك الجامعة" ..

بلعت ريقها وقالت ليهو: "كُونو جا مامعناتها مديهاو وش أنا .. هو جا قال خايف ع (سليمة) وكدة؛ وياهو القالو قلتو ليكم .. و(أرد) ده بقراً معنا.. شافني طالعة حلف يوصلني.. هو في جمعية خير كدة و بساعد الناس" ..

قال ليها: "وانتي الخير؟ محتاجة مساعدة؟" ..

قالت ليهو: "والله مافكرت فيها.. كنت عايزة أصل أكلمكم ب(جاد الكريم) كنت زعلانة شديد" ..

قال ليها: "آي زعلانة!! و كُلُّ ماتكوني زعلانة بتزكي مع زول يوصلك وللا شنو؟" ..

قالت ليهو: "عيب يا(سامح) ياأخوي إنت عارفتي ما زولة كدة ياخ.. مريبين في بيت سوا.. بعدين ياخ قلت ليك ما فكرت كثير وهو إتلايق.. أصلاً لو بعمل في شي غلط كان نزلت في راس الشارع مُش جيت البيت عديل" ..

قال ليها: "لا ح تنزلي في راس الشارع المرة الجاية.. يا (سحر) الله ووالله.. الزول ده لا توبنا لا زيو نحن.. ركوب عربات ما عايز أسمع بيهو ولا زاتو تسوييهو وراي عشان ما أسمع بيهو.. أبوك لو عرف بموت فيها.. نحن ناس ما عندنا غير شرفنا والسمعة زي قشة الكبريت.. أسمعني كلامي ده أخير ليك" ..

"١٣"

(سعدية) بعد قفلت التلفون ورجعت بيتها.. وَصَلَتْهَا كَدَة وَقَفْت عَرَبِيَّةً بَاجِيْرُو..

(جميلة) راكبة ورا ولأنو العربية مظَلَّة مَافِ زول شَافها..

نزل السواق دق الباب..

جات (سوسن) فتحت..

قال ليها: "أمك في؟"..

قالت ليهو: "آاي دقيقة أناديها"..

جات (سعدية) بمنظرها بتاع المستشفى زاتو.. لقت العربية عرفتها (جميلة)..

فتحت الباب الورا قالت ليها: "أنا دي دَخَلْتِي عَايزَة أَسْتَحَمَّ مِنْ رِيحَة

المستشفى"..

(جميلة) ماعينت ليها زاتو؛ قالت ليها: "أركبي وتعالى معاي بعدين

إستحمي"..

ركبت (سعدية) بدون نقه كثيرة مع (جميلة)..

(جميلة) قالت للسواق: "وَدِينَا مَسْتَشْفَى الشَّرْطَة"..

لحدِ مَا وَصَلُو صَائِنِينَ؛ زول لو وَقَعَ لِيهَو قَشَّةً كَانَ حَ يَسْمَعُوها..

العربية عادَ باجيرو ومُظَلَّلة وهيئة دبلوماسية فدخلت المستشفى تُوشِكُ بدون توقيف ولا سؤال..

كلمتكم أنا القرش سَمِحُ والواسطة سمحة..

أول ما نزلو؛ قالت ليها: "يا (سعدية) أنا كلمت (سعيد) واتفقنا نساعد البت بس سيرة إنها بتي ماتجي"..

قالت ليها: "والله كلامك ده كان نقوليهو قبل كدة لأنني كلمت أهلها.. الموضوع دي إن ايه DNA زي ما قلت ليك وليهم و بِنُكشِفُ"..

قالت ليها: "هم حق العملية ما عندهم يجيبو حق دي إن ايه DNA من وين؟ خليك عندك شوية فهم.. أنا ح أساعدهم وده المهم.. وإنتي كمان ح أدّيك حقك.. لكن أيّ لَوْلُوَة مَتَّك ما ح تطولي قرش.. والبلد الفيها دي إن ايه ADN دي فيها برضو محاكم و رد شرف وسجون بنعرف سِكَّهَا كويس"..

(سعدية) بي قلبها قالت ليها: "كويس أصبري وأنا بَوْرِيك الدروب دي كويس"..

واسطة (سعدية) علي شكل (جميلة) زاتها النضيفة وهاي كلاس كدة خلاهم يدخلو العناية ل(سليمة)..

(جميلة) قلبها ده إتعصرت فيهو ليمونة بعد ما إتقطع كدة بكلام (سليمة) ..
 قالت ليها: "ياماما أنا كمان بحبك.. إنتي إتولدتني مع ولدي في يوم واحد
 وشفتك وكنت صاحبة مامتك" ..

(سليمة) ياحليلها مخها ما مخ زول بيكذب القدامو.. وبثصدق طوالي..
 وشها وسط الدموع نوز ..

قالت ليها: "عليك الله بتحبييني؟؟ بتعرفي أمي؟ أنا عايزة أمشي البيت.. (جاد
 الكريم) ح يجي يلقاني ماف و ح يزعل" ..

المهم إتخارجو منها بعد ما قالو ماشين يكلمو الدكتور يطلعها بيتهم..
 (جميلة) ماشة و تقشفس في الكحل السال بالدموع بمنديل لونو زي لون
 التوب.. (سعدية) قالت ليها: "ما تراكى قلبك بحس!! .. البركة الحسيتي
 بيها" ..

(جميلة) قالت ليها: "لو زول قلبو حجر وشافها ح يحس.. الدور والباقي علي
 المفكرين سكاكنا الناس ده عمل خير.. حسبي الله فيك ياشيخة"..
 و ركبت الباجيرو خلّت (سعدية) واقفة هناك فاتحة خشمها "!!!!!!!!!! تتحسبن
 فيني أنا؟" ..

الناس ديل كلهم رقدو نامو.. إلّا (جاد الكريم).. راقد ويفكر "ياالله مالها
 (سليمة)؟؟ ياالله تعافيتها وترجع سليمة.. بس التراجع بمشي أتقدم ليها طوالي..

هي زاتها ماأظنها تمناع وللا شنو يا (جاد) ؟ وللا يمكن مادايرة عرس؟ لالا ماأظن.. كدي لبكرة" ..

إِتْقَلَّبْ إِتْقَلَّبْ فِي السَّرِيرِ وَالنُّومِ طَار .. قَعَدَ كَدَةَ مَمَحَّنْ .. لَمَنْ غَلِبُو قَالَ:
"مَابَحْلَهَا غَيْرِكَ يَاالله" .. وَمَشَى إِتَوْضَأَ بِإِبْرِيْقٍ أَحْضَرَ وَ جَرَّ الْمَصْلَايَةَ فِي
الْحَوْشِ قَرِيبَ لِعَنْقَرِيْبُو الْمَفْرَشُو دَه .. وَقَعَدَ يَصَلِّي وَيَدْعِي ..
مَابَعْرِفُو دَعَا بِشَنُو بَسِ الْمَهْمِ دَعَا ..

"١٤"

حاجة (فاطمة) كلمت حاج (أحمد) راجلها إنو جاتني واحدة وحصل وحصل
وقالت قالت .. حاج (أحمد) قال ليها: "دي مرة لُبُطُ ماتشغلي بيها .. هو
الجنا بالولادة وللا بالتربية؟ كانت وين من قبل تمنناشر سنة؟ (سليمة) هُنْ
مابنتنا؛ بنتنا .. منغولية! مشلولة! لو المسيح الدجال زاتو؛ ياها بنتنا .. هسه
باقيلك يا(فاطمة) أنا ببذلها بجنا ماشفتو ولا سمعت بُو؟؟ نحن بس هسه ندعي
الله يفرجها من عندو" ..

قالت ليهو: "سَمِحْ يَا حَاجِ وَ هُنْ جَاتِ أُمَهَا وَقَالَتْ بَتَدْفَعُ قَرُوشَ الْعَمَلِيَّةِ؟!" ..

قال ليها: "ده كلاماً تاني عادُ !! .. أنا هِنُ أبيع هديماتي الفي جِئْتِي بتي بعالجها" ..

قالت ليهو: "لكن يا حاج نحن ما عندنا شي والعملية قالو متكلفة بالحيل" ..
قال ليها: "يا (فاطنة) كلام وقلتو. المرّة دي ماتدفع قرش هِنُ جات .. عجبك عجبك ما عجبك خشمك عندك .. إنتي البِنِيّة دي ما بتك؟؟" ..

(فاطنة) سكتت سااااااي و بتفكر إنو ممكن تخلي المرّة تدفع القروش وماتحيب سيرة ل(أحمد) .. ممكن تقول ليهو باعت خاتمها حق الجنيه .. تاني قالت: "لالا ما ح يصدقني!! دي مصيبة شنو دي؟ أخير تتعالج وللا تموت؟" ..

الجملة دي قالتها بصوت عالي ..

قال ليها: "اممم قلت شنو أنا؟؟!!" ..

و دي معاها قعدة في العنقريب كدة نظام الكلام إنتهى ..

بهناك (جميلة) حكّت ل(سعيد) إنها عايزة تساعد البت وعمل خير وقلبي وجعني ومشيت شفتها ومسكينة وفي ميزان حساناتنا؛ بس الممرضة لازم تتأدب ..

المهم نفختو زييين تِيّة بقي حنبوكة بس ..

الدُعُشُ جا ..

(جاد الكريم) إتوضأ جنب المصلاية - الماقام منها - وصلّى في الجامع..
وبقى منتظر صوت فُنْحَة باب ناس حاجة (فاطمة) عشان يمشي معاهم
المستشفى يشوف (سليمة) مالها ويفهم زاتو في شنو حاصل ...

حاج (أحمد) قام صلّى و بَجَعَم في الشاي باللبن واللقيمات؛ حاجة (فاطمة)
قالت ليهو: "ها؟ مش أحسن تتعالج؟" ..

قال ليها: "يا (فاطمة) أصبحنا.. كدي النشوف بقولو شنو الليلة" ..

(سليمان) أخو (سحر) الأكبر منها بسنة بتكلم معاها برااحة قاعدين في بناير
خضرا مهتوكة كدة بشربو في الشاي هم زاتهم.. قال ليها: "أمبرح شايفك
راكبة مع (أريد).. ده شنو يابتنا؟" ..

(سليمان) في آخر سنة ليهو في الجامعة .. وبحب بت عم (أريد) اسمها
(نانسي).. يعني بعرف (أريد) وعيلتو ومشى ليهم كتير والبساط أحمدي مع
أخته (سحر) دي.. زي أصحاب أكثر من إنو وصي عليها.. دايماً بنصحها
في شكل هظار ويتقبلو مئو..

قامت حكت ليهو حاصل حاصل.. قصة (سليمة) والمرة و(حسام)
والمستشفى ..

(سليمان) قال ليها: "وحيات (نانسي) عندي؛ أنا البيت دي عرفتها مأختنا لكن
الزول إتعود عليها ياخ.. معناتها الليلة ماشي معاكم نشوف الحاصل .. والله

ده فيلم هندي عديبييل.. مسلسلات بس .. لكن برنامج (أريد) ده يابنتنا شكلك كدة عايزة ليك قعدة تاني بعد المستشفى دي مانخلص منها.. لأنني عارفك مابتركبي مع زول يوصلك" .. وأداها لكزة في كتفها كدة بغمزة مَرَح ..

قالت ليهو: "بطلّ سغالة ياخ!!.. لو ماحكيت ليك هسه ماجمّعت ياخ ومافكرت زاتو.. دمي فار من الزفت (جاد) ده" ..

إشتغلو وُد وُد كدة لحد ما جا (سامح) من هناك ومرتو (مدينة) قالو يشربو شاي الصباح مع الجماعة ويمشوا المستشفى سوا.. باقي الأخوان راقدين نايمين يشخرو مافاضيين لزول.. وماف زول صحّاهم زاتو ..

اها الإستحم إستحم والطلع بِحَبوبو - زي (سليمان) الطلع بِنَقَّو - طلع.. أول مافتحو باب الشارع وقالو كدي مارقين فتح برضو (جاد الكريم) بابو و مرق لبرة قفلو وراهو ..

"السلام عليكم (جاد) كيف أصبحت!؟" ..

"كيف أصبحتو إنتو؟ إن شاء الله عافية؟" ..

"أريت صباحك زين" ..

قال ليهم: "أنا قلت أوصلكم المستشفى لو ماعندكم مانع" ..

حاج (أحمد) قال ليهو: "ياولدي إنت زول شغال نحن بنمشي بالمواصلات" ..

قال ليهو: "لالا .. ماخذ إجازة لِي كم يوم عشان ماتروح علي بعدين في نهاية السنة.. بعدين إنتو أهلي ياعمي حتى لو ماخذ إجازة ..معقولة بس ياعمي؟" ..

المهم ركبو بعد تحانيس حاجة (فاطنة) وحاج (أحمد) ركبو قدام والجماعة الباقين إنكَبُو ورا في البوكسي زي الخرفان وبقو ماشين المستشفى..
وَصَلْتُمْ في الباب الراجل الواقف حَاف بالتَعَتَّرُو "ماف زيارة هسه.. وتعالو العصر" ..

قالو ليهو: "ياولدي عايزين نخرِّج البت" ..

قال ليهم: "وَكِتْ مِحْرَجْنِهَا بيقى يدخل زول واحد بس؛ مش جاية الحلة كلها!!!" ..

(جاد الكريم) طَلَع بطاقتو قال ليهو: "دي بت عمي ياخ والناس دي مقلقة شديد" ..

المهم بنتناقشو كدة جات (سعدية) من هناك كَتَّاحَتْهَا تُلوي ..

"يا سيستر إزيك وبناتك و اهاهاهاهاهاا ياسلام أيام والله..شفتي مستر (زين) ماعرّس البت ديك الكانت إمتياز. تتخيلي بس!!!" ..

أخذو ليهم زي نص ساعة نقل شمارات وإهتمام ألف ..

لامن ركبوا ليها درِبَاتْ .. لاحظو إنها أصلاً في العناية المركزة مفروض!!!! غابتو العناية غلبنى أفهم دخلوها لشنو مادام الدرِبَاتْ إلا بالبكاء!!!.. غابتو ماقلت شي أنا..

اها الجماعة ديل بربطة المعلم كدة وصلو العناية وقالو داخلين.. ولأنها "عناية" فبعد تحانيس من (سعدية) حتن دخلت حاجة (فاطنة) وحاج (أحمد) في الأول..

(سليمة) أول ماشافتهم إتحجت بالبكاء الأصلاً ماسكتت منو إلا قبل ما يدخلو.. وبدت تقول: "ياأمي إنتي ح تخليني مأرجع البيت تاني؟ إنتي ح تقولي أنا ما بتك؟ أنا ح أمشي وين؟ ياأبوي إنت مابتحبنى؟ أنا بحبكم والله.. بكئس الحوش مرتين تاني وبعمل ليكم الدايرنو والله مأنقنق.. أنا زاتي ماقاعدة أنقنق.. عليكم الله سوقوني من هنا"..

حاج (أحمد) ده قعد بيكي دمعو عشرة عشرة ااااه ااه اه.. وقام قلدها: "إنتي بتي.. مابنخليك.. بس إنتي عيانة وجبناك الاسبتالية عشان تبقي كويسة.. الليلة بترجعي معانا"..

حاجة (فاطنة) دي عصرت توبها كدة شديبيد على صدرها زي العايزة تطلّع قلبها برة وتعصرو.. وتبكي وتتنهّف: "يا(سليمة) يابتي ده كلام شنو؟؟.. حوش شنو يابتي؟؟.. إنتي عيانة.. في زول برمي جناهو؟ قولي بسم الله" .. ومسكت حاج (أحمد) من كنفو قالت ليهو وهي بتطّطب عليهو: "ياحاج خليها البكاء ده ماسح عشانها" ..

أها زحّ منها وفكّاها كدة ورفع روحو من قلدتا وقعت فيها حاجة (فاطنة) - القومتو زاتها . قلدتا ..

غايتو بركة السيستر جات هرشتهم لو مأكدة كان كمّلو دموع البت ودموعهم ..

قالت ليهم: "قالو ليكم ماتفعل ده كلام شنو ده البتسوو فيهو!!؟ عشان كدة بنقول ماف عيان يدخل العناية يجوهو زوار .. أطلعو برة لو سمحتو" .. وشالت يد (سليمة) وهي بثحمر ليهم نظام بتقيس في ضغطها .. (سليمة) هنا غمّضت عيونها وهي بتقول: "أنا قلبي واجعني شديبيد" .. وسكتت بعدها ..

السيستر دي نفضت يد سليمة وبقت تتجاري وتلّزّز فيهم "أطلعو برة أطلعو برة" ..

ووقفت في الممر تكورك: "يا (حسب الرسول) أجري شوف لي د. (علي) وبين .. أجري" ..

طلعو هم مخلوعين "ياالله تشوفها .. ياالله ترفعها" ..

اها من وشَّهْمُ البِنْعَلُ قفاهم الطلعو بيهو ده؛ ماف زول من الواقفين برة العناية
سألهم مالها وللا في شنو ..

وسيستر (سعدية) دخلت العناية أول ماشافتهم مُتْبَلِّمين كدة وجات طالعة بعد
شوية: "ياأخوانا خير!! ماف شي .. الليلة بتكم معاكم" ..

حاج (أحمد) قال ليها: "جزاك الله خير .. بس إنتي منو؟" ..

يعني من باب المستشفى دخلتهم قال زولة طيبانة .. وصلت معاهم العناية
قال خبيبير .. طلع لقاها تتجارى عشانهم؛ هنا قام غلبو ..

حاجة (فاطمة) تَقَشِّشُ في مخايتها في طرف توبها قالت ليهو: "دي
الكلمتك بيها أمبارح" ..

قال ليها: "أيوااا دي إنتي مش؟ عايني هنا ما عندك محل .. سبب واحد يجيبك
لينا ماف .. لو سمحتي أمشي .. بتتا وبنعرف نداويها كيف ن بلاا شحدة
ولا معروف من زول" ..

(سعدية) قعدت تضحك قالت ليهو: "تداوي شنو؟ البت عايزة عملية وإننتو حق
الأشعة ما عندكم!! .. عليك الله بلاش فشخرة و رفع نخرة في الفاضي!!" ..

(سليمان) في نص الكلام ده (سحر) قرصتو وعَفَصتو في كراعو قالت ليهو
برالاحة لمن إتلفت عليها: " دي زولة أمبارح .. القالت دي مأختنا" ..

قام قال ليها: "ياخاله؛ إنتي سعيك مشكور ولو عايزين شي بنعرف دَرِك بي وين .. زي ماقال أبوي أمشي" ..

(جاد الكريم) طبعا زي الأطرش في الزفة هو و (مدينة) مَرَة (سامح) مافاهم أي شي قال ليهم: "في شنو ياجماعة هنا؟؟ صلو علي النبي" ..
الناس دي بقت تقول: "ألف ع الحبيب" ..

(سعدية) رمت ليها كلمتين كدة: "أمها وكلمتها .. وجات شافتها أمبارح و ح تجي تسوقها .. غايتو صحي مرمي الله مابترفع تشييبيب!! وصحي الحسنة في المنعول .." .. مضمّصت شفايفها وإتخارجت منهم ..

حاج (أحمد) بقى يعاين ليها ويستغفر ..

(جاد الكريم) قال ليهم: "هو في شنو هنا؟ دي مالها؟؟!!" ..

الوحيد العبّرو (سليمان) قال ليهو: "دي واحدة قالت بدّلت (سليمة) مع ولد ناس تانيين وكِت هي مولودة جديدة" ..

حاج (أحمد) رفع راسو و تَبَّ بكراعو كدال في الواطة وحمّر ل(سليمان) قال ليهو: "كلام زي ده ماعايز أسمعو ياولد تاني .. فاهم وللا لا؟ البت بتنا" ..

المهم الناس ديل جايطين كدة .. هلّت من هناك (جميلة) ..

غايتو مابعرف البصحي الناس ديل بدري شنو كلهم ماعندهم موضوع ..

المهم داخلة كدة عليهم.. قصدي جاية عليهم لاقتها ليك (سعدية) "هووي ماتمشي؛ ديل ح ياكلوك كلهم هناك" ..

قالت ليها: "ديل أهلها؟" ..

قالت ليها: "إنتي ياختي أهلها ديل الربوها ليك وكبروها عشان تجي تلقياها باردة وتعملي فيها فاعلة خير.. ياهم أهلاً!" ...

(جميلة) ماردت عليها ومشت عليهم..

"السلام عليكم" ..

ردو السلام.. وعاد الريحة السمحة ديك المابعرف اسمها ولا هم كمان بعرفو اسمها جاتهم جوة عصعوص مخهم داخلة.. اها (جميلة) مابعرفها حادة على منو لابسة ليها توب أسود سادة ومعاها منديل طقم في يدها - نفففسي أعرف بتجيب المناديل الطقم من وين.. ماف زول سألها إنتي منو وللا دايرة شنو..

إلا (جاد الكريم) قال ليها: "سلامتكم؛ بس العناية دي قافلنها مابدخلو زول" ..

قالت ليهو: "الله يسلمك.. أيوة عارفة .. بس قلت أنتظرهم وأحاول يمكن يحنّو علي" ..

(سليمان) كان متابع لمن وقفت مع (سعدية) قام قال ليها: "إنتي القالو أم (سليمة)؟؟" ..

غايتو الولد ده ماعندو اوتيكيت بتعريفه..

كلهم رفعو راسهم..

(مدينة) الكانت بتعاين لشرطة توبها التجت وقايلة روحها لبستها بفوق؛
و(سامح) الكان بئكت في التراب بطرف شيشبو، وحاج (أحمد) الكان مدنقر
ويستغفر، وحاجة (فاطمة) الخاتة التوب في وشها، و(سحر) البتعاين لساعتها
ويتفكر ح تمشي الجامعة متين..

كلهم رفعو راسهم في وكت واحد..

(جميلة) عاد (جميلة) وعارفة بشسوي في شنو وحضرت روحها للسؤال من
بيتهم..

قالت ليهو: "أبوة دي أنا .. اسمي (جميلة)"..

"١٦"

حاج (أحمد) ده إستغفر واتحوقل وإتحسبن بصوت عالي وقال ليها: "الكلام ده
مامحلّو يابيت الناس ولا وقتو .. و زاتو ماف داعي ليهو.. لو عندك زول
عيان الله يرفعو ليك وهن جاية عشان بتنا وصلتي تب.. بس حقو تمشي
عشان مانتعبك معنا!!!"..

(جميلة) فجأة لقت روحها بتقول ليهو: "هي بتي لكن!! ما بتكم!!!"..

قال ليها: "بتك ورميتها، وشلناها نحن!! يبقى بتنا وولدنا عفينا هو ليك الله والرسول.. التربية ياست هي المهمة مالولادة وبراك شفتي وحسيتي وعرفتي.. لا نحن بنعرف شي عنه لا إنتي بتعرفي شي عن بتنا.. عايزة تكسبي أجر أمشي المايقوما أكفلي ليك زول وللا شيليهو ربيهو عندك وللا أمشي أبعد من بيتك بخمستاشر شارع وشوفي الناس عاملة كيف.. نحن الله سترها علينا عمرنا ده كلو مابنجي هسه نمد يدنا لزول" ..

- والله حاج (أحمد) عدا هو العيب أظن لي ومنطق الزولة دي بفهمها هي وللا شنو؟؟!! - ..

(جميلة) قعدت تضحك قالت ليهو: "لا والله ما عرفت تقول يا حاج أسمح لي يعني.. أنا ما قلت عايزاها لكن!! زولة في ضيقة وحببت أساعد لا أكثر لا أقل .. بس مما شفتها أمبارح عرفت المثل البقول الضفر مابطلع من اللحم؛ صح.. أنا ما رميتها ولا عايزة أجر فيها ولا بمدّ قي يدّي ليكم هسه حسنة؛ أبداً والله.. ولا كنت مفكرة إني ح أجي تاني لأنو زي ما إنت قلت التربية هي المهمة .. أنا (أرد) عندي بالدنيا.. لكن أعمل شنو؟ أنا ما إتخيلت للحظة إنو (سعدية) وللا (حليمة) ح يوافقو.. كان من غلبي لما كلمتهم لأنو ال ح يشمتو فيني كانوا كُتار.. ورينا سهلها والحصل حصل.. ماندمانة عليهو إطلاقاً .. لكن زعلانة إنو ممكن أساعد وإنو يمكن ماترضو .. هسه أنا بمد ليكم يدي عشان أساعدها وخلوها معاكم ماضروري أشوفها" ..

(سحر) سمعت اسم (أريد) ده بهنا ووشها قلب أصفر وأخضر وعابنت
ل(سليمان) لقتو مقلّع عويناتو - إنتو اسم (أريد) ده واحد وللا شنو؟؟!!..

قال ليها: "(أريد) البقي ل(نانسي)؟؟" ..

قالت ليهو: "أيوة، دي بت أخ زوجي بتعرفهم إنت؟؟" ..

(سليمان) قال ليها: "(أريد) البقرأ في جامعة الخرطوم؟؟" ..

قالت ليهو: " أيوة" ..

(سحر) بتسمع فيهم وشايفة وش (سليمان) وهو بسأل ببلة وشكلو طشّ عديل؛
لا عرفت تبكي لا عرفت تضحك.. حظها من الدنيا الولد العجيبها وكسرها و
لمن يجي ماشي السماء تتهاوي والنجوم بتسافر وقلبها بمشي في الواطة
بهناك يدقّ روجو بسفنجة مقطوعة ويجي راجع جوة مكانو في صدرها؛ يطلع
أخوها!! ..

(أريد) اللمن تشوفو الهواء ده بمشي بهناك لأماكن أخرى وعوالم تانية يديها
أكسجين وبخلي ليها هيليوم في مكانها وعالمها اللي هي فيهو ده ..
(أريد) اللمن يجي، في مطرة بنصّب جنب أضانها وغيمة بتتدلى من السماء
الإتهاوت قببيبييل ورجعت حنتها عشان بس تنزل المطرة.. هي قصدي
السحابة..

(أريد) ؟!!!! أخوها؟؟!!!! ..

كرو كشلو وقعت (سحر) مغمى عليها..

غابتو حاجة (فاطمة) وحاج أحمد ديل الله يشوفهم بس.. لو كان عندهم ضغط وللا سكرى كان لحقو جدي (الطاهر) ..

المهم أرفعك أرفعك سگلك سگلك من حاجة (فاطمة) و (مدينة).. و شيلك شيلك من الرجال و أجريك أجريك من (جاد الكريم) و(سامح)..

المهم الزولة دي جاها دكتور - ما لابس سفنجة خدرا و لاشي شغلة هي كلهم لابسين سفنجات خدر!!!! - .. دكتور إمتياز قالااااا كدة وظريفوني كان ماشي علي عنبر الباطنية وشاف المنظر.. جديد في الإمتياز هو ليهو شهرين وأهلو مرتاحين لسة ماشاف حاجة.. أصبرو خليهو يبدأ إجراءات الإلزامية عشان يحدد الطب زاتو !! ..

المهم قال ليهم الزولة دي عندها إنخفاض في الضغط دقيقة أجيب نقالة نديها درِب..

طبعا نقالة ماف.. يلقوها وين زي الوقت ده؟؟ أصلاً إلا يرمو واحدين من الدخلوهم عاملين حادث برة عشان يشيلوها.. المهم نفس ذات الرجال رفعو (سحر) ودخلوها العنبر وركبو ليها الدرب..

ده كلو و (جميلة) واقفة إنتكلت علي الحيطه..

بعد جو راجعين (جاد الكريم) و(سامح) وختو أمهم وأبوهم و (مدينة) بهناك..
 ولقو (جميلة) واقفة لسة.. سكتو ساكت.. حسو الكلام معاها ساكت ح
 ينحسهم.. المرة شووووم ياخ.. (بف باف) بس!! البجي جنبها كلو يخبت
 الواطة !!!..

"١٧"

جات الممرضة القبيل طالعة عاينت ليهم لقتهم بس ياهم الثلاثة ديل.. قالت
 ليهم: "إنتو تبع العيانة الجوة؟"
 بصوت واحد قالو: "أيوه"
 قالت ليهم: "طيب ح نمسكا يوم ثاني لأنو الانفعال اللقتو قبيل ثاني زاد
 الضغط والقلب إتأثر التقول هو ناقص!!"
 (جاد الكريم) قال ليها: "طيب ماتطلعوها وبإذن الله ماف زول بيخليها
 تنفعل"
 قالت ليهو: "دي مسؤولية والله.. والدكتور ده الكلام القالو لمن يجي طالع
 إتكلمو معاها.. ومشت خلتهم.."
 (جاد الكريم) قال ليهو: "يا (سامح) ياأخوي، هي عندها شنو؟"

قال ليهو: "والله أمبارح الدكتور غير مصنع البيبسي القالو وأمّية الموية ما فهمت منو غير إنها عيانة"..

(جميلة) قالت ليهو: "قلبا فيهو مشكلة.. ثقب.. خرمة كدة.. إلّا تنقل"..

(جاد الكريم) قال ليها: "يالطيف ألطف!! ثقب كيف يعني؟؟.. الزولة دي كويسة كانت!!"..

قالت ليهو: "بظهر في عمر متأخر نوعية العنדה ده.. أعراضو مابتظهر من بدري"..

قال ليها: "إنّتي دكتورة؟"..

قالت ليهو: "لا؛ بس في عيلتنا راقدة الحالات الزي دي ف عارفة التفاصيل وجوطتها والله من كترتها"..

هنا (سامح) غلبو يسكت ونسى موضوع البف باف و شكلو إعتبرها معطرّ جو..

قال ليها: "هي بالجد بتك يعني؟ لأنو ما عندنا حالات زي دي"..

قالت ليهو: "أيوة.. بتي.. أنكرها يعني؟"..

قال ليها: "تكرتيها أصلا لمن بدلتها.. إنّي مافكرتي للحظة رميتها لياتو ناس؟ ممكن يتقبلوها وللا لا؟ إنّي واحدة قلبك قاسي وحابّة نفسك بس!!..

أنانية"..

وصوتو علا (سامح) ده.. قام (جاد الكريم) مسكو من كتفو: "ياأبو الشباب
أهدأ .. الحصل حصل.. وهي ولا إترمت و لا شي.. عاشت بيناتكم معززة
مكرمة ولقت أسرة حببها وكلو لخير" ..

قال ليهو: "خير؟؟ هههااهاهاااا والله خير قال!! يازول بقولو ليك عملية والله
لو بعت روجي مأجيب قروشها ماتشوف زعلة أبوي دي ساي.. والله
(سليمة) قنعت مئها أنا ممّا قالو عملية .. وحضرت الكفن" ..

(جاد الكريم) قال ليهو: "يازول ده كلام شنو؟ الأعمار بيدد الكريم ما تقول
كدة.. مامعروف الموت لمنو ياخ.. إستغفر و ربك بفرجها" ..

قال ليهو: "أستغفر الله.. اها بفرجها بي وين بس ؟؟؟!! والله إلا يحيي سيدنا
المسيح ويهبشها.. حسبي الله عليك ياشيخة" ..

(جميلة) ممّا هاج في الأول ماقدرة تتكلم.. إتعبرت..

قالت ليهو: "معاك حق.. أنا بجلد نفسي بسياط من يوم خليتها.. بس مركزنا
ما بسمح لينا كان نجيب منغولية" ..

قال ليها: "تقومي تشيلي أولاد الناس؟ أي شي عندكم قابل للبيع والشراء
عشان عندكم قرش؟ ياخ علي القليلة لو كانت معاك ماكان هسه بقينا في إنها
ح تعيش وللا لا لأنو ما عند أهلها قروش!!" ..

الحمد لله إنو دكتور (علي) النادوهو قبيبيبييل داك جاء طالع في اللحظة دي - وإلا كان البحصل (أُمات طه) ماسمعن بيهو - لابس ليهو لابكوت مكرفس النقول دقّوهو فيهو.. وعيونو حمراااا من السهر ووشو تعبان.. بالنسبة ليهم دكتور وطلع من هنا وقبضوهو..

(جاد الكريم) ناداهو: "يادكتور يادكتور"..

وقف: "همممم نعم!!"..

قال ليهو: "العيانة الجوة ممكن نسوقها؟"..

الدكتور ما مركز وطلع عايز يشرب ليهو سيجارة وكباية جينة..

قال ليهو: "ياتو مريضة فيهم؟"..

قال ليهو: "سليمة) القلتو إلا عملية"..

قال ليهو: "أيوااا .. إنت أخوها؟" .. وما إنتظر إجابة واصل: " يا سيد!!

العيانة الجوة دي محتاجة عملية بأسرع مايمكن.. ومحتاجة ماتتفعل وماتعمل

شغل كثير لو شغالة ماتجهد نفسها يعني.. هي بتقرأ؟"..

قال ليهو: "لا"..

قال: "همممم مابتقرأ؟ ما دخلوها مدرسة وللا شنو؟ في ياخ معاهد!!"..

المهم حسّ إنو سرح.. قام قال ليهو: "عاين المهم ماتجهد نفسها وما تتعرض

لإنفعال والعملية تتعمل"..

- "طيب هسه بتقدر تطلع؟"..

قال ليهو: "والله لو بتوفرو ليها رعاية؛ أي ممكن" ..

(جميلة) قالت ليهو: "بنوقر ايوه" ..

الدكتور عاين ليها ولنضافتها وشبشباها الما شال تراب وعاين للمغبرين النقول

كان ساكتهم في سوق الجمعة .. حك راسو وقال ليها: "كوبس" ..

ومشى منهم بضرب أخماس في أسداس شين لم دي مع البت الجوة مع ديل؟

ونسى الموضوع أول ماشاف ست الجبنة وقعد ..

"١٨"

طيب لأنو الدكتور ده بني آدم .. ولأنو مساهر وراسو عض ولأنو ما مكنة ولا

شي .. مشى نام في الإستراحة .. في الحقيقة نام في كرسي؛ طبعاً الإستراحة

مليانة دكاترة وكدة ..

اها بهنا جماعتنا ديل منتظرين زي ساعتين كدة .. لمن فاض بيهم مشو دقو

باب العناية .. فتح عمو الراجل البكون بجوة داك .. "امممم !!" قال ليهم ..

قالو ليهو: "كتبو ليها خروج وللا لسة؟ عشان نمشي" ..

قال ليهم: "لو كتبوهو كان كلموكم وإتخارجتو !! .. و تاااح قفل الباب ..

غايتو الخشب قرب يقع بس متكل ب الله ..

اها بهناك (سحر) فتحت ومما فتحت الدموع دي نزلت تمانية وسبعة ..

أمها شابكاها: "قولي بسم الله!! في شنو؟" ..

والأبو ده غلبو عديبييل قعد في الواطة..

طبعاً ما ح نقول إنو الحاصل في العنبر إتو السرير ما حق العيان براهو وإنما أسرتو والجيران الجو يشوفوهو.. وما ح نقول إتو الضبان حايمة والعمدات (جمع عمود أكل) مجدعة..

وما ح نقول إتو الملايات مختلفة الألوان ومختلفة في أماكن الشريط الحاصل فيها.. وما ح نقول إتو السرير جنبهم طوالي راقد (عاصم) ده طفل صغير عندو سحائي راقد مجدوع والضبان ينوني في وشو وما عندو دخل في قصتنا دي غير إتو العنبر يحوي كل الحالات أياً كان مرضها أو عمرها لأنو مافي حنة يودو الناس بزحمتهم دي .. وما ح نقول إتو العنبر البشيل خمستاشر شايل ثلاثين.. وما ح نقول إنو الدكاترة الحايمة للعانيين ديل كلهم هم إثنين !! إثنين بس بتاعين إمتياز..

ال ح نقولو إنو (سحر) فتحت و (سليمان) مشى ينادي دكتور وما لقي.. جا قال لأبوهو: "لمن تبقى أحسن خلينا نمشي ساي ؛ ما ننتظر زول لأنو ما عندها شئ قدر ده وما ح نلقى زول فاضي هسه" ..

طيب ولأنو الاجراءات ما بتاخذ زمن حقت الخروج - لأنها عبارة عن ورقة بتتكتب وتنمضي بس - فالحصل إتو (سليمة) طلعوها بعد أذان العشاء.. و

(سحر) طلعت بدون ماينتظرو دكتور يفضى وبدون ما زول يسألهم وين ورقة الخروج دي!! ..

(جميلة) حالتها ضربت لراجلها قالت ليهو: "البت الفلتها ليك راقدة في المستشفى كلم المدير الطبي عشان يطلعوها" ..
وطبعا عمك (سعيد) إفترض إنو (جميلة) دي قلبها كبير شديد وبتحب الخير والمساعدة ..

فطلعة العشاء دي حالتو (سعيد) كلم المدير الطبي رسل ليهو زول ..
المهم طبعا الموضوع ماواسطة .. هي خروج ما شي تاني .. خلونا مع الفهم ده وما نحكها شديد وللا شنو!!؟ ..

البهنا إنو (سحر) و(سليمة) والجماعة رجعو البيت ..
(سحر) داخلة في حالة تانية و (سليمان) مركز معاها أكثر من تركيزو مع (سليمة) ..

حاجة (فاطنة) مشت شدت بليلة مسبعة ونادت (سهى) بتها عشان توزعها على الجيران ..

(سليمة) مما دخلت تتبسم ساكت فرحانة إنها طلعت ..

بعد رقدت حبة لمن أمها قامت تشدّ البليلة جاتها قالت ليها: "أساعدك
ياأمي" .. قالت ليها: "لالا إنتي أمشي أرقي" ..

قالت ليها: "ياأمي أنا كويسة" ..

المهم مشت رقدت ..

(جاد الكريم) بعد رجعو قال بكرة دي من تصبح هو بمشي ليهم يكلمن إنو
عايز (سليمة) دي ..

اها ما ح نباريهم كدة باقي اليوم ده ..

بس ح نقول إنو (سعدية) و (جميلة) ما نامو .. كل زول بهمو ..

و (جاد الكريم) صلى إستخارة حتن نام ..

يللا الدُغش لمن باب ناس (سليمة) إتفتح حق الشارع وحاج (أحمد) طالع ..
كجك (جاد الكريم) فتح الباب ..

- "صباح الخير يا عمي كيف أصبحتو الليلة؟" ..

- "الحمد لله يا ولدي .. أعفي لنا أمبارح تلتلناك بس ياكا ولدي" ..

- "يا عمي تلتلة شنو؟ و زي ما قلت ولدك .. اها عايز أطلب منك طلب
يا عمي" ..

- "إتفضل .. مُجاب بإذن الكريم .. لو من لحمي بسويهو" ..

- "تسلم يا عمي والله العشم برضو والله يديمك لنا .. إحم ااااا .. هو في
الحقيقة ما طلب .. هو رجاء .. ااااا .. إحم .. ااااا .."

- "ياولدي بتأوتو مالك؟ قول !! عايز ألحق الرزق.."

- "أنا عايز أطلب يد بتك (سليمة).."

حاج أحمد ده بلّم تبّ.. تتّح زييين.. بلع ريقو.. وعيونو طلعت لبرة ورجعت تاني لجوة..

قال ليهو: "سليمة) منو؟!!.."

قال ليهو: "بتك ياعمي.."

قال ليهو: "سليمة) بتي أنا؟ (سليمة) المنغولية؟!!.."

قال ليهو: "ياعمي منغولية شنو؟ مش بتك؟!!.."

قال ليهو: "بس هي زولة عرس؟ والله ياولدي ماعارف أقول ليك شنو.. إنت معزتك زي (سامح) ولدي الله يعلم.. ومما أبوك عايش إنت ياكأ ولدي.. ولمن مات قلت زادو عيالي واحد. وإنت زول حارة زيو والله.."

جاد الكريم قاطعو لأنو روحو حرقتو: "ياعمي إنت لو عايز ترفض طلبي كلمني والله مابزعل.. هي أقدار.."

قال ليهو: "لالا والله ما رفض.. خليني أشاور البت وأمها.. إنت بس خلعتني والله.. ويادوب طالعين من المستشفى.. كدي خلي الكلام ده لبعدين.."

بعدين حق حاج (أحمد) ده جاء..

ولأول مرة مما إتولدت (سليمة) ومشت ومسكت مقشاشة وقشّت حوش تنوم
لحد العصر.. لامن حاجة (فاطنة) شفقت عليها و مشت تبنتًا كم مرة..
(سحر) من الساعة عشرة صباحاً صحت..

جات أمها قعدت جنبها قالت ليها: "يابتي إنتي مما ولدتك بطنك غريقة.. لكن
الشايلاهو في بطنك قوليهو لي .. فضفضي حبة.. مش يمكن ترتاحي؟!..
(سحر) دي كانت منكولة علي الحيطه ورافعة كرعينها ماسكاهم عليها كده
متكرفسه و جازه جلابية البيت لحد تحت كرعينها.. لمن أمها قالت ليها كده
بدون ماتشعر الدموع مشن خمستاشر وواحد..(سحر) قالت وقالت وحكت شي
فهمتو أمها وشي شكلو كان هضرية ساكت..

أمها دي قلبها من جوووة كده وجعها.. قالت: "غايتو الجاتنا تَحْتَانَا.. أنا ح
أولّع بخور تيمان" ..

إحساس إنو بتها وكِت عايزة تحب زول حَبَّت أخوها عمل ليها طمام .. مرقت
البرنده إستفرغت و غطتو بتراب..

إحساس إنو هي فرطت في ولدها وهي ماعارفة وربت بت ناس تانيين بقى
متفاهم وما ليها.. زي حلة السليقة لمن تفور وتدفق؛ فار و دَقَق في روحها..
دي مصيبة شنو البقت عليهم دي؟..

حاجة (فاطنة) الصباح داك و هي قاعدة في المطبخ بئنقي في الفاصوليا سبت لأي شي.. إبتداءً من (سعدية) و (جميلة) ومروراً بالزمن وإنتهاءً براجلها الماعيز يفهم إنو البت محتاجة عملية.. وفي لحظة فوران السليقة ده كشحت الفاصوليا في الواطة بصينيتها.. وقامت على حيلها كدة ومعها "الله يلعنك"..

ماعندي أي فكرة لعنت منو طبعاً..

المهم قالت: "زاتو ماكلين لشنو".. ومشت قعدت في الراكوبة حردانة..

المهم فارت كويس مع روحها وجلدت روحها زيبيبين بسياط بتعرفها براها.. أذان الظهر أذن..

زي الكشحو موية في نار حلة السليقة قامت على حيلها وهي عرفانة عرفتها تقطر.. مشت إتوضأت وجات صلّت وإستغفرت زيبيبين تية.. وأخذت ليها بكية واتمختت والمُخّاتة جدعتها جنب التبروقة كدة ..

حسّت إنها ظالمة (سليمة) دي.. شنو القدّمتمو ليها وهي شغالة تقول ربيتها ربيتها؟ علمتها؟ قرّتها؟ فنتشت ليها مدرسة؟ إلا (جاد الكريم)..

عاد إتذكرتو كدة وقعدت تتبسّم ياسلاام الرزين الرابيق الماضيق.. ياسلااام.. أها قامت خنت ليها سخينة في النار ..

حاج (أحمد) جاء داخل مع صلاة العصر.. لقي (سليمة) صاحية.. وحاجة (فاطنة) قاعدة ممخّنة في العنقريب بلا مرتبة..

قال ليها: "ياحاجة ماتتمحني عليك الله.. ختي الغداء دايرك في موضوع كدة" ..

قالت ليهو: "خير إن شاء الله !!".

قال ليها: "خير قولي يا لطيف.. كدي قومي.. باقي جيعان أنا" ..

لا جيعان ولا شي هو وماعدو نفس ياكل زاتو .. دَخَل يدو في النار ومزَقها وهو جايي على البيت ولمن فاض بيهو قال يكلمها .. بس كان عايزها تقوم من المِحْنة المَتَمَحِنَاها دي أول ..

اها حكي ليها.. (جاد الكريم) قال ..

"أها رايك؟" ..

حاجة (فاطنة) بدون تشعر زغردت ..

قال ليها: "يا حاجة هسه يقولو شنو الجيران وأولادك الجوة ديل؟" ..

قالت ليهو: "يقولو فرحانة.. يووووميين أنا لا شفت فرح وشايلة هم جبال" ..

(سليمة) سمعتها جات جارية: "يا أمي إنتي مبسوطه.. أنا فرحانة إنك

مبسوطه .. ومسكت أمها قلدتها.. وسلمت علي أبوها في راسو ..

ما قالت "في شنو زي (سحر) الجات مَادَّة قَدُّومها ..

(سليمة) بجد قلبها قلب طفلة.. كل الفرحت ليهو إنو أمها مبسوطه وأبوها

مبتسم ..

حاجة (فاطنة) عاينت ل(سحر) وقالت ليها: "أختك خطبوها" ..

قالت ليها: "منو دي؟" ..

قالت ليها: "أختك (سليمة)" ..

قالت ليها: "يخطبو المنغولية وأنا قاعدة؟ ده كلام شنو ده؟" ..

"٢٠"

حاجة (فاطنة) قالت ل(سحر): "ده كلام شنو؟ عيب عليك.. دي التربية الرينناك ليها؟ كل شي قسمة لمن يجيك سيد سعدك ماف شي بكفو" ..

(سحر) دي نقت لمن غفر ليها الله وطبطبت كرعينها ومشت ..

(سليمة) سمعت الكلام وقامت قالت لأمها: "ياأمي بجد (جاد الكريم) قال عايزني؟ يعني أنا ح أعرس وأعمل ملاح براي؟ ياأمي مابعرف لكن أنا أسوي الملاح !!"

النفه دي كانت بعد ما (سحر) إتخلعت و (سليمه) أخذت مسالفة بتحاول تفهم ..

عرس بالنسبة ل(سليمة) عبارة عن حفلة زي حفلة بت جيرانهم (صابرين) .. حفلة للصباح .. وكانت ب(فرفور) اللي هي ماعارفاهو منو بس عارفة انو إنبسطة هي ..

العرس بالنسبة ل(سليمة) يعني حلة الملاح زي ما قالت ويعني ح تلبس توب وتخت حنة سودا واطية ..

عرس يعني ح تكون زي أمها حاجة (فاطنه) .. هي البتتكلم مع الشفع ويتشوفهم ويتتابعهم قشو الحوش وللا لا .. فرشو الملايات؟؟ .. ملو الزير

موية وللا لا .. و ح تعمل سخينة سمحة زي حقت أمها .. وتفتش مدرسه ما
بتردو شفعا منها..

بالعربي العرس لـ(سليمه) ياهو ده بلا زياده ولا شي..

لا!! و (جاد) العريس كمان !! ..

(سليمه) كانت مبسوطه إنها ح تسكن قريب لأمها؛ وزاتو تسكن قريب ليه؟
هي أصلاً ح تمشي منهم ليه؟؟ لالا يعني ح تكون مع (جاد) في بيتهم
ويشرح ليها كل يوم؟ كده ح يتعب و ح يكرهها..
"لالا ما عايزه" ..

"ما عايزه" دي قالتها بصوت عالي..

أمها قالت ليها: "بسم الله يا بتي في شنو؟" ..

(سليمه) دموعها نزلت عشره عشره "ماعايزه عرس يأمي عايزه أقعد معاكم" ..

حاج (أحمد) قال: "بسم الله!! يابت مالك؟" ..

وهي تتبكي و تبتخج..

(سليمه) دخلت في حالة تانية.. قدر أمها وأبوها شالو وختو هي تبكي.. في

النهاية قالو ليها "ما ح تعرسي تمشي مننا .. ولو عرستي بتكوني هنا معنا

قاعدة؛ نفوتي مننا وين!!" حتن هدأت..

(جاد الكريم) سمع الزغروده وقلبو فزاهو .. وقام طوالي إتوضأ وصلّى صلاة شكر ل الله .. و طبَّ نِعْلَاتُو وإتوكّل مشى ركب البوكسي وطلع المقابر لأمه وأبوه.. قال لازم يكلمهم لأنّو متأكد إنهم ح يسمعوهو ويفرحو ليهو ..

اليوم عدّ على (جميلة) بين تلفونات (سعدية)؛ وهي عايزة تلاقيها لشنو مابعرف بعد ده لأنو قروش الابتزاز مفروض تقيف بعد القصة إتعرفت!! لكن (سعدية) كلامها ل(جميلة) بقى تهديد إنو ح تكلم (سعيد) بالحقيقة و ح تشهد معاها الداية؛ وبين إنها منتظرة لنص الليل (أريد) ما جا.. أول مرة هو يتأخر.. رغم عمايلو كلها بس أصلو مابتأخر قدر ده في رايها.. و ما إتذكرت أصلو إنو ماحصل أساساً إنتظرتو لامن يجي لأنها من عشرة بتكون نامت ومفتكرهو دايماً بيكون جا وراها ب ساعة بالكثير.. بس اليوم ده كانت سَفْدٌ غلبًا تنوم وهو زاتو وعدّها المغرب بعد الصلاة يمشو ل(سليمة) لأنها حكّت ليهو إنو في بت عيانة وأهلها مساكين... وهو قلنا قبل كدة بحب يساعد رغم أي شي بسوي فيهو بس بحب يساعد الناس الغلابة وتعابا..

أهااااا لمن جات الساعه إنتاشر بالليل و (أريد) ما ظهر أمه ضربت تلفونو لمن قال بس زي خمستاشر مرة كدة .. ولمن ما رد ضربت تلفونات أصحابو كلهم.. وكلهم غمرو عديبييل أبو يردو ليها مع إنهم عارفين رقمها..

لمن ضربت للمرة الستاشراوية في تلفون (أريد) قام رد عليها واحد من أصحابه قال ليها وهو ببكي: "(أريد) في الحوادث عمل حادث مع واحد

صاحبه كانو متسابقين وهسه في الإنعاش جنباهو حوادث الخرطوم .. مامعروف يطلعو منها وللا لا" ..

(جميلة) جدعت التلفون و دخلت في حالة ثانية.. وبقت تهضرب وتكفّت في روحها وتكورك "ولدي الريبيتو راح مني .. ياالله!! يارب ماتشيلو مني .. البت زاتها مامعاي.. يارب ماتحرق قلبي عليهو" .. وكلام كتبيير مامفهوم.. لكن ل(سعيد) فهم إتو البت دي غااااااا كدة والله أعلم بتو.. بت منو وناس منو و هي وين مافهم .. ما ركز هو زاتو بالخلعة .. مسك (جميلة) يهدّي فيها "و إن شاء الله خير " و "قومي عشان نمشي الحوادث" ..

الكلام ده زمن الحوادث في وماقفلوها لسة.. مستشفى الخرطوم لسة شغالة.. لأنو الفالحين ديل قال بتسابقو في شارع كترينا كيف وليه مابعرف.. المهم إتكرّرو مشو الحوادث..

وصلنّم كدة لاقو صاحب (أريد) اللّمت فيهو (جميلة) في تلفونو واقف بره ومما شافم إتقعع بكاء..

"(أريد) و (زين) ماتو ياخالتي" ..

ياخ (جميلة) دي عملت عمايل في روحها لا حول ولاقوة إلا بالله بس!!..

(جميلة) و بتكورك "واي أنا من ود الناس الكتلنتو .. وواااي أنا من بتي الجدعتها.. وواااي أنا من روحي الظلمتها.. ووااااي أنا من ولدي القلبي

إتحرق عليهو.. رجعو لي ولدي.. عايضة ولدي أنا.. سوقوني معاهو لو أبا يرجع" ..

السفير (سعيد) ده لا قادر يواسيها لاقادر يلومها على كلامها ده..ماقادر زانو يفكر كيف تشيل بنتها منها!! وود الناس !! ما قادر يستوعب إنو ولدو مات.. ولدو الواحد فرحة عمرو.. المنتظرو يدفنو هو مش يجي هو اليدفن ولدو.. ولدو الشالو ورياهو .. لعب معاهو سكُ سكُ وليدو وشطرنج.. شالو في راسو وياما بالُ فيهو.. ولدو العرف معاهو إتو هو بيعيش طفولتو فيهو ويعمل شغلو وهو شايلو ويستمتع بأي بلد مشاها وهو سايكو ..

الأبوة بتجي بالممارسة ولمن الأبُ يشوف ولدو قدامو.. ما زي الأمومة المن شايلاهو في بطنها بتقول بتي وللا ولدي وهو لسة نطفة.. الأم بتحب شافعها قبل يطلع للدنيا.. كل يوم بتلمس بطنها وهي مبسوة إنو في جنين هنا حقها هي مهما كان درجة إختلاف الطبقات وللا حتى إختلاف الأم والأب زاتم في الحياة .. مافي أم بتكره طفلها مهما حكّت وللا قالت غير كدة .. حتى أمهات الليلة الواحدة؛ ليلة ثقة لأطفال ح يطلعو فاقدى أهلية يدعوهم المجتمع أولاد حرام ولقطاء ..

الأبُ بحب طفلو بعد يطلع ويشيلو .. ويشوفو قدامو ويحبو كل يوم أكثر كل مايكبر أكثر هو بحبو أكثر.. كل حرف جديد ينطقو بيكون مستمتع بيهو زي

كأنو هو زاتو بتعلم الكلام هسه مع طفلو ده.. كل "تاتي تاتي" بيقولها لتعليم المشي هو زاتو بيكون ب"تاتي" مع طفله بكل وجدانو ..

صدمة (سعيد) في مرتو البتعمل الخير كبيره كبيرة .. صدمة (سعيد) في إنو فقد ولدو الواحد ودفنو هو ونزلو في قبرو كبيرة.. (سعيد) إلا طلعوهو الناس من القبر .. إنهار ليهم جوة ويكي ويتكثح ..

من المستشفى (جميلة) رجّعوها البيت لحد الجثمان يطلع ولحد ماجا الجثمان البيت وأصرّت إلا تبوسو وتقلدو هي منهارة وتكورك ..
الناس ديل قضو ليلة صباحي .. الدفن تم لخمسة صباحاً..

بعد رجعو ود أخت (سعيد) طبيب قامت نادتو أمه إنو" (جميلة) دي منهارة وبتقول في كلام مامفهوم من نوع بتي وولدي الربيتو والناس بدت تسأل .. ف أنا قلت ليهم تعبانة وسقتها وهي زاتها ماحاسة إنها مشت معاي ودخلتها غرفتها ..(جميلة) خالتك دي منهارة شديد والله وخايفة إنها ده يؤثر عليها وعلى أخوي؛ بلييز أديها فاليوم وللا أي حاجة قوية عشان ترقد حبة ترتاح وتتوم .."

(جميلة) صحت الساعة عشرة ثاني يوم...

أي زول يجي يسأل منها يقولو ليهو إنهارت وأدّيناها حقنة منومة..

البيت إتملاً ناس بنشوفهم في نشرة الأخبار بس.. التياب تهفّف والحنن تتطاقش والعمم آيسكريم بس والبذل طلعت هسه من الكيس الجديد.. والطباخين مدورين والصواني والكبابي والطقوم والشاي داخل ومارق التقول عرس بس.. والونسة الدقاقة ناس إجازتنا في باريس وماشفتو الشانزليزيه وإشترتت وِرْجُغْ وِرْجُغْ من وين ما بعرف.. بالله عواصم العالم وقراهو والخريطة زالااتها كلّها كملت في الونسة بتاعة الجماعة ديل.. مافي بكاء بكاء وإنما ناس قاعدة قاشرة وناس لابسة طقم كدة بتاعين شركة كدي بيوزعو في البارد والعصير والمناديل والشنو شنو داك ..

(جميلة) دي صحت كدة.. بباقي منومها داك أول حاجة عملتها قامت علي التسريحة شافت موبايلها - الوقع منها أمبارح ورفعو سعيد ختاهو فيها - وضربت ل(سعدية).. كلمتا إنو (أرد) مات؛ وقالت ليها: "تمشي هسه لناس (فاطمة) تكلميهم.. تعالي لي بعد كدة" .. و قفلت السماعة ووقعت تبكي في الواطة.. حسّت إنو (سعدية) دي قريبة ليها كدة أكثر من البعرفوها على القليلة عارفة هي حاجة عمرها كلو مخبياها من الناس العارفاهم قاعدين تحت في الطابق الأرضي ديل وعارفة ح يكونو عاملين كيف ..

(سعدية) بهناك وقعت فيها جُلَّة.. دخلتها خلعة عديل.. وبقت تتمتم "كيف يعني (أرد) يموت؟ الزول النصيح الماشي بكرعينو يموت؟ البت العيانة عايشة؟؟ كيف يعني؟" والأسوأ من كدة إنو أول حاجة جات في راسها لَمَن (جميلة) قفلت السماعة بتمتمتها دي كانت: القروش طارت؟ .. ومساااااااا واقفة شايلة التلفون وتفكر إنو (جميلة) دي بثهظّر وللا جادة؟ كيف يعني ولدها يموت وتكون شايلة التلفون عادي ويتضرب وتتكلم كمان وصوتها زي القايمة من النوم زاتها.. وإنو هي تمشي هسه لناس (فاطنة) ديل عشان تقول ليهم شنو يعني؟ وإنو تجيها لشنو؟ وإنو (جميلة) دي شكلها عاملة ليها شرك كدة وتكون فتحت فيها بلاغ ما معروف زاتو..

فكرت مساااااااا وهي واقفة .. بعدين جا في أضانها صوت (جميلة) ده زي البتترجى فيها كانت أكثر من إنها بتأمراً وللا بتكورك زي عايدها.. إنو صوتها مكسور كدة.. هنا قالت "لاااااااا معناتها الولد مات بالجد!! ومعناتها أعمل مشوار (فاطنة) ده وأمشي أشوف المصيبة دي والدُّبارة كيفن" ..

وقامت طلّعت ليها توب أبو قجيحة قديبييم لكن داساهو هي فمحافظ على رونقو وطلّعت شبشبهها داك البتلبسو للحتات المهمة آخرها كان عرس بت (حليمة) الداية .. وقالت أصلاً هي من ناس المنغولية ح تمشي لـ(جميلة) وعزا وناس كُبارات ح يكونو قاعدين فأخير تَقْشَر وتبقى مارقة..

(سعيد) قاعد في الصيوان بتاع العزا مدنقر وأكاتفينو لمن واقعات وكبر في الستة ساعات البين الدفن والساعة عشرة - الصحت فيها (جميلة) دي - زي خمستاشر سنة لقدام .. "الفاحة" يسمعا يقوم على حيلو يرفع يدينو وما يفتح خشمو .. غالبو يتكلم غالبو يرد غالبو يقعد غالبو يقيف .. ومشى كم مرة لـ(جميلة) لقاها نايمة .. ود أخته قال ليهو - في المرة الثالثة الدخل فيها البيت وجا نازل من السلم - إنو أداها منوم .. لمن جات الساعة عشرة وربع تاني لقي روحو قايم وطالع السلم يشوفها .. حس إنو محتاج ليها هو يبكي معاها مش هي المحتاجة ليهو يقيف معاها ..

لمن دخل لقاها واقعة في الواطة وتضرب في روحها.. قومها وختاها في السرير .. يبكي لروحو دي ياحليلو .. يرفع فيها وحاسي إنو عايز البرفعو.. (جميلة) ما عندها أخوان.. بت واحدة ..

(سعيد) مما عرسها حاسي إنها بتو وأختو وحبيبنتو قبل مرتو وبقي ليها الأخ والأب والأم و الجنا زاتو قبل يولدو .. لمن شافها كدة فجأة رنا نزل على قلبو يقين كدة بقضاء الله وأمره فقام قال ليها: "يا (جميلة) إنتي بتعترضي علي حكم الله؟ إستغفري من أعطى أخذ.. رزق من الله وشالو .. واليوم تم.. كلنا ماشين حبيبتي .. ماتعملي في روحك كدة .. (أريد) بين يدي ملك مقدر.. أرحم بيهو مننا" ..

وهي شغالة تقول: "لالا ما رزق.. ده ماحقنا .. أنا عايزة بتي بس مادام ولدي مافي.. وللا شيلوني معاهو .. ما بقدر يا (سعيد) أعيش بدونهم.. ماقادر.. ياربي!! قلبي واجهني شديد.. عايزة بتي".

لمن غلبو يسكتها وهو حاضنها وقاعد جنبها في طرف السرير القومها فيهو قام رقدّها.. قال ليها: "حاضر.. حاضر .. بشوف الموضوع بس أصبري حبة " لا هو عارف رد كدة ليه لا مجمّع ياتو موضوع لا هي بتقول في شنو.. من أمبارح هو أحد صدمتو وبقي مافاهم شي .. بس اليقين البقي في قلبو وإنو (جميلة) دي هو سندها قوتو حبة .. إنو ولدو العرفو عمرو كلو مات خلّاهو ماقادر يستوعب إنو بت شنو الح يفتشها هسه لكن عايز بس يسكت (جميلة) دي حبة..

قال ليها: "أنا عارف موت الولد حار حاسي بيك والله.. إنتي قايلاني ساكت لأنني ماحاسي؟ يا(جميلة) ده ولدي.. أقول شنو أنا طيب غير ياالله ياالله ياالله .." وقعد يجعّر..

أها قامت من رقدتها تسكتو..

الناس ديل ح يواصلو كدة ربنا يربط على قلبهم بس ..
خلوهم وتعالو ل(سعدية) المشت ل(فاطمة) بعد التلفون ده..
(سعدية) وصلت ودقت الباب.. فتحت ليها (سحر)..
أول ماشافتها قالت ليها: "الجابك شنو؟" ..

قالت ليها: "عايزة أمك"..

قالت ليها: "أمي ما عايزة تشوفك"..

(سعدية) قالت في روحها "سبحان الله شوف الفرق!! ديك قالت لي إتفضلني

وجابت العصير و دي طردتني"..

حاجة (فاطمة) واقفة قصاد الباب جنب الراكوبة طلعت من المطبخ شايلة ليها

مفراكة كانت بتقرُّك في ثلج .. كوركت ليها: "يا (سحر) ده منو؟"..

(سحر) ماسكة الباب بيدها إتلفتت على أمها: "دي الممرضة الكُجّ ديك"..

حاجة (فاطمة) كوركت: "عيب يابت... دخلها.. أهلا تتفضل"..

(سحر) دخلتها وقالت ليها: "يا أمي الزولة دي أعلمي حسابك مابتجيب ليها

خبر كويس"..

(سعدية) قلبها إنقبض لأنها صحي ماجايبه خبر كويس..

المهم دخلت.. حق الله بقّ الله..

"(سليمة) أصبحت كيف"..

(سحر) قعدت معاهم ماقامت تجيب موية زرقا زاتو..

وحاجة (فاطمة) ما قالت ليها جيبني شي..

ها أخذو ليهم صنة كدة..

قالت ليها حاجة (فاطمة): "خير!!"..

قالت ليها: "والله موصية ليك"..

قالت ليها: "منو الموصيك؟" ..

قالت ليها: "وصوني أكلمك (أريد) مات" ..

حاجة (فاطمة) الاسم طقش أضانها قبل كدة بس ما عرفتو ..

قالت ليها: "(أريد) منو؟" ..

(سحر) بهنا بقت تقول: "(أريد)؟ أخوي مات؟" ..

حاجة (فاطمة) عاينت لبتها وعاينت لـ(سعدية) ..

(سعدية) قالت ليها: "ده اسم الولد البدلتو مع بتك" ..

وتعالو شوفو (سحر) دخلت في دور كواريك وبكا لمت ناس الحلة .. جو

جاريين ..

حاجة (فاطمة) تسكت فيها: "يا بت أسكتي عرفتي ليهو شنو عشان تقولي

أخوك؟!!" ..

وقالت لـ(سعدية): "هوي الوصتك دي قولي ليها ده حق الناس .. ولو هي

عايزة تقول عايزة بتي مابديها ليها لو بالبوليس" ..

ناس الحلة الجو بكواريك (سحر) - والجارّي توبو بالواطة لسة ما لبسو زي

الناس .. واللّطش فردة سفنجة خدرا والثانية زرقا والجا جاري حفيان .. ديل

نفس ناس الحلة المامشو المستشفى ديلاك بس الشمار بتاع الكواريك لكن!!

- حاجة (فاطمة) قالت ليهم: "ده زميلها في الجامعة .. جابو ليها خبرو هسه" ..

شكوها ليك "البركة فيكم" .. ومشو يَمَصِّصو في شفائهم "تشيبيبيبيبي أجي يا الزميلها وتجعر!!! أجي أجي!! بري نبرا من جنس ده" ..
إلا (سكينة) أم (حسام) ال مسكت (فاطمة) بالجنبه قالت ليها: "ده شنو؟ مالها البت يا (فاطمة)؟" ..

(سكينة) صاحبته عاد من زماناً قديم ورضعت ليها (سليمة) دي كان .. وهي عايزة تفضفض غلبها عدييل .. قامت حكّت ليها المختصر ..

سكينة عاينت ل(سعدية) القاعدة وبراسها أشرت وقالت ليها: "و دي منو؟" ..
قالت ليها: "دي ممرضة قالت بدلت بتي مع ود ناس تانيين وللا ولدي مع بتهم زاتي ماعارفة" ..

الكلام ده واقفين جنب الحيطه هم .. و (سحر) قال (سعدية) حاضناها بتسكت فيها ..

(سكينة) زحّت من الحيطه و جات قومت (سعدية) قالت ليها: "هووي قومي ما عندك قعاد هنا .. إنتي عشان لقيتهم ناس طبيين ماشة وجاية شايفاك !!! .. تاني لو عتبتني هنا بقطع ليك أنا دي؛ كراعاك .. وما عندنا زول للبدل .. هدوم

هي وللا عدّة؟؟ أجي يابدل الناس كمان!!؟ إتلومتني والله!! قومي أطلعي
..!!

(سكينة) لزلزت (سعدية) لحد خشم الباب وفتحنتو ولزتها لزة أخيرة مرقّتا برة
وقفلت الباب تزاااااا ح كجك وجات راجعة لحاجة (فاطنة): "هوي يا (فاطنة)
ياختي البنية بتك حلاة الدنيا عليها.. منغولية وللا جن أحمر ياها بتك
التعبتي فيها!! أووووعك وأوعك وتاني أوعك تبدليها.. أجي يا البدل!! جنتي
إنتي يا بت أمي وللا قال مالك؟؟ زي ذيل أصلاً ما بتدخليهم بيتك زاتو!! ديل
ناس عشان القرش في يدهم قايلين الفانية دي حقتهم وقايلين روحهم إشترو
الناس.. أسمعني كلامي كويس وخُتِيهو حلقة في أضانك.. مادايرة ليكي
الكعب براك عارفاني بريدك كيفن... و بتك دي عندي ود أختي شغال مع
ناس (شارع الحوادث) وبعرف لي كم زول في (صدقات) وهن غلبت حيلة
بتصرفو لي هم .. المهم بكلمو و بكلم هو البعرفهم وبإذن الواحد الأحد بتك
بتتعالج.. سامعاني؟ .. وسمعت قالو في ناس كدي جو من بلدأ ما بعرفها
قالو بدقو ليهم خيمة.. المهم البت بتتعالج.. أصلو الله ماشق حنكأ خلاه..
والشافها الزمن ده كولوووووو بشوفها لقدام.. أرحم منك بيها وألطف.. بس
خني الرحمن في قلبك.. وأووووعك تاني أسمع عشان بتي تتعالج وللا الكلام
الفارغ ده .. لا جنيتي والله يابت أمي إنتي.. سامعاني وللا كلامي ده ما فات
أضانك لسه؟؟" ..

حاجة (فاطنة) تبكي وتنتهف وتتمخّث في طرف جلابيتها حتّة الرقبة جازاها
لفوق كدي على وشها. والمفراكة قبيبييل رموها في الواطة..

قالت ليها: "سامعاني ياخّتي؟" ..

قالت ليها: "أوووووم" ..

قبّلت علي (سحر) - القال رقدت في السرير منهارة وتبكي - قالت ليها:
"وانتي كمان؛ عيب منك الكلام ده قومي غسلي وشك ده.. والولد مات الله
يرحمو.. شي ببكيك ماف الا لو شيتاً ما بنعرفو !! .. أمك وأبوك مستورين
عمرهم كله ماتجي تفضحيهم في الحلة بي بكاك يقولو كمان لاقّة مع الولد..
هسه أنا بلفّ على نسوان الحلة بقول أمو صاحبة أمك من زمان وللا من
حلّتم الزمان وللا من أهلكم غايتمو زي ماتجي بقول .. المهم والولد كان
عيان وانتي عشان طيبة وجعك.. لكن مابتعرفي ليهو شي ولا زميلك ولا شي..
قومي من هنا غسلي وشك ده قلت!!" ..

بالله الحاجة دي حسمت الفوضى دي كلها في ثانيتين وحالتها ماعارفة
التفاصيل كلها .. عفيت منها.. طبعاً (سحر) لمن (سكينة) قالت ليها "إلا لو
شيتاً ما بنعرفو" الدموع دي بالله بلفّ واتقل في ثانية بعد كانت عشرة عشرة
وقفت تماماً وقلبها بقى يضرب.. واتذكرت يوم وصلها داك .. هي زاتها

بتبكي ليه ماعارفة.. غايتهو كذااااا لو قالت عشان هو أخوها.. لأنو صحي
عرفت لحوّتو شنو.. لكن النصيببيحة وجعها والله الولد!!!..

الزّمان: بعد سنة من الحصل الفات ده كلو لأنو لو تابعناهم يوم بيوم ما ح
نخلص ولّا شنو؟

المكان: بيت حاج (أحمد)

الحدث: عرس (سليمة) و(جاد الكريم)

الفاتنا في السنة دي إنو:

(سكينة) فعلاً كلّمت ود أختها الكّلم ناس (شارع الحوادث) - ما قلنا إنهم
ظريفين الناس ديل؟ - الدخّلوها في لسته كدة مع واحدة من الفرق الطبيّة -
الفيها دكتور ألماني متخصص للحالات دي - البتجي زيارة ديك .. اللسته
فيها خمسة حالات تانية عمليات قلب .. الفريق الطّبي ناصب خيمتو وقاعد
يشوف الحالات بس كمان العملية محتاجة حنّة معّمة فالكويس إنو مستشفى
القلب أصلاً بقت فاضية.. فيستقبلو الحالات في خيمتهم و بعد أمشي وأجيك
ودخول كم واسطة كدة أدّوهم غرفة عمليات فالااضية شاش مافيها.. ياخ لمبة
نور مافيها لامين جابوها هم!! في مستشفى القلب..

ده ما موضوعنا طبعاً ..

البهمنّا إئو يوم العملية جات (جميلة) وقلدت (فاطمة) وقالت ليها: "أعفي لي..ولو بنقبلي أجي أشوفها كلو مرة تكوني ماقصرتي معاي" ..

الحصل بعد إنهارها داك وبكاها أخذت ليها ثلاثة شهور كدة متجرسة.. (سعيد) وقف معاها جد وإتكلم معاها كتيبيير إئو "بت ناس ربّوها وتعبو فيها ما بشيلها ولا شي لكن بساعدها" .. وهو واحدة من الواسطات القلناها فوق لمن عرف إئو في عملية ح تتعمل وإئو القائمة طويبييلة وإئو كُتار منتظرين الفريق الطّبي ده .. إندخل بدون زول يعرف .. إندخل مع إئو ماكان محتاج لأنو حالة (سلمية) حرجة ودخلت القائمة أصلاً بس تدخلو ده جا بفايدة في حنة غرفة العمليات الفى المستشفى القلنا فاضية إئو يشيلوها ناس الفريق الطبي بسرعة وبدون إجراءات كثيرة..

مرتو كان مشت براها ل(فاطمة) بعد الثلاثة شهور ما تمت وراقت حبة و (سعيد) أفنعا إئو ممكن تثبّي ليها طفل .. ويسافرو أي بلد برة ويجو راجعين بيهو يقولو ولدتو (جميلة)..

وقدّ كان..

اها قبل ما تسافر بطفلها ده جات ل(فاطمة) وإتكلمو إتكلمو كتيبيير وفي النهاية إتعافو غير التعافي حق يوم العملية ده..

وقالت ليها: "بكلم (سعيد) تدخل اللسة وللا يتصرف .. ولو غلبو ممكن نسوقها نعملها ليها في أي بلد" ..

حاجة (فاطنة) أبتُ عديبييل وقالت بتها دي أصلو ما تتعالج بقروشهم..
ركبت راسها عديل.. وقالت ليها: "الجنيات البتعرُفم (سكينة) ديل مشكورين
بالحيل وما بوعدو ساكتُ .. في النهاية ح تتعمل عملية (سليمة) .. متأكدة
الله بشوفها أنا و ح تتسهلُ" ..

الثلاثة شهر دي زاتها حاج (أحمد) عداها بقنُع في (فاطنة) إتو ده قدر وإنو
تستحمل وإنو الناس ديل زاتهم هسه بكونو موجوعين وإتو لقدام ممكن
يفتسّوهم وين ويزوروهم ويعزّوهم..

(سعدية) طلعت من ناس (فاطمة) بعد الطردة اليوم داك على بيت (جميلة)
ولحد الأربعين عاملة الدرب ساساقة ماشة جاية .. تقوم وتقع مع (جميلة)
التقول أختها .. بعد الأربعين طوالي (جميلة) أدتها شنطة كدي مستنقة قروش
وقالت ليها: "شكراً ليك بس ما عايزة أشوفك تاني.. (سعيد) وعرف .. والولد
ومات .. والبب وأهلها عرفو.. ما عايزة أشوفك ولا أسمع صوتك ولا ألافيك
ولا حتى صدفة في شارع" ..

ولمن (سعدية) جات راجعة بعد شهرين لـ(جميلة) - قالت تتلايق فيها لأنو
عايزة تهذّ البيت وتعملو عقد.. قالت الزولة دي بقى قلبها رهيف ممكن أقول
ليها مساعدة لدار الأيتام وصدقة ليك وتصدق - لقت البيت مشمّع والراجل
المحرّسنو البيت قال ليها: "الناس دي مسافرة وما معروف يرجعو متين" ..
فكّكت دريهم بعد داك ..

(سليمة) عملت عملية القلب.. وأخذت زمنها وإتعاقت..

و زي ما قلنا جات (جميلة) وحضرت العملية و لحد ما (سليمة) طلعت البيت وعملو الكرامة و (سعيد) جاب عجل ضبحوهو حتن سافرت ..
أخذت ستة شهور وجات راجعة شايلة ليها طفل قالت ولدتو عمر سبعة شهور ..
طفل عمرو شهرين .. فرحانة بيهو وشغالة تقول "ربنا عوّضني" ..

(سليمة) بعد العملية (جاد الكريم) هو القايم وقاعد معاهم وهو الشايل وبخُت معاهم وهو البجري يجيب الأدوية ..

لحد ماتمت شهور نقاهتها وجا لحاج (أحمد) إنو "تتذكر طلبت منك (سليمة) كان؟ ماعايز حاجة منكم أنا ولا تحضير ولاقومة وقعدة .. إنت عمي ونحن أهل .. إنتو العايزنو بسويوهو وطلباتكم وطلبات (سليمة) في راسي من فوق" ..
عاد (جاد الكريم) كان جايب معاهو أعمامو ثلاثة أولاد عم أبوه ..
في قعدتُم دي حاج (أحمد) قال ليهو: "ياولدي أنا لمن أناسبك بناسب راجل ..
و زي ماقلت ماكُ غريب .. ود أخوي إنت و زي ولدي غلاوتك والله .. بس
بسأل البنيّة هسه وأرد ليك" ..

قال ليهو "بسألها هسه" لأنو عارفها ح توافق هو ..

اهاااا (سليمة) سألوها وبقت منزلة راسها في الواطة مبتسمة.. وفجأة كدة قامت قلدت أبوها شديبييد وباستو في راسو.. وجرت لأمها قلدتا وقالت ليها:
"أمي أنا فرحانة" ..

أمها قالداها ومدمعة .. قالت: "يا حاج ما تراكا شايفها فرحانة قول ليهم موافقين .. أيوووووووييي يوووي يوووووي" .. زغردت طوالي مآدتو فرصة يقول شي ..

رجع للرجال لقاهم بباركو لبعض ولا إنتظروهو زاتو .. ووقعو مباركة فيهو ..
ونقرأ الفاتحة .. والعقد متين ..

الليلة عرسهم .. عرس (جاد الكريم) البواصل يعلم في (سليمة) سنين بدون مايقول ده تعليم وبدون ما يشوف وشها المدور وبدون ما يحس انها منغولية ..
شايف بس روحها روح الطفلة البريئة وشايف أيامو سعيدة كيف ح تكون ..
عرس (سليمة) عندها متلازمة داوون لكن قلبها يسع الناس كلهم البحبها
والبكرها .. المبتسمة دايمًا بدون ماتعرف يعني شنو حقد وللا كراهية ..

الحكاية الثانية

دنيا

"١"

(ياسر) بحب (أمنية) من سنة أولى جامعة..

كلمها عديل: "أنا زول بريدك كدة بس .. وعايذك إنتي .. وغيرك ماف بت
بتبقى مرتي" ..

(أمنية) عاشت مع (ياسر) تفاصيل يومو ممّا يصحى ويتسوّك ويجي
الجامعة.. تنتظرو متيين يجي بس..

حاج (اسماعيل) أبو (ياسر) ده زولاً دُغري عدليل.. بس عرساتو دي جات
كلها بعد (ياسر) في الجامعة..
أُمهم حاجة (آمنة) زولة مسكينة وفي حالها..

حاجة (آمنة) لَمَنْ جاها حاج (اسماعيل) قال ليها: "عايز أعرس" .. دخلت في النار ومرقت .. كل القالتو: "عديلة عليك" ..

قال ليها: "أرملة وأولادها ثلاثة عايز أكسب ثواب" ..
سكتت مسافة وقالت ليهو: "الثواب ما إلا بالعرس!!" ..
قال ليها: "ده رأيي و وزيتك" ..

جاب المَرّة وعيالها وسكّنم في أوضة حاجة (آمنة) ..
وحاجة (آمنة) طلعت من أوضتها وبقت قاعدة في البرنده ..
قال ليها: "عشان عايز أبني ليك جديد" ..

ما قالت ليهو شي غير: "الله يسهلها عليك .. ويرزقك من عنده" .. وبقت تعالين لأولادها وأولاد ضررتها .. تطبخ وتكنس وتتصّف وتأكّل وتشرب ..

لَمَنْ جا يعرّس المرة الثانية؛ (ياسر) وقف ليهو قال ليهو: "ح نطلع من البرنده وللا شنو؟" ..

قال ليهو: "لالا .. دي بي بيتها عايزة السترة" ..

(ياسر) العرستين كان بطلع من البيت يمشي يبيت عند صاحبو ..

المهم عمكم (اسماعيلين) - زي ما بنادوهو أصحابو ومرتو مرة مرة - عرس وما اشتغل بإحتجاج (ياسر) الكان بصوت عالي ولا إحتجاج (آمنة) البدون صوت ..

وفجأة كدة ازدهرت أعمالو ورحلو ليهم في بيت طابقين ..

أصلو (آمنة) ما سألتو: "من أين لك هذا ؟!!" ..

لكن بقت ماشة ضعيببييفة وممصوصة.. تصحى الصباح ما بين الشاي وتحضير الشفّع للمدارس والنضافة والغسيل والجري .. لحد ما الناس دي كبرت وبقت ناس كبيرة ..

(ياسر) يجي طالع يقول ليها: "أدعي لي" ..

أختو (ياسمين) تبوس يدها وهي ساكتة ..

غايتو لمن (ياسر) دخل الجامعة حاج (اسماعيلين) كان إسمو يلعلع كدة وصاحب شركة .. أها لمن لاقى (أمنية) لاقاها وهو زولاً مقننل عاد ..

يوم نتيجة إمتحان الشهادة الثانوية حاجة (آمنة) و(سميرة) مرة (اسماعيلين) الثانية وأولادهم قاعدين وبحضرو في النتيجة .. لمن ما ذاعو (ياسمين) (سميرة) قعدت تضحك كدة .. أي زول متوقع (ياسمين) تتذاع ناس المدرسة وناس الحي وناس البيت ..

(سميرة) شالت تلفونها بعد الإذاعة خلّصت و مرقت الحوش .. ضربت لواحد قريبها في الوزارة عشان يديها نتيجة ولدها .. ما ولدها وبِت ضرّتها الاتنين ممتحنين السنة دي !!! .. بعد شويتين الزغاريد ماتديك الدرب.. ولدها (الفتاح) نجح وجاب ٨٨٪ .. وجات وقفت جنب السلم تزغرد.. كانت خايفاهو ماينجح نجاحاً كدي تزغرد ليهو ..

(ياسمين) دي تبكي فُدرتًا إنو ماذاعوها وأمها حاضناها مسالفة كان قام جا (ياسر) قَوْمها وقال ليها: "أصلو ماتبكي يعني شنو ماذاعوك!!" .. وطلعو يشوفو النتيجة في المدرسة..

(ياسمين) من خشم الباب إتلمّو فيها بنات المدرسة المِفَنَقَلات عيونهم والأستاذات مخلوعات ويشيلو ويقولو ليها: "والله إتوقعناك تتداعي.. كيف يعني ماذاعوك؟" .. وقفت هي ماعارفة ترد زاتو .. قام (ياسر) ساقًا من يدها ودخل مكتب المديرية..

أها أدّتهم النتيجة..

(ياسمين) جاوية ٩٣٪ .. (ياسر) قعد يكورك وشالًا من الأرض وبيكي ويحضن فيها... قال ليها: "فرقتي بي كسر.. بركة النجحتي .. أرح نفرح أمنا" ..

وهم طالعين من المدرسة؛ في خشم الباب طقشو في أبوهم (اسماعيلين) جايي داخل .. عاين ليهم كداااااااا وأدّا (ياسمين) كف..

حاج (اسماعيلين) كورك فيها.. قال ليها: "مستعجلة تجي تشوفي نتيجتك لشنو؟
ما ساقطة"..

(ياسر) قال ليهو: "يا أبوي دقيقة.. (ياسمين) الأولى حقت المدرسة وحتى
جابت...".

قبل يتم حمّر ليهو (اسماعيلين) قال ليهو: "بتغالطني؟ ذاعوها في الشهادة؟ بالله
الود اليتيم يجيب أحسن منها؟؟!! .. أنا قصرت في شنو؟ .. قدامي عشان
الناس جايين يباركو لأخوكم" ..

(ياسر) فقد منطق.. قال ليهو: "أختي الممتحنة؛ ما عندي أخو ممتحن!!" ..
غابتو طلّعنو كرعينو وجازي أختو في يدو من الكف الجاييهو..

أها وصلو البيت لقو في ناس قاعدين يدقو في صيوان ومرة أبوهم واقفة برة
وتتكلم معاهم: " .. آي عشان تخريج ولدي ده ونجاحو .. ماهو إتخرج من
الثانوي .. عادو وحشاي الناجح الما شال حس أمو وما عمل دعاية لروحو
قال أول الشهادة هو وللا ح يذيعوني .. أيبوووبيي يووووبيي " ..

"٢"

يلَّا (ياسمين) دخلت الجامعة.. كلية طب.. وفي الطب طب الخرطوم!! ..
 الفردة داك ود مَرّة أبوها دخل هندسة .. و ما ح نقول ياتو جامعة عشان
 الناس ماتعرفو خخخخخ (دي ضحكة مكتومة عشن مايسمعونا) .. المهم
 دخل جامعة خاصة وبقي مبلّط.. السنة بسنتين.. أنا غايّتو أشك إنها كانت
 إشاعة من أمّو وإّو ماجاب كم وتمانينو دي بالجد ولا حاجة ..
 المهم..

الوكيت ده وكت (ياسر) لاقى (أمنية) ..

و جد حسّاها "أمنية" جميلة في حياتو إنها تكون ليهو..
 لمنّ طرح ليها مافكر انو حيّاكّلها من وين وللا ح يسكنو وين .. كانت نسمة
 بالارّدة في هجير أيامو.. ياسمينة بتعطر دُنيتو المعفنة.. قدر مايكون عايز
 يستسلم ويشوف ليهو حشيش يشمو وللا ببشربوهو وللا شنو.. المهم.. بتكون
 هي واقفة ليهو.. عاد ما ح نكضب ونقول بتذكّر ربنا دايمًا.. بس لمنّ بشوفها
 ماشة تصلّي بيتذكر إنو ربنا في وبيقعد يدعيهو ..

لمن (ياسر) يصل الجامعة لاوي بوزو بتعرفو (أمنية) في نقاش مع أبوهو..
 ماحصل شافتو منهار بالجد إلا في عرسات أبوهو ويوم نتيجة أختو بتاعة
 الثانوي ..

أبوهم ده زولاً حنين بالحيل كان.. بس بعد عرسو الثالثة والنقلة النوعية
 حصلت دي بقى جافي شديد من البناء الطابقين والقروش الرز و مرتو البي
 بيتها بقى بياخد شهر وشهرين حتن يجيهم..

حاجة (أمنة) دي لا كلت لا ملت .. لا شكت لا بكت ..

لمن رمضان قرب .. حاجة (أمنة) من بدري متعوده بتعمل الزريعة حقت
 الآبري براها.. قاعدة تلخ وتخلخل فيها.. فجأة كدة.. حست بألم في يدها
 الشمال من صدرها بادي.. الألم إتحول لسكين.. وحاجة (أمنة) وقعت في
 طشت الزريعة..

أها حاجة (أمنة) في وقعتها دي جات داخله (سميرة).. لقتا واقعة عاينت ليها
 كدة وقالت ليها: "أجي يا النوم في الصينية؟ يامرة إنتي كبرتي وعجرتي..
 أجي!! لزومو ده شنو؟" ..

لمن ما ردت عليها.. وقفت قدامها ولقت طشت الزريعة برجلها.. أها حاجه
 (أمنة) وقعت على وشها .. (سميرة) مسالفة تعاين ليها مخلوعة .. في
 خلعتها ديك جات (ياسمين) داخله.. لقت أمها واقعة وقعدت تكورك: "أمي
 مالها؟؟ .. عملتي فيها شنو؟؟" ..

رفعت أمها الأم متلجة وما قدرت تحركها..

جات وقعت ضرب في (سميرة): "كتلتي أمي عملتي ليها شنو" ..

وبتكورك كدة؛ الجيران إنلّمو .. غايئو خُمّني خُمّك ودّوها المستشفى ..

(سميرة) بهنا بعد إنتهت المعمعة بالنسبة ليها.. بقت خاتّة يدها في قلبها ..

نادت بتّها .. قالت ليها: "تعالى هنا.. تحفظي كلامي البقولو ده كويبييس" ..

وبعد ما حفظت بتّها ضربت لراجلها بتكورك.. نظام هايجة وزعلانة: "أأأأأأ

ولدك الهارينى بيهو ولدي ولدي ولدي يضحك على بتي ويعرسها عُرّفي؟

ولدك القلت لي دي أختو يعاين لي أختو!! .. وكمان أمشي بزعلتي عشان

أكلّم أمو تقوم تقع لي وتعمل فيها ميتة؟؟ هوووي يا (اسماعيل) أنا الكلام ده

ماينفع معاي.. ولدك يعمل في بتي كدة ليه؟" ..

(اسماعيل) بهناك: "يا ولية ده كلام شنو؟! .. كدي اصبري لامن أجيك ..

ياخ (ياسر) ده بعرفو ياخ .. أنا أعمل كدة لكن هو لا .. شنو؟؟ قلتي

لد(آمنة) شنو؟؟ (سميرة) علي بالطلاق تلاتة (آمنة) يحصل ليها شي إلّا

تلحقها" ..

كَجَكْ قفل الخط ..

أها ضرب عمك (اسماعيل) لد(ياسر).. سألو من أمو ..

(ياسر) ما عارف الحاصل شنو .. ماكلّموهو باللخمة بتاعة المستشفى..
أختو زاتها ما وعّت لروحها إلا لَمّن (ياسر) ضرب ليها لقاها بتبكي
وشابكاهو: "أحيي أمي يا (ياسر)" ..
"إنتو وين" ..

"نحن في المستشفى" ..

وَصَّفَكَ وَصَّفَكَ قام جاهم .. لَمّن وصل أختو بتبكي لَمّن بهناك ولقى أبوهو
وصل قبلهيو بحبة كدة لأتو ضرب ل (ياسمين) لَمّن لقي ولدو ماعارف ..
أبوهو حضنو ويبيكي..

- "يا أخوانا أمي مالها؟؟" ..

- أبوهو قال ليهو: "البقاء لله" ..

ما ح ندخل كثير في حنة البكاء.. لأنو دنيّت الأولاد ديل إنقلبت فوقاني
تحتاني.. ركيزة البيت وشيالة الهموم مشت.. زولة خاتين إنها قاعدة طوالي
كدة وماعايزين شي غير يشمو ريحتا في البيت.. غايتهو كانت أيام مافي زول
منهم ولا (اسماعيل) عارفا عدّت كيف..

(ياسر) قام على حيلو قال ليهو: "يا أبوي أقسم بالله (سماهر) دي لو كتلتني عديل ما بعرسالها.. خليهو كف.. ياخ دي مرّو عليها الشعب السوداني كلو .. أستغفر الله يارب" .. و سلّم لأبوه في راسو.. ومسكو من يدّو قال ليهو: "يا أبوي إنت ما واثق في تربيتك وللا شنو؟؟ ياخ أنا ولدك ياخ.. معقولة بس أعمل كدة .. والله والله والله ما عارفها طويلة وللا قصيرة يا أبوي .. وماف بت ناس لعبت بيها ولا بلعب بينات الناس كمان لدرجة تقول لي حملتنه يا أبوي!!" ..

عمك (اسماعيل) وشّو أدا على كم لون و(ياسر) بتكلم وتتل يدّو من ولدو بعد (ياسر) خلّص..

قال ليهو: "هووووي يا ولد (أمونة) كلمتي وقتها" ..
قال ليهو: "يا حاج (اسماعيل) أنا ود (أمونة) بالحيل؛ ما نبذة دي.. ربنا يرحمها أمي الرّيت وشالت وختت.. بس (سماهر) دي ما عندي ليها بلحة" ..
وظلع من الصالون محل كانوا قاعدين في الطابق الأرضي بيتكلمو ..
ظلع من أبوهو مشى ظلع السلم و كَرُو كَرُو دق باب شقة "الأستاذة (سماهر)" .. من تحت الأب سمعو طوالي ظلع وراهو.. الباب لمن فتحتو (سماهر) قبضها ليك (ياسر) من شعيراتها وبقا يكورك ويدق فيها: "أنا يا .. ((معانا شُفّع فقطعنا النبذ)) .. أنا عايزاني أعرسك يا ((نبذ تاني قطعناهو))" ..

.. لكن هسه أنا براي كدة أقول يا منو .. أحبيي يا أمي.. أمشي وين وأقبل
وين أنا" ..

وهي بتتكلم كدة نطت مع صوت (ياسر) قال ليها: " (ياسمين) بنقولي في شنو
براك؟؟" ..

إنفصت كدة ورجفت.. وبقت تبكي زيادة وهي قالدة صورة أمها و تنوي
ماشة وجاية زي ناس الخلوة .. بقت تهز في راسها يمين شمال: "لا لا أمي
ماتت.. لا لا ماف هي" ..

أها ده وكيت عمك (اسماعيل) ضرب التلفون ووقع ووردلأب..

(ياسر) جرى علي أبوهو وبكورك: "أبوي أبوي" .. ويهز فيهو ولمن ما رد
عليهو شالو وطلع بيهو وداهو الحوادث ..

(ياسمين) هنا قاعدة في واطاتا ديك وتتهز في هززانها ..

جات نازلة (سميرة) بعد مسافة وتتلقت .. لقتا تتهز .. قالت ليها: "أبوك
وين؟" ..

ما ردت.. شائلة صورة أمها وتتهز..

أدتها شلوت قالت ليها: "ردي علي يا السجمانة.. حيوانة إنتي وللا شنو؟ نفو
عليك .. طاالبيب بوريك" ..

مشت شالت ليها مبخر سلك قاعد تحت طربيزة قريب للحيطه كدج وجات
خنتو جنب وش (ياسمين) برضو ما عبرت..

قالت ليها: "ما بتخافي يعني؟!!" ..

قامت كسحتو فيها برضو ماعملت حاجة (ياسمين).. عايزة تخوفا قال..
والنار بدت تمسك في هدم البنية دي - نفسي أفهم فهمها كان شنو وهي
بتعمل في كدة غايتو الجن بتداوى كعب شيهو - ..

هنا (سميرة) بدت تخاف ..

قعدت تقول: "بسم الله الرحمن الرحيم البت دي مالها" ..

جاية مليانة زعلة هي وكانت غالباً ح تولّع في الأب بس الله مرقو .. اها لمن
للقت البت لا بتتحرك لا بتكورك لا بتزُد؛ قعدت تكورك: "الحقوني يا ناس
..الحقوني" .. لمن ناس الحلة كسرو باب الشارع و جو .. لقو في شعلة نار
في رايمم بتتهز ماشة وجاية و(سميرة) عاملة فيها مصدومة .. يعنى حتى
موية ماكشحتا في البت.. ولا لحاف زاتو ماشالتو رمتو فيها .. بركة في
كواريكا العملتا دي بخوفتها دي ..

شافت ناس الحلة وقعدت تقول: "شفتو المجنونة دقتني!! ودقت بتي!!
وولعت في روحها النار قالت ماشة لأمها" ..

غايتو ناس الحلة الشال ملاية السرير والخم ليهو مرتبة ووقعوها في (ياسمين)
طفو النار..

في نص اللّخمة والكواريك والهيصة دي وقفت عربية باجيرو مظلة قدام بيت ناس حاجة (آمنة) .. فتح القزاز السوق ..

سأل واحد من الملمومين قدام الباب: "ده بيت حاج (اسماعيل)؟؟" .. وقبل يردّ الواحد ده عليه واصل: "ياريت تناديهو لي" ..

قال ليهو: "حاج (اسماعيل) ده ودّوهو الحواث .. وبتّو هسه ملحقّتها ليهو" ..

الباجيرو فوّووو فحطّت ..

أها (سميرة) بي جوة خلّت الناس دي إنقرتكت من لمتّا وطلعت شقتها .. قاعدة تتكلم مع (سماهر): "أسمعيني كويس .. (خالد) السجم ده مش كان كاتب ورقة؟" ..

قالت ليها: "آي يا أمي وإنتي شاهدة" ..

قالت ليها: "جيبها أديني ليها" ..

شالتّا منها خنتّها في صدرها جوة و ربّنت عليها قالت ليها: "لامن نشوف صرفة للموضوع ده" ..

(سماهر) قالت ليها: "يا أمي ما خلاث الداية وضبطت؛ تاني شنو؟" ..

قالت ليها: "أسكتي ساي البيت ده لو ما كتبو لي ما أبقى أنا (سميرة)" ..

(سماهر) قالت ليها: "يا أمي بيت شنو هسه؟ علاقتو شنو ب(خالد) وللا بالنحن فيهو ده؟ كتلتي (خالد) وقعدتي!!" ..

أمها حمّرت ليها قالت ليها: "كتلو يومو هوي يا بت .. والبيت عندو علاقة بس ده ما وقتو الكلام ده" ..

قالت ليها: "لا .. قبل يموت كلمني .. كان بايت معاي إنتي مامتذكرة وللا شنو؟ .. قال قبل يجيني إنتي شربتيهوه عصير في خشم الباب وطلعتي بعد كدة .. والعصير بعد شربو وحلقو قفل وجريت ودّيتو المستشفى قالو لي شرب صبغة وقيدوها إنتحار" ..

جرّتها ليك (سميرة) من شعرها قالت ليها: "حسّك عينك تقولي الكلام ده لزول فاهمة ولا ما فاهمة؟ صبغة شنو البشربها ليهو المسلوع الشّمّام .. ده من الشّي البشربو كان" ..

(سماهر) قعدت تبكي قالت ليها: "إنتي وكِثّ ما عايزاني أعرسو ليه عملتي كدة فيني؟" ..

(سميرة) قالت ليها: "هوي صبغة شنو البشربها لامن يجيك بكرعينو كمان .. و دي ياتو مستشفى دي؟؟ .. أكان ما كنت معاكم !! .. وشلناهو جدعناهو سوا ..!!"

(سماهر) سكتت كدّااا وسرحت قالت ليها: "لا ده ما (خالد) .. ده (قاسم)" ..

أمها خبطت صدرها قالت ليها: "(قاسم) بتعرفيهو من وين يا الشقية؟" ..

قالت ليها: "يا أمي (قاسم) لمن عرستيهو إنتي أنا كنت صغيرة آآي؛ لكن واعية .. وعارفك عملتي كدة" ..

قالت ليها: "(قاسم) كان عندو المرض الكعب شرب الصبغة براهو قال عايز يرتاح .. أما إرتحتي كدة؟" ..

قالت ليها: "برضو إنتي كتلتي (خالد) .. انتي الخليتيهو يدمن" ...

(سميرة) إستغفرت مسافة بعد سبّت في سرّها للبت الغيبانة ال ح توديهها في ستين داهية في يوم دي وقالت ليها بعد داك: "ده ما وكثو هسه .. ركزي معاي و أحفظي الكلام القلناهو: (ياسمين) دقّنا وولّعت في روحها .. فهمتي؟" ..

قالت ليها: "آآي" .. - (سميرة) دي ح يجيها شلل كان لو واصلو حوار الطرشان ده تاني خمسة دقائق كدة .. و (سماهر) دي طاشة بصورة غريبة من السم البقعت مُدْمناهو ده ..

يللا الماقلناهو إنو (خالد) ده خاطب (سماهر) من قبل سنة كدة .. وليهو فترة أمها بثُخّت ليهو مخدرات في العصير وللا الشاي كل مايزورهم .. لحد ماأدمن .. بقت بتسحب منو شي وشويات من جنيه بقت ملايين بس للمرة الواحدة .. ومرة في عزّ سطلتو خلّو يكتب ورقتو دي على بتها عشان قالت لقدام ممكن توريها لراجلها و السترة والفضيحة متباريات ..

فيقوم قريبها العرسها ل(اسماعيل) ده يدفع قروش وتغنى لجنا الجنا. ولمن قريبها ده مات قالت برضو تخلي الورقة لأنو ح تحتاجها أكيد وهو زاتو الولد مامقطوع من شدة وعندو أهل بتصرفو يدفعو عاد تجار والسمعة الطيبة أهم شيء ...

مافكرت في القصة دي في بتها دي ولا في إنو منظرها ولاشي.. لو فكرت من الأول ما ح تخلي بتها زانااتها تتعاطى عشان بس تقدر تلفّ زي ماهي عايذة وبتها ما تصحى.. أصلاً ولدها (الفتاح) قاعد مع أصحابو من زمن وساكن مع أهل أبوهو أكثر من إنو بجي زاتو في البيت ده مما أمو عرست..

والمافلناهو إئو (قاسم) ده هو راجل (سميرة) الثاني كان عيان فترة ومات.. كلام (سماهر) ده هو الإشاعات الكانت بتتردد في حلتهم إئو أمها قتلت الزول ده بصبغة عشان تقدر تعرس تاني ..

"٤"

أها بهناك في المستشفى أولاد الحلال من ناس الحلة الخمو (ياسمين) ضريو ل(ياسر) إئو أختك في المستشفى .. و إتقسمو معاهو جزء بقي مع أبوهو وجزء مع أختو ..

غايَوتو مرّت ساعات علي (ياسر) ده زي السواد ..

ضربت ليهو (أمنية) قلبها حسّ إنو في مصيبة وكان قابضها.. لا عرف يحكي ليها وهو موجوع ولا يقول ليها كدي خَلّيني هسه.. الخلاصة بتاعة التلفون إنّو جاتو بَقَت قاعدة مع (ياسمين) .. لحد ما يشوفو نهاية الحروق والجوطة حصلت دي شنو ..

أها الباجيرو - حَقَّتنا القبيبييل ديك تتذكروها؟! - وقفت ودخلت المستشفى وفي ثانيه الناس بقو يتجارو والرُكَب تتخَابت .. شي لله ياالباجيرو!! سرّها باع الظاهر!! .. المهم ...

واحدة صغيرة كدة وسمحة سماحة السّواد .. صفرا ولابسة نظارة شمس وبنظلون إسكيني وهي عمر تسعة وعشرين كدة تسعة وعشرين الآ ثلاثة دقائق كدة .. دخلت ع الحتة الراقد فيها (اسماعيل).. ومسكت يدّو وبقت تدردقها في وشّها وتبكي: "بي بي ماي قود Baby , OH! My God! الحصول ليك إيه؟؟" ..

(ياسر) واقف جنب السرير كان بالجهة اللي جوة ديك؛ يعاين ليها لمن غلبو قال ليها: "أبوي ما معروف يحصل ليهو شنو لهسه" ..
وقفت على حيلها وهي لسة ماسكة يد "بيبيها" قالت ليهو: "إنت (ياسر)؟" ..
قال ليها: "أبوة" ..

قالت ليهو: "أنا (سلمى) .. (اسماعيل) اتصل عليّ قبل يقع وقال هو تعبان .. حتى مشيت بيتكم لقيتكم جبتوهو هنا" ..

قال ليها: "مرحب" .. ما كترها من كدة .. عاد الموضوع بيبي ونضارة شمس وهو مافاضي ليهو الصراحة هسه ..

جا الدكتور جرو نادوهو مخصوووووص والغريبة إنو لقوهو سريع وجابوهو سريبيع خااالص خااالص !! .. أهأاااا وقعت ليك إنجليزي معاهو صرّ ..

(سلمى) دي طلعت دكتورة مخ وأعصاب حسب ما قالت للدكتور ..

بعد الدكتور مشى قالت لـ(ياسر): "لازم أسفرو بس ما هسه لأنو نو واي No way Now" .. قال ليها: "كويس!! تحت أمرك .. سفريهو طوالي .. بس إنتي منو!!!" ..

قالت ليهو: "أنا زوجتو" ..

(ياسر) صنّ مسأافة كدا قال ليها: "إنتي زوجتو؟ وقال مالك متزوجة راجل نسوان؟" ..

قالت ليهو: "قصة طويلة" ..

قال ليها: "ما عندي شي .. أمي ماتت وأختي إتحرفت وأبوي في غيبوبة؛ أحكي" ..

قالت ليهو: "طيب نطلع برة" ..

وقفو في الممر وبدت تحكي ليهو.. هو بسمع بنص عقل و بنص أضان و نص بال وهي بتحكي بتفصيل قالت إختصرت حالتو ..

قالت ليهو: "أنا قرريت في إنجلترا .. وبابا شغلو هنا كان ماشي كويس .. دخل في كم قرض وما إتسهلت و(اسماعيل) كان صاحبو من بدري.. حسب ما فهمت.. وقف معاهو.. وحتى عرس بت عم بابا عشان يستر عليها لأنها جابت لينا الكلام .. قصدي (سميرة).. أظن ساكنة معاكم .. المهم بعد داك دخلو في تجارة كسبتم دهب زي ما قالو " ..

قام (ياسر) شكلو الله فتح عليه بنص فهم كدة أخير عدمو ففجأة قاطعها وقال ليها خاطر الجاهو لمحة كدة: "قصدك رقيق؟ وللا مخدرات" ..

قالت ليهو: "جست ليسن Just Listen .. الإنتين مع بعض .. المهم!! أمورهم مشت حلو .. وفي يوم شافني وقال لبابا إنو "عايز يخطبني لولدو" .. بابا كان واخذ كم كاس بصراحة فقال ليهو "لا نلعب؛ وإذا ظبّطت تتجوزها إنت" ..

قال ليهو: "أوك" .. لعبو لعبتهم وبابا خسر .. لما جا وقت الجد و (اسماعيل) لقي بابا مصرّ قال ليهو: "بس أنا زول كبير وبأولادي" .. بابا قال ليهو: "وبنتي أرملة" .. أنا كنت متجوزة واحد أستاذنا في الجامعة و هي واز أ درنك مان He was a drunk man وإتوفي في حادث.. وعندي بت عندها ثقب في القلب بتعالج في إنقلاند كانت وإتوفت " ..

"ما ح اطول عليك بس في النهاية القسمة.. حسيتو ممكن يصوني ويصون حق بابا بدون ما يطمع فيه .. وأنا بصراحة كنت نسيت موضوع الرجال ده خالص وعرفت من كمية مواقف ان الطمعانيين فيا كتار"..

(ياسر) سمعها كدا أول ماخلصت قبل ع الحيطه وإستفرغ .. في كمية من طُمام البطن في التفاصيل الحكتها الزولة دي غريبة بالنسبة ليهو.. بشرب وبلعب وقمار ونسوان وعرس بصورة مافهمها.. حسّ بس إتو مرات أحسن زاتو الزول مايعرف التفاصيل عن زول قريب ليهو عشان يفضل كبير في عينو وصورتو سمحة.. مافهم أي شئ ومافكر أول ما خلّصت زاتو.. بس حسّ إتو بطنو قلبت..

(سلمى) لمن إستفرغ وجنب حيطه كمان بالجهة الثانية في ليها عيانين راقدين ومستشفى وكمان أداها ثقة كدة جنب الحيطه بعد الإستفراغ ده وهي في نص كلامها كدة ؛ قامت عاينت ليهو بقرف ومشت خلتو ..

(ياسر) واقف مسافة تاكل يدو في الحيطه وأدا الإستفراغ ده كثة تراب كدة بكراعو حتّن بدأ يستوعب .. هسه دي بت عم (سميرة)؟ وأبوهو معرس إثنين تيببت خالص ((سحبنا النبذة القالها)) من عيلة واحدة قال مالو؟؟ هو (سميرة) عرفو ليها شنو لمن كمان جابت ليها بيبي وانقلاند وانا وانت وناس يااااي؟؟ طيب أمو حاجة (آمنة) اليعيبها أبوهو في حرف!! .. وفجأة كدة إندكر أختو

دي قالت (خالد) و إئو هو ح يلحقو طيب (خالد) الهنا ده منو كمان ؟ ..
 وجاهو خاطر إئو الزولة دي ممكن تكون عارفة الزول ده منو .. ليه مابعرف
 جاهو خاطر ده .. قام جرى وراها .. لقاها ركبت الباجيرو .. جرى وجرى
 لمن لحقًا.. بس ماوقفت ليهو .. عاد الباجيرو مظلة وعيون البت زاتها مظلة
 بنضارتها ديك يلحق ليها شنو ؟!!..

اها جا راجع لأبوهو .. فتش جيوب أبوهو للموبايل ما لقاهاو .. قال الزولة
 دي أكيد نمرتها مسجلنا في الاتصال السريع زي نمرتو هو وأختو .. ولأئو
 خم أبوهو بهدومو زي ماهو والمستشفى رقدوهو بنفس ذات الهدوم؛ إفتكر إئو
 ممكن يلقي الموبايل ده ..

لمن ما لقاهاو طلع برة نادى واحد من ناس الحلة الجو معاهو .. ولد عمرو
 كدة .. و براجع معاهو مرة مرة شيتات إمتحاناتو .. المهم علاقتهم سمحة كدة
 ممكن نقول فزد من النوع البلقاهو في الحارة داك ..

وخلاهاو قاعد مع أبوهو وقال ليهو: "ماشى البيت بس أجيب لي غيار
 وقروش وجايي راجع .. إنتظرنى معاهو لو فتح كلمنى .. بس ما بتأخر" ..
 وشال كريعاتو في راسو ورجع البيت ما هو لازم يفهم (خالد) ده منو..
 الموضوع تجارة عبيد وذهب أبيض وبنفسجي ومخدرات و إحساسو بقول ليهو
 (خالد) ده خاشي في الرصة دي.. بس ماعارف ليه .. وكمان صحي لازم
 غيار وقروش ..

"ه"

لمن (ياسر) وصل البيت لقا الناس إنْفَرَّتْكَت.. ولقا الموبايل مجدوع تحت السلم .. شالو وضرب آخر رقم.. مش هي قالت ليهو إتو أبوهو ضرب ليها تلفون قبل مايقع؟ معناتو آخر رقم - الود ده زكي خالص!! - قام جاهو الصوت لما بَعَبَاهو: "بيبي؟"

قال ليها: "أنا (ياسر)؛ عايز أسالك (خالد) ده منو؟.."

قالت ليهو: "(خالد)؟! عرفتو من وين؟.."

قال ليها: "سمعت الاسم وقلت إنتي ال ح تديني الزيت وأفهم ده منو.."

قالت ليهو: "غريبة!! سمعت الاسم؟! طيب (خالد) ده أخوي الكبير إتوفي.."

ورغم شمارها الارتفع السما بس ماسألتنو تاني عرفتو من وين ..

(ياسر) ده طشّ عديل.. قال ليها: "طيب علاقتو شنو بأيّ زول من ناس

بيتنا الهنا؟ لو أختي لو بت (سميرة)؟ .. عندك فكرة؟؟.."

قالت ليهو: "أيوه .. هو كان خاطب (سماهر)" ..

هنا هو الشمارو يرتفع الصراحة لأنو أصلاً خاتّي إحتمال ١٪ ما تعرفو أو

تعمل رايحة فقال ليها: "طيب مات كيف؟.."

قالت ليهو: "لقوهو مرمي جنب كوم زبالة كدة .. وبعد التشريح واتصلو بينا من تلفونو وقصة طويلة كدة ماأعتقد عندك ليها بال حالياً؛ ما عرفوهو هو مات مقتول وللا إنتحر لأنو هو أصلاً كان مدمن" ..

غايئو إستغفر وإتحوقل وإتحسبن و أي حاجة بدون يشعر وشكرها بعد داك وقفل منها .. ختّ التلفون وطلع السلم ل(سميرة)..

دقّ الباب فتحت ليهو (سماهر)..

قال ليها: "(خالد) ده شنو؟" .. خلعا في صمّت خشمًا ..

الماقلناهو وحقو نقولو عشان ماننسي إئو ناس الحلة لمن إتلمو بكواريك (سميرة) قبيل وبعد ما طلعت وصت بتها جاتها جارتها سألتها من خبر (ياسمين) و (اسماعيل) و هي إتهجمت لأنها ماكانت عارفاهو وقع وخمّوهو قبل بتو بشوية..

اها نرجع لجماعتنا دليل ..

(سماهر) خنتّ يدها في خشمها بخلعة و قالت ليهو: "ما عارفة" ..

قال ليها: "يابت الناس أنا عيلتي كلها ح تموت بسببك إنتي وأمك !! أفهم بس إنتو عايزين شنو بس منننا؟؟" ..

سكنتت ساااايي.. قام واصل: "غايئو لو موضوعكم القروش وماشبعنو منها لسة عايز أقول ليك كلام .. والله قرش أحمر ما تلقوهو؛ وأبوي ده رغم

البتعملو فيهو إنتي وأمك ما ح يموت عشان إنتو ترتاحو ولا شئ .. أقصرو الشر وأبعدو مننا ياخ" ..

مع صوتو العِلا ده جات (سميرة) جارية من جوة - بي شيئاً كدي مابعرفو هُنْ بلوزة هُنْ تي شيرت قالت لابساهاو فستان!!- ؛ قالت ليهو: "هوي إنت مش طردوك؟؟ يقرُشُ حلقومك .. القروش حقتنا والبيت حقنا .. أبوك مات وللاحي ما بهمنا كثير و أطلع برة بلا عامل لي فيها عنتر" ..

خأصت كلاما كدة وهو دمّو فار أداها ليك كف ظابط لمن عمل صوت المسلسلات داك ..

قال ليها: "إتلمّي كدي أول حاجة وأمشي إتستري ألبسي ليك شي بدل عدم الهدوم الإنتي فيهو ده .. وأقول ليك كلام؛ لحد هنا وقلة أدبك دي إكتفيت منها لو إنتي لو بتك وعارف قصة عرس أنا ومخدراتك الشغالة فيها دي وما أستبعد زاتو (خالد) ده تكونو كتلتوهو إنتو !! .. ناس عينها التراب مايملها نفو عليك وعلى بتك وعلى تريايتكم زاتو .. ده بيتي أبوي يطردني يخليني ما حاجة بتخُصكُ ولا ليك حق تتدّخلي وولا تطردي حتى!! عندك ساعة واحدة بس أفاك برة البيت ده إنتي وبتك .. والبيت الواجعك ده ومفكرة إنو بتطردي فيني منو أحب أقول ليك إنو بإسمي يا سيدة" ..

قالت ليهو: "كذاب البيت بيع وشرا حقي" ..

قال ليها: "هاهاها يا أم حق!! ماعرفتك والله بحقي دي !! عايني أنا ردي النسوان ده مابعرف ليهو ولا عندي زمن لسخف وكلام فاضي .. تزويرك ده ما بمشي معاي البيت مسجل في المكتب العقاري من قبل ما نسكن فيهو بإسمي.. وأقول ليك شي أطلعني هسه بهدومك دي برة" ..

(ياسر) ده دمّو فار وأصلاً هو فاير وغلطان بالحيل إئو يجيهم زانو وللاً يتكلم معاهم هسه بالمصيبة اللي هو فيها لكن مافكر كثير قبل يدق الباب ويطلع ليهم ويكورك ويرد.. لا أسلوبو لا تربيتو لا أخلاقو.. إذا في زول بعرفو شافو كان إتخلع عديل فيهو بالحاصل ده..

المهم.. قال كلامو ده وقام جرّ ليك (سميرة) من يدها هي و(سماهر) .. كركرهم ليك لحد الشارع بقوة غريبة كدة رغم الشلايت الموجّهة من (سميرة) وحيل (سماهر) الميت وهو بجرّجّر فيهم؛ وقفل الباب طالخالخ ..

(سميرة) بتدق في الباب زي المجنونة ولاااا إشتغل بيها..

طلع شقتها وبقي يقلّب في الحاجات .. غايتو الود ده ركبو عفريت عديل .. بعد شوية عندو صاحبو شغال في الأمن ضرب ليهو قال ليهو: "تجيني هسه.. ومعاك بوكس .. عندي بلاغ بحيازة مخدرات" .. مع إئو عمرو ما لجأ لصاحبو ده ومرات كثيرة بتشاكلو إئو ياخ خلي الأمن وتعال نفتح لنا محل نبيع فيهو ترمس إن شاء الله.. الزول ده التجارة ماشة في دمّو..

وصاحبو ده هو شايف إنو شغلانتو دي ما بتشبهو ولا شئ لأسباب كثيرة ما ح نقولها هنا عشان مانقلبها سياسة..

المهم البوكس لمن جا لقا ليك (سميرة) وبتّها منقّنين في الواطة .. والغريبة ناس الحلة مامدو راسهم يعاينو أظنهم فترو من كلو شوية كواريك من الناس ديل ..

أول ما شافت البوكس قامت على حيلها ووقفت قدّامو نظام هي الوّقفتو وكدة ماخّنت في بالها جابيّتها مخصوص..
اها قالت ليهم: "بركة الجيتو عايزة أفتح بلاغ .."

عاد ناس الأمن وللا الشرطة عمماً ما بغبوها وبتقول إنّها بتعرف بكاسيهم دي بي نمرّ المافي دي من بين ألف زايد صاحب (ياسر) زاتو كان معاهم .. فقالو ليها: "إحنا ما ناس البلاغات لكن !!". صاحب (ياسر) أشّر لواحد من النطو من البوكس فقام داك وقف قصاد الأم وبتّها.. رهي الرجفبية مسكتها والنقة النقة واللّهة .. والباقيين التلبو من البوكس دخلو لقو ليك أكوام مخدرات داساها (سميرة).. كان (ياسر) في فرزعتو القبيل ديك كومها جاهزة ليهم .. الكويس كومها بطرف ملاية لفّ يدو فيها وكلمهم بكدة.. الود ده ينفع يشتغل مخابرات عديل وللا المحقق كونان بالعملو الليلة ده .. اهااا الجماعة رفعو البصمات وجو طالعين كلّبشوها هي وبتّها..

طبعاً الموضوع ما من إختصاص أمن الدولة بس صاحب (ياسر) إتصرف مع ناسو بتاعين المخدرات وبقت قضية.. أصلاً ليهم فترة عايزين يقبضو راس من العيلة دي..

"٦"

(ياسر) بعد داك طلع رجع المستشفى.. الود ده الليلة بعد ما ح نشغلو محقق حقو يلحقوهو بكباية سكر وليمون تقيل كدة لأنو حالتو صعبة بي اللف اللقاهو ده ..

اهااااا مشى أول شي لـ(أمنية) الخلاها مع أختو ديك .. حسّ إنو زي العايز يقيف في محراب كدة ويعترف ليها وللا يجدهم تحت كرعينها عايز يرتاح بس كدة .. قام حكي ليها الحاصل كيت وكيت وكيت..

قال ليها: "يا بت الناس أنا ما بنفحك أنا زول مطموس وأهو عيلتي كلها ملوثة .. ووصمة ح تبقى عمري كلو في راسي كدة ده.. ده الأختو إنتحرت وللا ده الأختو الجنّت وللا مامعروف زاتو يطلعو عليها شنو .. ولو إتعرف موضوع أبوي وغالباً ح يتعرف نفس القصة .. أنا تعبان يا (أمنية) تعبااان والله تعبان !! ياالله بس !! .. فبقول ليك أنا ما بقدر أربطك معاي.. ف إنتي شوفي

البستاهلك وعيشي حياتك وأفرحي وأدعي لي بس بعد تعفي لي.. عليك الله
بس ماتدعي عليّ" ..

(أمنية) قعدت تبكي: " (ياسر) إنت مش حياتي بس .. إنت نبضات قلبي
إنت زمني الجايي .. لو إنت ملوٲ الطاهر منو؟؟ .. أنا ما بقدر أعيش وإنت
ماف .. ماتقول لي كلامك ده .. أنا بدعي ليك قبل أدعي لروحي لأنك
روحي زاتها فكيف تقول أدعي عليك !!!؟؟ .. ذنك شنو إنت عشان تجلد
نفسك بسياط المجتمع؟ وأصلاً مالك ومال المجتمع؟؟ ح يتكلمو ويقولو الناس
أصلها ما بتریح" ..

وهي بتتكلم كدة (ياسمين) فتحت ..

سبحان الله رغم النار الولعت فيها دي؛ (ياسمين) حروقها من الدرجة الثانية ..
بقت تعالين ليدينها الملفوفات بشاش وتقول: "أمي مشت وين؟ أمي وينها؟
كانت قبل شوية هنا شايلة راسها أنا وراقدة في كراعي هي" ..

(ياسر) قال ليها: "حمدا لله ع السلامة حبييتي .. روقي حبة وماتتكلمي" ..

قعدت تبكي: "أمي وين؟" ..

وواصلت تنق بنفس الجملة مسالفة .. (ياسر) كورك بصوت عالي: "أمي
ماتت يا (ياسمين) .. ماتت" .. عاينت ليهو وقالت: "كذاب أمي كانت هنا
قبل شوية" ..

(ياسر) عايز يتكلم قامت (أمنية) طلّعتو بره قالت ليهو: "ياخ (ياسمين) دي

منهارة و محتاجة دكتور نفسي" ..

قال ليها: "أختي مجنونة يعني؟" ..

قالت ليهو: "ياخ إنت متعلم خليت شنو للناس الجهلة؟؟ .. الزولة دي عندها

إنهيار ظاهر عليها يا (ياسر) .. كدي إستغفر وأمشي لأبوك .. أنا بعرف

زولة كويسة قريبتني بشوفها تجي تطمّنا عليها" ..

(ياسر) وقف مسالفة يعاين ل(أمنية) وفجأة كدة في نص المنظر ده قال

ليها: "بحبك والله بحبك ياخ" .. خلاها دنقرت تحت وما ردّت ومشى لأبوهو ..

لقا عنود (سلمى) .. تبكي وتتكلّم معاهو غايتو التركواز يخلوهو ليها .. بلوزة

حريير تركواز وإسكيرت أصفر ما يخلص .. وصندل باللونين ..

لمن شافت (ياسر) قالت ليهو: "ده شنو العملتو في (سميرة) ده؟" ..

قال ليها: "لازم تتأدّب كان" ..

قالت ليهو: "هي مره أبوك .. إنت ناسي؟" ..

قال ليها: "هي الناسية" ..

قالت ليهو: "أنا كَلَمْتَك قلت ليك أبوك عرّسها عشان يستر عليها" ..

قال ليها: "بس هي سترت ع نفسها؟" ..

سكتت وقعدت تبكي في صمت ..

عاد بكا الناس ديل ما زي بكاي جَعِير و عاااااااااا .. ده بكا دموع بس
وماف تفوووووط المخاتة طوالي بِقُشُوها بمنديل أزرق عاد ..

المهم عاين ليها كدة قال ليها: "غريبة إنك بتحبي زول قدر أبوك خليك من
تعرسيهو!!" ..

قالت ليهو: "أنا مع أبوك حسيت إنني بئو وحببيتو وأي حاجة ممكن تتخليها..
بقدر ما دلعني بقدر ما إحترمني .. أنا ما ح أنسى أصلو يوم بتي ماتت
عمل معاي شنو .. ولا يوم أخوي إتوفى هنا وتحقيقات وجوطة" ..
قال ليها: "البركة فيكم" ..

قالت ليهو: "أخوي إنت بتعرفو أظن.. (خالد) خطيب (سماهر)" ..

نطط عيونو: "كيف يعني خطيب (سماهر) هو أخوك!!!" ..

قالت ليهو: "والله أهو الحصل.. أبوك حنين وقلبو واسع للناس كلها.. وقف
معاي ومع بابا في جوطة التشريح عشان لقوهو مرمي جنب زباله وعرفو من
الفحوصات الجنائية إنو مدمن" ..

سكتت مسافة كدة قالت ليهو: "(ياسر) أنا ربنا عوضني ب (اسماعيل)
(عمر) عن كل حزني اللي فات وأيامي السودا اللي شفنتها مع جوزي
الأولاني .. عوضني بحنانو عن حزن باب الحرمي منو سفري وشغلو هو
قبلها .. وعوضني ربنا ب (عمر) من أبوك على بتي الاتوقّت .. بعيداً عن
سؤالك يا (ياسر) أخوك (عمر) قطعة منك" ..

(ياسر) إبتكّم عديبييل .. قدر ده ما بعرف شي عن أبوهو؟ عندو أخو وما سمع بيهو؟

قالت ليهو: "بالمناسبة ما كل قروش أبوك من تجارتو مع بابا .. عندو قروش دخل بيها بورصة ويقول دي حلال .. دي البقدر إكّل منها (أمنة) هو قال .. مش مامتك اسمها (أمنة)؟" ..

قال ليها: "رينا يرحمها" ..

سكنت وبقت تعالين لأبوهو..بعد شوية قعدت على رُكبًا وشالت يدو تبوسها وتقول: "بليز أرجع لي.. طيب لو ما عشاني عشان (ياسمين) و(ياسر)؛ خليك من (عمر).. يا رب خليّهو ليهم.. أنا ما عايزاهو أنا عندي منو حتّة تذكرني بيهو.. بس عشان أولادو ديل.. يارب" ..

أها.. اليد الماسكاها قبضتًا حبة ..

قالت: "بيبي إنت سامعني؟" ..

ما ردّ ..

عاينت لِقْتو لِسّة مغمّض ..

(ياسر) ده عُصّة وقفت ليهو في حلقو .. طلع مشى المقابر لأمو .. قعد جنب القبر في التراب وختّ يدو محل راسها ويمسح في التراب.. حكي ليها

عن (أمنية).. حكي ليها إنو بحبها قدر شنو .. إنها نسمة في عز الصيف ..
إنها سحابة عز الهجير ..

حكي ليها إنها بتشبهها بيسمتها بضحكتها بمشيتها.. حكي ليها إنو نفسو كان
يحضنها - أمه - قبل تموت .. لفّ يدينو حول نفسو وضّم ركبتيه ليهو
وقال ليها: "كدة يا أمي.. عايزك تحضنيني كدة يا أمي .. تمسكيني زي أنا
شافع صغير وتلملميني جوّة حجرك كدة .. أنا تعبان يا أمي" ..
وختّ راسو جنبها ورقد نام ..

(ياسر) صحا المغرب ع الآذان و جوطة ناس جنازة ..
قام صلّى معاهم.. دفنو الميّت جنب أمو .. فرق القبرين من بعض ما يمرر
كديسة خليك من بني آدم ..
قال ليها: "شفتي يمّة؟ جابو زول يونسك .. عارفك ما بتزعلي في الضيق.."
تاني ختّ يدو جنب التراب وباس حتة التراب جنب الراس ..
ناس الجنازة الجو شبكوهو "إستغفر إستغفر.. لا إله الا الله" ..
وقوموهو "أقرأ الفاتحة يا ود الحلال وأدعي" ..

قرأ الفاتحة و ناجاها: "يمّة أنا حكيت ليك سرّي .. بس ما عارف منو ممكن
يدعي لي بعد ده يسهّلها عليك ويفتحها في وشك .. يمّة (ياسمين) محتاجاك

ومحتاجة دعواتك زي واحد .. قابضة صورتك جواها ومنتظراك .. لو بتقدري
تجيبها حلم تعالي يمكن تظمن بيبك" ..

"٧"

(ياسر) رجع بي دَرَبو داك المستشفى .. دخل لأختو .. لقاها بتعاين بعيبيد ..
لمن شافتو ابتسمت ..

قالت ليهو: "أمي جانتني قالت لي ح تسوقني معاها عشان ما أقعد براي ..
عارف .. أمي قالت ح تجيني ما ح تخليني براي وقالت ليك لازم تعرس
(أمنية) .. قالت ليك ما تزعل يا (ياسر) عشان ح أمشي معاها لأنها
مبسوطة .. قالت ليك هديتك وصلتها وما تقطعها منها .. قالت ليك إنت
حبيبها وأكد الله ما بنسالك" ..

(ياسر) ده دمعو رِبْ رِبْ نزلت ..

قالت ليهو: "أمي قالت لو إنت بكيت أحضنك وأقول ليك الحضن ده منها ..
تعال يا (ياسر)" ..

في اللحظة بتاعة الحضن دي - ما حُضْنَا كدي يقولو عليهو بالحروق حَقَّتَا
دي بس برضو حضنًا - تلفون (ياسر) ضرب فتحو لقاها (أمنية) ..

سألنوه: "(ياسمين) كيف؟" ..

قالت ليهو إنَّها كلمت قريبتها وشافنا وأدنا حبوب إكتئاب ولو بقبل يعالجوها
حتعالجها..

قال ليها: "أي شي بس ترجع زي ماكانت" ..

(ياسمين) بتسمع فيهو مبتسمة.. بعد خلص مدت يدها بحبوب قالت ليهو:
"في دكتور أدتني ديل أنا عملت إني أخذتهم بس ختيتهم تحت لساني.. أصلاً
بعد ده ماف شي منتظراهو غير رحمة ربنا.. تقدر تسندني أتيمم؟ لأنني ما ح
أقدر أتوضأ عايضة أصلي" ..

سندها نص سنده لأتو أي حركة وجعتا في الأول .. بعد شوية إقترح إنو
ييممها هو فوق راس لفات الشاش دي.. المهم صلّت راقدة ..

قالت ليهو: "شغل لي قرآن وأمشي شوف أبوي .. سمعت (أمنية) بتتكلم" ..

(ياسر) عمل زي ما قالت ليهو وطلع وقف جنب باب العنبر يعاين ليها قبل
يمشي. قلبو واجعو إنو ماعارف يعمل شنو ... مرّ دكتور قام سألو منها..

قال ليهو: "سليمة إن شاء الله.. حروق متوسطة وح تطلع بإذن الله" ..

قلبو قابضو تبّ (ياسر) بس بقي يستغفر وهو ماشي ع أبوهو..

أها اليوم داك بات مع أبوهو في المستشفى .. يصلح القسطرة كل شوية ..
يقلبو بجاي لجاي عشان ما تحصل تقرحات لقدام ..

إتكلم معاهو حكي ليهو الفي قلبو كلو.. حكي ليهو العرفو من (سلمى)..

أذن الصبح قام صلّى و جا رقد جنب أبوهو في الأرض ..

غايتو (ياسر) ده إلا يستحمّ بديتول بعد ده ..

أها زي الساعة تمانية صباحا كدة جا الدكتور ..

(ياسر) صحا بيهو .. قال ليهو: "المشكلة ماعارفين الغيبوية سببها شنو لحد

هسه .. فأنا في رأيي نطلّعو لأتو مرحلة الخطر إتجاوزها بس ما عندنا حاجة

نقدمها زياده" ..

قال ليهو: "طيب لو عايز أسقرو برة" ..

قال ليهو: "ما ينفع .. و أصلاً ما ح يقدمو حاجة .. ده الإم آر أي

والمقطعية رسّلمهم لأي حتة برة وشوف رأيهم شنو وبعد داك نتفاهم .. ح

تحتاج غالباً ممرضة .. بعرف لي زولة كويسة ممكن تجيك كم ساعة في

اليوم لو عندك إستطاعة" ..

قال ليهو: "ما مشكلة" ..

أها جات داخلة (سلمى) في عزّ كلامهم ده .. سلّمك سلّمك ل (ياسر) أرطنك

أرطنك مع الدكتور وشافت الصور ..

قعدت في طرف السرير الفيهو (اسماعيل) راقد ..

قالت ليهو: "بيبي أنا عارفة إنك سامعني .. طيب بليز أرجع لي .. طيب

عشان (ياسر) البتخلف بيهو وبتقول أبوك يا (ياسر)" ..

بعد داك سكتو مسالفة لا هي قالت شي لا (ياسر) القاعد في الواطة قال شي..

قالت ليهو: " (ياسر) أنا ح أفضل هنا .. أمشي إستحمّ و غير هدومك وتعال" ..

قال ليها: "ما ماشي حنة.. خليني" ..

قالت ليهو: "عشان تقدر تراعي أبوك بجد لازم تساعد نفسك عشان تقدر تساعدو .. إنت آخر مرة أكلت متين؟" ..
ما ردّ عليها ..

قامت طلعت وجات بعد نص ساعة شايلة سندوتشات قالت ليهو: "عشانو هو اَكُلْ ..

قال ليها: "إنتي مفروض تكوني هنا؟" ..

قالت ليهو: "فاهماك أنا" .. - غايثو أنا مافهمت لكن هي فهمت قالت - و قعدت تضحك فجأة كدة .. عاد ضحكة الناس ديل ما هاهاهاهياااا..
ضحكتهم بسمة كدة مابعرف كيف لكن لونها وردي زي لون القلوس العاملاهو .. وضحكة حزن الناس ديل عاملة كدة زي نقطة الندى حقة الصباح ديك في وش وردة سميببيحة كدي ..

قالت ليهو: "عارف حاجة؟ رينا زي ما بدّي الزول حاجات بياخذ منو قصاها.. أنا قروش بابا كلها عارفاها جاية من وين.. إتعودت ع نوعية حياة معينة.. ما عرفت أكل براي من قروشي إلا بعد إشتغلت .. نجي للجد؟ دي دعاوي الناس.. عارف لمن ناس أولادهم يدمنو وهم في ربيع شبابهم؟ ويفقدوهم.. أهو ديل بدعو ع الزول الورايم السكة.. الدعوة بتلف ويتصل بابا"..

قال ليها: "طيب أهو ده إنتي زولة واعية وفاهمة ومتعلمة ومتدينة كمان.. طيب مالك؟ أبوك ده ماتهديهو"..

أها الإبتسامة الوردية اختفت.. قالت ليهو: "أبوي إتوفى"..

(ياسر) قعد يضحك.. قال ليها: "أقسم بالله كل ما أشوفك بحس إنني عايش في نعمة.. الحمد لله.. عارفة لو ما إنتي كان زحلقتَ أظنّ لي.. ياخ إنتي والله ما عارف أقول ليك شنو!!".. سكتت شوية قال ليها: "آسف"..

قالت ليهو: "لا لا عادي الضغط الإنت فيهو يخليك تضحك إتس أوكي.. يلا أكل"..

(ياسر) دفن راسو جوة الساندوتش ما عرفو كرعين ضب وللا ريسين صرصار؛ المهم أكلو.. قام ع حيلو قال ليها: "آسف تاني أنا ح أمشي البيت أغير وأجيب لأبوي غيار وأجيك"..

قالت ليهو: "تيك يور تايم Take Your time أنا جبت ليهو غيار معايا ح
أحميّهو و أغير ليهو.. إنت لو قدرت تتوم بكون تمام" ..

المهم (ياسر) إْتَفَكْكَ ..

رجع البيت بقى ليهو صاتي وفاالضي.. إستحمّ وقال يرقد حبة .. ما صحّاهو
إلا التلفون الساعة حداشر بالليل .. فتحو لقاها (سلمى) قالت ليهو: "آسفة
إني صحيتك تقدر تجي عشان لازم أرجع؟؟" ..
صوتها كان مخنوق ..

قال ليها: "أبوة جايي.. بس مالك صوتك كدة؟"

قالت ليهو: "ولدي (عمر) تعبان شوية كدة" ..

قال ليها: "ح أجي امشي معاك" ..

قالت ليهو: "لا .. تعال جنب أبوك يمكن يصحا ولازم يلقا زول جنبو" ..
أها قايم كدة.. تلفونو ضرب..

(أمنية) .. ما قالت ألو .. قالت ليهو: "بتتكلم مع منو كنت؟؟" ..

أوتوماتكلي رد قال ليها: "(سلمى)" ..

إتفتحت فيهو: "(ياسر) إنت عايز تسييني عشان (سلمى).. أصلاً تطلع شنو
وعرفتها متين؟ .. وكمان بتتكلم معاها بالليل يا (ياسر) وأنا أضرب ليك من
قبيل وما ترد علي!! .. حرام عليك والله حرام عليك" ..

وسكتت عرفها بتبكي .. قعد يضحك ..

قال ليها: " (أمنية) قولي بسم الله (سلمى) دي مرّة أبوي ياخ .. ولدها عيان وأنا كنت نايم والله صحيت هسه .. (أمنية) إنتي أمنية قلبي بدعو بيها ربي كل يوم بعد ما يقول يا مقلب القلوب والأبصار تثبت قلبي علي دينك بقول و كمان حبّ (أمنية) .. (أمنية) أنا لمن أتقلب وأفتش لحرفي الوسط بلقاهاو أول حرف عندك وأقول خلاص ما مشكلة ما أنا حرفي الأولاني في وسط حروفك .. لمن أتقلب زيادة وأغمض عيوني بلقائك تحت جفوني وأنا قافل عليك بقول دي مرتي نامت هنا ما مشيت بعيد مني" ..

سكت كدا حساها تشققت دميعاتها .. قالت ليهو: "أنا بس بتنفسك" ..

قال ليها: "عارف" ..

قالت ليهو: "سغيل ههههه .. (ياسمين) كيف؟"

قال ليها: "والله ماعارف .. هسه ماشي عليها" ..

قالت ليهو: "معاها منو طيب؟" ..

قال ليها: "رينا" ..

حست إتو وحيد شدييد .. قالت ليهو: "أسفة والله" ..

المهم ما ح نقول باقي التلفون كان فيهو شنو لأنو كان كلام دُقاق دُقاق دُقاق

والدنيا ليل ورمضان وعيب مننا وللا شنو؟ خخخخخ ..

"٨"

أها لَقَطَ كَرِيَعَاتُو (ياسر) ومشى ل(ياسمين) لقاها مِقْنِيرَة وتعاين في الحيطه
والقرآن شغال ..

لَمَن جا قالت ليهو: "ياسر) حبيبي أنا تعال" ..
قعد جنبها ..

قالت ليهو: "عارف إنتو إتو (سميرة) هي الحرقنتي؛ صاح؟" ..
نطط عيونو .. هو طبعاً لا عارف لاشي تتذكرو؟ ..

قالت ليهو: "أنا ما متذكرة بس أمي كلمنتي" ..

سكت (ياسر) قال بدت تَرْهَلْ وللا شنو !!؟ .. وإنبسط من روجو لحظياً كدة
إنو كان قال ل (سميرة) إنتو ح نقتلونا والكلام داك ..

قال ليها: "طيب ما تزعلي روحك .. حتاخذ جزاها" ..

قالت ليهو: "عارفاك ما مصدقني بس أسألاً وبعد تتأكد منها كلما إتني عفيت
ليها .. بكرة ح أكون ماف .. عايزاك ما تنسى تلقني في القبر طيب؟ لأنني ح
أكون براي" ..

(ياسر) حضنها قال ليها: "ياسمين) ما براك إنتي .. أنا معاك" ..

قالت ليهو: "لا لا إنت ما معاي .. لسة قدامك مشوار .. المهم أنا عايزة
أندفن قريب لأمي لو قدرت؛ لو ما قدرت ما مشكلة.. (سميرة) لازم تسألها ما
تنسى.. ما عساني لكن عشان عيالك لقدام ما يتوصمو إنو عمتهم مجنونة..
حاضر يا (ياسر)؟" ..

قال ليها: "حاضر .. كدي إنتي نومي" ..

قالت ليهو: "دقيقة أنا عايزاك تدي حاجة (عوضية) ست الشاي خمسمية جنيه
حق آخر شاي شربتو عندها في الجامعة ما تنسى طيب؟ وصاحبتي (مها)
استلقت منها كان خمسة ألف حقت تصوير كتب.. وموبايلي خليهو معاك ما
تبعو لأنو مليون صور مع أمي .. طيب؟" ..

(ياسر) بسمع و بيكي..

قال ليها: "حاضر ح أعمل كدة .. بس إنتي إرتاحي وما تتعبي نفسك" ..

رقدًا في رجليو وقعد يقرأ ليها قرآن لامن غمضت ..

(ياسر) رقدًا من رجليو في السرير و باسها في راسها .. وطلع ..

أول ما وصل باب العنبر جاء راجع ..

قال الشهادتين بدون ما يشعر جنب راسها وطلع يقشّش في دمعو ..

ياخ حسّ إنو الدنيا ضاقت بيهو عديل ..

مشى لأبوهو لقاهاو حمّو (سلمى) و لبستو ديك يا العلا الله ومغطياهو

بتوب سرتي؛ عمك عريس بس .. ودقنو مخلوقة ..

(ياسر) اتَّقَن في الواطة في حطة أمبارح وضمّ رجلينو لصدرو بيدينو وقعد
يستغفر يستغفر .. بعد شوية قام إتوضأ وصلّى .. بكى فُدرتو في الصلاة..
حسّ إنو براهو .. إشتكى لربنا إنو ما بستحمل و إنو ضعيف..
(ياسر) خلّص صلاة.. عاين لأبوهو وباسو في راسو.. قال برّاحة: "أنا ح
أشوف (ياسمين) وأجيك" .. الولد ده يحنّ بالمساقّة ما بين عناير
المستشفى ..

مشى ل(ياسمين) لقاها نايمة ..
بس .. زي الما شايفها بتتنفس!! ..
وصل جنبها وبينادي (ياسمين) (ياسمين)..
ما ردت..
قام هزّاها كدا..
برضو ما ردت..
كرّعينو برّدو كلّو كلّو ..
قام حضنها ليهو - رغم الحروق البت دي حروقها دي غايتوالله يشوفها -
وبقي يقول: "يا رب يا رب ما تشيلها يا رب أخدني أنا طيب بس ما هي"..
كُح كُح .. (ياسمين) فتّحت عيونها قالت ليهو: " (ياسر) في شنو أنا تعبانة"..
كُح كُح ..

قعد يضحك ويبكي.. ويقول: "يا رب شكراً يا رب شكراً" .. لو دايرين رايبى الود ده ح يَزْحَلِقْ غالباً بعد دقيقتين كدة ..

المهم .. قام رَقْدَها في المخدة.. جايبى يمشي مسكتو ..

قالت ليهو: "ما تتسى الوَصِيئِكُ بيهو طيب؟" ..

قعد يضحك وقال ليهو: "كويس بس نومي .. إنتي ما عايزة تاكلي ياخ؟؟
أعفي لي أنا ما سألتك" ..

قالت ليهو: "لا لا أمي جابت لي قبيل .. شكراً أخوي .. أمشي إنت" ..

عين إتأكد إنو الدِّرِبْ شغال و بقي مارق .. بيفكر "أمي جابت ليهو قبيل
كيف يعني؟ أنا زاتي سخل ما مركز كلو كلو .. الأيام دي كلها لو ما الدِّرِبْ
ما أظنها سَلَكْت .. آآي والله وكمان (أمنية)" ..

أها إتذكر (أمنية) كدي وقلبو بقى يدق ..

إتذكر أول يوم لمن شافها في الجامعة وهو برلوم.. ووقفت قدامو باسكيرتها
الأسود وبلوزتها الكحلية.. يا سلاالم لحد هسه متذكر إنو الجزمة كانت لون
البلوزة وإنو كان محتار الأصابع مشت وين لأنها جزمة في شكل لفة
سمبوكسة ما تمّت!! .. غايتو (ياسر) ده شكلو كان جيعان اليوم داك..
إتذكر يوم كلمها إنك إنتي وبس البقدر أستنشقها وما أزرها .. غايتو إتذكر
حاجات كُتارات وبقى بيتسم براهو ..

ده وجضومها المزلوطات ديل .. عاينت كدااا لأبوهو قالت ليهو: "هو الحاج ده لسة ما إتكَل؟؟" أجَّها جَهَّ جَهْ .. دي مضَعَّة اللُّبَّانة ..
 رفعت طرف أنبوية المعدة بيدها وخلَّتْنا تقع قالت ليهو: "الحالة دي إلا مستر عبد العزيز .."

قال ليها: "ألقاهو وين الزول ده؟؟" ..

قالت ليهو: "أجَّها جَهَّ جَهْ؛ إلا بكرة" .. ومشت خَلَّتو ..

هو عامَّة في ممرضات بحتارو لَمَن يلقو المريض لسة عايش بس الصراحة هي سوَّتْنا حامضة .. بري ما بنسألاً ..!!!!!!

"٩"

(ياسر) ده مساالفة واقف بعد الممرضة إتخرجت ..

غايتو خلعتو جملة ما إتكَل دي قبل أجَّها جَهَّ جَهْ ..

كَجَكْ إتذكر ليك (سلمى) ..

قام ضرب ليها ..

أول ما قالت: "آلو " شبكها ليك: "آسف والله وعارف الوكيت متأخر .. قلت

أسأل من (عمر) .."

قالت ليهو: "الحمد لله حالتو مستقرة هسه.. (سُمعة) بببي كيف؟" ..

قال ليها: "والله في دم نازل من أنبوبة المعدة" ..

قالت ليهو: "دم؟" .. بي خُلعة كدة؛ وسمع ليهو صوت حاجات إتكَسرت
كَتَلُو كَرِشْ ..

قال ليها: "بس السستر طمنتتي" ..

قالت ليهو: "أديني ليها" .. البت دي حلمانة والله.. هي الممرضة مشت
قبببيل فام قال ليها الحقيقة..

قالت ليهو: "أنا بعرف حركاتهم دي .. هي قالت ليك الموضوع إلا يشوفو
ياتو دكتور الصباح؟؟ عبد العزيز وللا عفت؟؟" ..

فتح خشمو كبير قال ليها: "عرفتي كيف؟؟" ..

قالت ليهو: "ده ما وكتو؛ أها قالت ليك عبد العزيز وللا عفت؟؟" ..

قال ليها: "عبد العزيز !!!" ..

قالت ليهو: "ما تتحرك من مكانك .. رَقْدُ أبوك فلات وأنا جاية" ..
وقفلت الخط..

يا زوووول عادُ الواسطة دي والعِلم يا سلالام !! والله سمحات ..

ماف نص ساعة و(ياسر) واقف لسة في مكانو وإلا العجاجة المكوّنة من
المستر والسسترات جات تُلوي من هناك ..

قال ليها: " عندها وصايا ح أعملها ليها وأجي.. لازم أعملها قبل أودّيها
ننذّفين" ..

ياخ (سلمى) دي لو بتعرف تكورك كانت كوركت وقالت: "واااااااااا أنا
وووووب علي" ..

(سلمى) تاني حزننتو شديبيد وتبكي..

لمن فكّتو مشى زي الرجل الآلي ..

مشى لست الشاي ومشى ل(مها) صاحبته ولمن رجع المستشفى وتم
إجراءات ورق شهادة الوفاة.. (ياسر) ده حسّ إئو خلاااااا ما قادر يمشي..

ما قادر يتنفس.. ما قادر يعمل أي شي.. حسّ إئو روجو عالية عليهو ..

فجأة وقع ع رُكبو .. سمع من هناااااا صوت (أمنية) بتكورك ليهو .. بس

(ياسر) ما كان هنا عشان يرد ل(أمنية) .. (أمنية) بتكورك وتضرب في

روحها ومعها أمها وابوها..

(ياسر) لمن إتكلّم مع (أمنية) كان مشى لأبوها عديل وقال ليهو: "أنا ما زول

لفلقة عايز بتك وحدد الوكت العايزو وبجيب أهلي" ..

الأبو كيّفو ليك (ياسر) قال ليهو: "وأنا بشتري راجل.. تمّو قرايتكم وتعال ليها

مرة واحدة.. (أمنية) أمانة في رقبتهك أسألك منها يوم القيامة.. ما تلعب بيها

وأوعك تكسر قلبها وأوعك تفكر تغدر بيها عشان ح تكون غدرت بي أنا..
وأنا عندي البسندني الأقوي منك ومن أبوك.. عندي الله .."

(ياسر) قال ليهو: "يا أبوي الله خاتيهو قدامي قبل أجيك.. ربنا يحفظها مني
قبل يحفظها من الناس.. وليك علي أمان الله القلتو أسوي ليك" ..

أها بعد داك. بقي زول منهم .. الأبو عايز ليهو زول يخلص ليهو شغل
بشوف (ياسر).. الأم عايزة ولدها يودوهو وين ما تعرف ينادو (ياسر).. لكن
كمان ما قدر (ياسر) راقد من عنقريب لعنقريب عندهم.. باب البيت منو ما
بدخل .. جد زولاً حافظ حدودو جتت..

فلمن جو هسة جو لأتهم عادين (ياسر) ده ولدهم .. وكانو جو قبل يومين..
(ياسر) بعد وقعتو ديك (أمنية) وأبوها وأمها بالكواريك لمو الناس.. أدوهو
درب ورقدوهو.. صحا وقال ليهم إكرام (ياسمين) دفنها وقام ع الدفن..

(ياسر) شايل أختو موديهي المقابر ويتكلم معاها.. الناس المعاهو مسكوهو
"وحد الله وحد الله" .. قال: "لا إله إلا الله" ..

قال ليهي لمن ختاها جوة: "ما قادر أخت تراب فيك.. ما قادر.. بس لو سألوك
من ربك قولي هو الله لو سألوك من نبيك قولي محمد.. (ياسمين) يا طلة فرح
مشت مني ليك الله" ..

(ياسر) ما رجع البيت وما عمل عزا .. خلاص إنتهى العزاء بإنتهاء الدفن..
ما قدر يرجع يفتح البيت ويقعد يشيل الفاتحة .. ما فيهو حيل يقوم ويقعد

ويشوف منو الأكل ومنو الشرِّب ومنو الجا ومنو الما جا .. ما فيهو حيل
يفتش الشاي بوين وربطة الجرجير بينها.. (ياسر) رجع المستشفى وحضن
أبوهو الراقد وقعد بيكي ..

في قعدتو ديك وببكي جوهو ناس الحلة العمم آيس كريم بس لأقنَّها..
العكايز تتخابتْ.. النسوان ملفوفات في التياب بس ورقة بفرة ..
المهم..

"يا زول نحن ما عرفنا ليك طريق.. يا زول الكلام ده ما ببقلي لازم تعمل عزا
لأختك .. وأبوك ده نسوانو وبينهم!!! اليقعدو معاهو.. ياخ نحن ديل بنقعد ..
ناس البلد كلمتهم؟" ..

(ياسر) خشمو ما فتحو..

شيلك التلفون حق أبوهو أضرتك أضرتك كلمو الناس لمُوهم..

المهم عملو العزا ناس الحلة.. ومسكوهو من يدو ساقوهو.. قاعد في
الصيوان يسمع ليك الهمسات.. ((آي أختو جنت ولّعت في روحها بعد دقت
مرة أبوها)) ..

بالله زي الضربوهو بسوط قام ع حيلو قال ليهم: "أسمعوني كويس مرّة أبوي
دي مقبوضة في قضية مخدرات وهي الوّعت النار في أختي .. أختي زولة
مؤمنة ما جنت ولا شي .. العندو كلام اليقولو عديل بدل لتحت تحت ده" ..
وظلع من الصيوان ..

الناس بوراهو بقو يتكلمو: "والله العيلة دي كلها ضارية شفتو الولد مشي خلانا في بيت البكا هسه الناس دي تاكل وتشرب من وين .. غااايتو ما بنسألهم دي عيلة يخسي دي .. بركة أهمم الماتت وماسمعت جنس ده" ..

(ياسر) حِزّة ما ضاقت بيهو محل يمشي ما عرف.. لقا روجو وصل المستشفى المغرب.. دخل لأبوهو لقي (سلمى) قاعدة.. قال ليها: "أنا تعبت.. جد تعبت" ..

(سلمى) قالت ليهو: "كدي إستغفر إنت خليت العزا وجيت؟" ..

قال ليها: "أعمل شنو يعني.. تعبت" ..

المهم بتكلمو كدة .. عمك (اسماعيل) صحا.. وسمع اسم بتو..

بعاين ليهم قال ليهو: "(ياسر) ولدي أختك وين؟" ..

"١٠"

(سلمى) دي وقعت ليك فيهو بوس: "بيبي حمدا ع السلامة.. بيبي بركة
الصحيت يا ربي شكراً شكراً يا رب" ..

(ياسر) وقع ليك في أبوهو قَلْدُ: "يا أبوي واه واه واه واه" ..

ويكي بيكي قَدْر ما قَدِر .. أبوهو مخلوع: "في شنو؟ أنا وقعت وجبتوني هنا
متين؟" ..

جا الدكتور لاقِي: "يا حاج إنكتب ليك عمر والله قنعنا منك تماماً حمدا لله ع
السلامة ياخ" .. و أَفْحَصَكُ أَفْحَصَكُ .. جَكَجَكُ جَكَجَكُ ..

المهم .. الساعة واحدة صباحاً قالو ليهو: "ياحاج تنتظر شيفت الصباح
ويطلعوك البيت" ..

(سلمى) قالت ليهو: "تطلع عندي يا بيبي.. بيتك الثاني زحمة الأيام دي" ..
قال ليها: "زحمة كيف يعني؟ (سميرة) وبين إنتو صحي؟ (ياسمين) أبيتو تردو
لي؛ وبين (ياسمين)؟" ..

(سلمى) قالت ليهو: "بيبي إنت مؤمن .. (ياسمين) يعني" .. وسكتت ..

عاين ل(ياسر) .. قال ليهو: "(ياسمين) مالها؟" ..

في كلامهم ده وماعرفو بيوروهو جات من هناك واحدة مُنْقَبَة داخلة " يا
(اسماعيلين) شفت ولدك عمل فينا شنو؟" ..المرّة جاية نص الليل عشان تقول
ليهو ولدك!! ..

نطط عيونو عاد عرفًا من الصوت هو و قال ليها: "(سميرة)؟؟ ده شنو
العاملاهو في روحك ده؟؟" .. ماوقع ليهو نقاب ومرتو ما بتلمّو حسب
العارفو هو..

(ياسر) أشرّ على النقاب وقال ليها: "ده ما حتتو .. و أطلعني برة" ..

اهاااا (اسماعيل) ده ح يشلّو الولد ده أظنو فقال ليهو: "قدامي كمان يا
(ياسر)؟ ما المَحَرِيّة فيك يا ولدي" ..

(ياسر) قال ليهو: "يا أبوي ما عارف حاجة إنت الزولة دي كَتَلت
(ياسمين)" ..

(سميرة) فعدت تكورك: "أنا ما كَتَلتُها .. المجنونة الغبيانة دَقَّتْنا وولّعت في
روحها النار" ..

حاج (اسماعيل) قال ليها: "دَقَّتْكم متين؟ بتقولي في شنو إنتي؟" ..

قالت ليهو: "لمن نزلت إنت منّا" ..

قال ليها: "(ياسمين) كانت قاعدة قالدة صورة أمها أنا شفتها قبل أقع .. دَقَّتْكم
متين؟ وانّتو زاتكم عملتو شنو لامن تدَقِّكم؟" ..

سكنت (سميرة) ..

(ياسر) قال ليهو: "ما دقتهم ولا شي .. جات هي ولّعت فيها النار وكتلتها"..

قالت ليهو: "كتلتها بتاع شنو حية أهي ديك" ..

قال ليها: "دفنتها وجيت" ..

حاج (اسماعيل) حاول يقعد وما قدير تكلتو (سلمى)..

قال ليهو: "(ياسمين) وين؟ أختك وين؟ أنا بسأل لي ساعة وماعايز ترد"..

قال ليهو: "ماتت" ..

(سميرة) إنسحبت براااااااا ..

طب قبضها (ياسر) قال ليها: "إنتي طلعتي كيف من السجن والجابك هنا

منو؟" ..

(اسماعيل) قال ليها: "فيها سجن كمان؟" ..

(ياسر) الصراحة مراكز زاتو إنها مستشفى وإنو عنبر وإنو أبوهو ده عيان و

صحا من شوية فقال ليهو: "مرتك شغالة مخدرات يا حاج ما ح أقول معاها

دعارة" ..

(اسماعيل) سكت ودنقر ..

وهو مدنقر قال ليها: "(سميرة) أنا قلت ليك بلحقك (أمنة) قبل كدة .. و

عرستك أسترک من البشوي فيهو. لكن أفع وتقومي تكتلي بتي ما عندي شي

أقولو ليك غير إنتي أصلاً طلقتك.. بس هسه بقول ليك تحرمي علي طول

مأنا حَيّ .. وخليّني أبقى بعافيتي والله أشربك من الكاس دي زي ما قلت قبل
كدة" ..

(سميرة) قعدت تضحك قالت ليهو: "تطلقني بتاع شنو يا ود الزين؟!!! قلتها
إنت آااااي بس زي ما وقعت بعدها ح أعرف أوريك الماشفتو .. والله تعطش ما
تروى .. والله لو ما بيعتاك هدموك ما أبقى أنا .. إنت نسيت روحك شكلك يا
سيد" ..

هنا (سلمى) قالت ليها: "بس يا (سميرة) بس!! .. ما عاش البعمل فيهو
حاجة وأنا عايشة .. أمشي يا بت الحلال" ..
قالت ليها: "بمشي حبيبة .. بمشي .. لكن ما عشان أخليهو ليك .. بمشي
عشان المرة الجاية أمشي في جنازتو" ..

"١١"

تعالو نشوف بعد شهر حصل شنو لأتو زي ما بقول ليكم ما ينفع نباريهم
بالأيام ..

(سلمى) بنتكلم مع (ياسر) وأبوهو في هول بيتها: "يا (ياسر) حقو تنقّم
ل(أمنية) بعد ده .. الزولة دي أخت أخوان زي ما إنت زاتك بتقول طوالي والله
.. خلي (ياسمين) تتم الأربعين ونمشي .. عايزة أفرح بيك" ..

حاج (اسماعيل) ساكت ساي ..

(ياسر) قال ليها: "عرس شنو؟ ماف أفراح بعد ده" ..

قالت ليهو: "ليه ياخ؟ أبوك أهو ده .. وأنا أختك وأمك يا (ياسر) .. ماتقول

كدة .. أنا ما عندي غيركم بعد (سميرة) ما إنتحرت" ..

قال ليها: "(سميرة) أصلاً ما بتشبهك يا (سلمى) .. كانت نبت شيطاني .. الله

يغفر ليها بس" ..

قالت ليهو: "أنا ما إتخيلتها تتحر أصلاً .. (سميرة) دي دايماً قوية كانت وما

شكل الزول الممكن ينتحر .. بعدين تتذكر طلعت مننا وهي كانت بتهدد

كيف؟! يبقى تتحر كيف؟ القضية ما إتقفلت لحد هسه لأنو الجنائية قالو

الخنقة المخنوقاها ما خنقة منتحر .. الوصلني إنو إتخلصو منها ناس كانت

بتتعامل معاهم عشان ما تقضهم... المحنناني (سامهر) والله الكويس إنها

قيلت أسفرها تتعالج من الإدمان بعد الحالة الدخلت فيها بموت أمها وزيادة

الجرعات عشان تنسى .. الكويس إنها كانت قاعدة مع خالتنا كبيرة كدة وإلا

كانت راحت فيها بالجرعة الأخدتها لو كانت في بيتكم الفاضي .. نفسي بجد

والله أعرف (الفتاح) وبين؟" ..

حاج (اسماعيل) إتنحنح لمن لقي الكلام ده كلو بقى (سميرة) وأولادها وهو

لهسه بحاول يتعايش زاتو مع فكرة إنو فقد سندو (آمنة) زي ماقال وبتو

وحيدتو المنتظر كان يعرّس ليها قبل يموت .. وقال ليهم بعد النّحنحة دي:
 "فُضّونا من سيرتها عليكم الله.. ليها رب يحاسبها .. أنا حاولت أسترها وما
 نفع .. خلوتنا في كلامك يا (سلمى) .. (ياسر) يا ولدي كلام (سلمى)
 صاح.. أنا البنيّة دي قعدت مع أبوها جاني هنا كم مرّة والله راجل تبّ.. والله
 زيو ما بتلقني نسب" ..

(ياسر) قال ليهو: "أها ويعدين يقولو أختي مجنونة ومرة أبوي بتاعة بيوت..
 ما بتستاهل ألوتها يا أبوي (أمنية) دي ويسمعوها هي وأولادي لو عرستها
 يعني الكلام ده" ..

حاج (اسماعيل) تبّ بي كراعو كدااا وقال ليهو: "اللّسّانات البتقول كدا
 بقطعا" ..

قال ليهو: "يا أبوي قالو وإنتهو .. مافي زول بقدر يوقّف كلام زي ده.. أصلاً
 نكضّب على روحنا لو قلن بنؤقّفو" ..
 قال ليهو: "يبقى تهاجر يا ولدي" ..

قال ليهو: "أهاجر؟ وأعيش عمري كلو متغرب؟ ذنبا شنو (أمنية) تتغرب من
 أهلها؟ بعدين يا أبوي أنا مازول غربة والله .. يعني أخلّي أمي وأختي هنا
 وأمشي؟" ..

قال ليهو: "أستغفر الله العظيم .. ده كلام شنو يا (ياسر)؟؟ الكلام ده غلط
 والله منك وإعتراض على حكمة ربنا .. إنت قايل موت (آمنة) ما قاطع بي؟؟"

دي سندي كانت في أيام ماشفت أشقى منها في حياتي كلها .. أنا الجازيتها غلط و بقيت أقول الظروف إضطرتني.. ياولدي دي حته من قلبي وإتشالت .. ماتقول كدة وأرضى بحكم الله ياولدي .. الغربية أخذًا مرحلة تكوّن فيها روحك وفترة نقاهة يا (ياسر).. كدي فكر وإستخير .. أنا أصلاً حاجاتي ح أبيعها وح أعمل مستشفى لأمراض القلب.. وملجأ أيتام أكان الله يغفر لي و أسافر مع (سلمى) إلا تاني أجي البلد دي شايّلي ..

الإثنين شبكوهو "بعد الشر ويومنا قبال يومك.. وماتقول كدة" ..

بعد عشرة شهور وخمسة أيام من يوم الكلام الفوق ده ..

(ياسر) في واقف المقابر محنن ..

واقف جنب (ياسمين)..

قال ليها: "أنا لقيت شغل في سلطنة عمان .. أمبارح كانت حنتي .. حننتي (سلمى) .. جو ناس كتار .. واللييلة عرسي .. كان نفسي أعرّس ليك قبل أعرّس بس إنتي في جنّة باذن الله .. أنا ما ناسيك .. لكن لو مشيت أحسن لي .. الفارق معاي تُرْبِتِك وثُرْبَة أُمي .. هسه مشيت كلمتها ووريتها حنّتي وقلت ليها تعفي لي .. ما عارف ممكن تعفي لي وللا لأ .. إنتي لو عفيتي لي ح أكون مبسوط .. أنا قصرت معاكم .. بس ما قادر أعيش في البلد دي

.. ما قادر أعين ليك وإنت هنا وأمي هنا.. ما قادر أنتفس هوا إنتو ما فيهو .. أنا إستخرت وإتوكلت .. (أمنية) براك شفتيها تستاهل والله خير وزول أحسن مني .. أبوها جا لأبوي وقعدو وإتفقو أبوي ما قدر يمشي ليهو .. ياالله يا (ياسمين) ..

(ياسر) قعد يحكي جنب قبر (ياسمين) زي كأنها قدّامو وبيحكي ليها بالتفصيل .. خلّص دعا ليها .. ورجع تاني لأمو وخت راسو جنب كرعيها باس التراب فوق القبر وخت يدو في نص القبر كدة.. قال ليها: "يمة محل ماكنتي عليك الله أقعدي طيبة وعافية .. محل ماكنتي محتاجك بمنتهى الأنانية حقّتي زي ماكنت دايماً محتاجك .. ووين ماكنتي ربي معاك" ..

(ياسر) المساء في النادي لابس بدلة سودا وكرفته كبدية مطقّم مع بوكيه الورد بتاع أمنية والشرايط الرابطنها فيونكة في ظهر الكراسي بتاعة المعازيم زي شريط شعر البنات الصغار زمن المدرسة كان بزبطو شعرم بشرائط حلبيبييل الزمن ده!!!...

نزل من العربية ولفّ بهناك ل(أمنية) يسوقها ويدخلو النادي .. فستان زفافها كان مُحجّب.. حجّبتها ومكيجتًا (هند حمدتو) .. طلعت قمر بس ماشاء الله ..

جنب العربية حاج (اسماعيل) مُتكل على عكازو ويهزّ فيهو بوقار كدة .. وجنبو (سلمى) شايلة (عمر) ..

ناس الزفة شغلو ليهم صلاة وسلام عليك يا حبيب الله محمد
اللوووواللوووو..

لمن نزلت (أمنية) ما مشت الزفة .. نزلت من العربية وقلدت حاج (اسماعيل)
وباستو في راسو وقلدت أبوها وأمها وقعدت تبكي .. غايتو المكياج راح شمار
في مرقة.. لحقتها صاحببتها دخلنا العربية تاني و أظبطك أظبطك ..

اهااا بدو الزفة من الأول ... صلاة وسلام عليك يا حبيب الله محمد
اللوووواللوووو ...

والحفلة دي دورت بدون إسلو ولا شي .. لأتو العرسان إتفقو ما عايزين
يرقصو الشي ده ..

اهاااا العرس ده كان ب(عاصم البنا) عديل ولمن قعد يغني: "ناس الحلة
جونى" مافى زول فضل قاعد في كرسيهو إلا حاج (اسماعيل) .. الناس دي
عرضت تبّ وحتوهو حتّ عجيب ..

حاج (اسماعيل) قعد في كرسي قدام وكت النادي ده فاير والرقيص شغال
تسّ .. مبتسم .. على يمينو شاف (آمنة) .. عاين شمالو شاف (ياسمين)...
قال ليهم: "بركة الحضرتو جديدي" .. ورفع عكازو هزاهو ..

الحكاية الثالثة

قصة عادية

"١"

(عمر) و (سوهندا) فرکشو ..

شفتو كيف؟..

ضرب ليها قال ليها: "معليش ما بقدر أغشك ما ح أقدر أعرسك" ..

قالت ليهو: "بعد سبعة سنين وبعد إشترينا حاجاتنا وإخترنا لون البوهية؟" ..

(سوهندا) ضربت لصاحببتها (إسراء) تتخج بالبا كانت .. قالت ليها: "(عمر)

قال وقال" ..

(إسراء) ركبت جاتها .. لمن وصلتها قالت ليها: "قلتي ليهو شنو إنتي؟" ..

قالت ليها: "قلت ليهو: تمام أنا في بيت أهلي وإنت في بيت أهلك أفعد زي ما

أنا قاعدة" ..

(سوهندا) عمرها هسه ٣٢ سنة .. إخرجت وعملت الماجستير طوالي ..

لاقت (عمر) في الماجستير.. زول بديك إحساس زول مسؤول و راجل راجل
كدة ..

أخدراني بنطلون جينزو وقميصو الأبيض وبنطلونو الأسود وقميصو الأزرق
فاتح .. ديل برااااهم كسارات منظر المكوة والريحه التَهْفَهْفُ وسيجارتو زالتها
ريحتها ما سجاير..

أها (سوهندا) من إسمها ده بت راحت.. أبوها وللا أخوها يوصلوها من وإلى
الحتة العايزاها.. زول بسألها ماف.. ما دام واثقين إنها ما ينخرمج.. وسبحان
الله هي ما زولة خَرْمَجَة..

دااايماً شنطتها وجزمتها بيكونو لون الطرحة وللا لون البلوزة ..
غايتو الألوان الفُنْبُجِيَّة والبطيخية واللحمية واللبنية في الجِزْم بدتْها هي بتكون
.. دااايماً جلد إيطالي وللا شامواه.. زولة كلامها زي النسمة.. رقيقة كده لو
قلت ليها وَهْ بتتكسر..

(عمر) ده من أول يوم شافها عجبتو ليك (سوهندا) .. بس الكلام في حدود..
نظام مجموعات وقروبات قرابية وأرح ناكل في جاد يقومو خمستاشر نفر..
يوم قالو ليها نمشي السوق العربي حسّت إتها مغامرة كدة .. شالت موبايلها
وكلمت أمها إنها ح تمشي السوق العربي..

ردت على الأخيرة دي قالت ليهو: "مامتك إنت الشكلها ما حبتتي" ..
طوالي ضرب ليها ..

فتحت الخط قالت ليهو: "أهلاً.. شنو الإزعاج" ..

- أجي يا الإزعاج؟ سمح رافعه مالك؟ ماااا علينا -

قال ليها: "آسف والله بس عايز يومي يبدأ بيك وما ينتهي" ..

سكتت بت اللذين .. قالت ليهو: "ماشه أشرب الشاي" ..

قال ليها: "أريتتي الكباية" .. الود ده ما راقى ياخ خخخخخ ..

باختصار دخلنا في حنك طالعة وين ولايسة شنو ووريني وإستأذني وأنا ما

موافق .. يلاا الوكيت ده كلوووووو أصلو ما جاب سيرة عرس ثاني - غير

اليوم داك بتاع الفنان منو ح يكون - ولا حب ..

(سوهندا) إتقدم ليها ود عمها (ماهر) .. كلم أبوها ونظام من صغار هو

عايزها والناس محضرين شعورهم .. في نص إحساسها ده نِسْتْ لِيك موضوع

(ماهر) ده كُلو كُلو .. غايتو اليوم ده بنفسجي على رأسها ..

قالت لأبوها (ماهر) ده ما عايزاهو ..

و(ماهر) شغال في (شمبرقيرج) وللا (جرجير جرجير) ديك ..

المهم .. مدير كبير ب(لانديكروزرو) وإنترناشونال ستاف .. ولد ده!! ..

لكن الفقري أصلو فقري ده تبع (سوهندا) التعليق ده ..

غايتو (ماهر) أكلها في حنانو وسكت لمن كلموهو إنها ما عايزاهو ..

(عمر) كل يوم تلفون الليل بقى ثابت والونسة أنسو ساي..
 (عمر) عندو محل موبايلات..
 يوم القروش تجي وعشرة لا ..
 يوم كدة قال ليها: "أنا عايز شغل ثابت حتّن أضرب لعمي لموضوع الفنان"..
 وطبعاً لأنها عارفة الشغل واسطات..
 وسّطني ووسّطك كلمت ود عمها (ماهر) ده .. ورتو إنو عندها زول وإنّت
 أخوي وزول حارة وحنك زي ده وأقبل لمنو وإنّت ياكا سندي..
 (ماهر) إئوسّط ل(عمر) عند ناس (دال) بدون يكلمها ولا يكلمو ..
 يوم (عمر) قاعد في محلو داك ضربو ليهو ناس (دال)..
 (عمر) يحكّ في راسو ساعة لقدام إنو ياالله أنا قدمت متين !!..
 المهم خشّ ليهو جوة بنظلون ببيج وقميص أصفر وبقى ماشي..
 يسألوهو من (زيد) يطلع ب(عبيد) وفي النهاية شغلوهو.. أريتها واسطتي
 يايمة..
 أها قال ل(سوهندا): "أنا ح أشغل مع ناس (دال).. بس أدّيني ستة شهور
 وبّجي البيت".. الستة شهور بقت تسعة.. البت دي كان عرست وحملت وكان
 هسه الولادة قريت.. بس نقول كلو لخير ..
 (سوهندا) دي السنة الرابعة من أول يوم داك؛ قالت ليهو: "لو عندك قرش
 بس؛ تعال ما مشكلة أبوي بّتم"..

(سوهندا) أبوها ما شاء الله ديبك يا المستشفي الحدادي مدادي.. إسمها ع إسم
بِتَوّ ..

مستشفى (سوهندا) لمرضى القلب إسم بس لأنو العِدّة إتَعَفَّشَتْ يعني معدات
طبية راحت في خبر ليس مش خبر كان بس!! .. وأبوها طيبااان ما بسأل
المعاهو وين القرش مشى .. وبين الأجهزة إختفت .. غايتو يا حليلو لو
عرف؛ عطشان ما يروى..

الترجمة للقلناهو فوق ده إتو العاملين عليها باعوها وقعدو ..

"٣"

أم (عمر) إسمها (سارة).. شفتمو الإسم الشبابي ده؟ ..
المهم..

قالت ليهو: "شايفاك بديت تبني فوق وتصلح في الحتة .. خير!!" ..

قال ليها: "قلت أبني حبة حبة يمكن أعرس" ..

قالت ليهو: "إن شاء الله يا ولدي تتم عرسك ورينا يسعدك ويهنّيك إنت
و(هناء)" ..

(عمر) قال ليها: "(هناء) شنو يا أمي؟ يمكن شايف شوفة أنا هسه .. إلا الله

يهنّيني مع (هناء) بس يعني؟؟ خليها دعوة عامة كدة ياست الكل" ..

حَمَرْتُ ليهو كويس وقالت ليهو: "شايف شوفة وين بعيد من بت خالتك؟ زول من أولادي يطلع برّا بنات أخواتي ماف .. المؤدبات الراسيات السمحات .. مش يِتَكشَمَنَّ مِثْل نار القصب ويضَحَكَنَّ مع الوليدات وفارّات سنونن في سهلة الله وماشّات من حفلة لحفلة مُفَنِّعَنَّ كاشِف.. تشيبيبيبي .."

(سارة) مسمّنها أولادها المرّاة الحديدية .. و ناس الحلة بقولو السوار الحديدي..

مرة قوية وحازمة ما في زول كلامو ورا كلامها..

(عمر) بريد (سوهندا) كان الريدة الواالحدة دي .. لكن يقنع أمو كيف؟؟ .. (عمر) - لأنو زول ظريف خالص وللاسباب الفوق بتاعة شخصية أمه دي - قام يضحك ونقطة موروكو ديك حقة العرق - بتاعة مُحْرَج كدة وماعارف زاتو يقول شنو - بي ورا شعرو قال ليها: "ده شنو يا أمي قصدك منو إنتي؟ ياخ (هناء) دي أختي والله ما عندي ليها حاجة" ..

(سارة) قامت على حيلها وبنهرة قالت ليهو: "أختك شنو؟ لا شلّتها في بطني لا رضعت معاك!! قال أختي قال!! تشيبيبيب الكلام المسيح ما حبابو" .. قال ليها: "يا أمي كلامك على عيني وراسي بس والله ما شاعر تجاهها غير بأنها أختي.. هسه لو لقيت لي زولة لذيدة زيك كدة وبتشبهك ما يكون محظوظ؟ والله ما أبدّلها بزول" .. وسلّم ل(سارة) في راسها..

زحّت راسها بعيد قالت ليهو: "الزبي أمها ما ولدتها وراي.. بطن أمي وإنسدت بعدي.. هوووي يا (عمر) أنا عارفة في رأسك البت البتُكشُم ديبك من يوم حفلة التخريج بعويناتها الصغار دي وخشمها الفاراهو زي المطبقة الفاضية وجاياني بي سكاكاتها ديلاك تقول لي خالتي؟! .. أنا خالتي؟! خلل الضروس اليقَعن ما ينقَنُ" ..

(عمر) عمل غمران كلو وكلو وقال ليها: "دي منو يا أمي دي؟ ياتو تخريج أظني ما كنت حاضر" ..

قالت ليهو: "حاضر وعارفيني بتكلم عن أم سيسي ديك .. قال إسمها شنو؟ قال أم سيسي قال .. تشيبيب" ..

(عمر) لم الموضوع وما حاول يحكها.. شبكها ليك: "آآآ قصدك (سوهندا) ياخ زولة زميلتنا لذيذة والله يا أمي وطيبانة ياخ وأهلها ناس دكتور (عبد العزيز) ياخ طيبين ياخ" ..

(عمر) إضايق شدييد ضرب ل(سوهندا) قال ليها حصل وحصل وحصل.. "أنا ما عارف أفنعها كيف.. أصلو ما عرفت!! لكن ما تشيلي هم بفنعا بفنعا" ..

(سوهندا) قفلت ليك مع حلتنا..

قالت ليهو: "في أي وقت جيتو أهلي ما بأخروني وما بقولو حبسة.. عيد ميلادي الثلاثين عايزة أكون في بيتي" ..

قال ليها: "ما بتلحقي عيد ميلادك الثلاثين .. قبلو بتكوني في بيتنا" ..
أجي يالبيتنا!!! الناس دي مشت كويس غايتو النشوف نهايتهم ..

عيد ميلادها الثلاثين جا ..

(سوهندا) صحت الصباح عندها إحساس إنها في بيتها مش بيت أبوها ..
كانت نايمة والتلفون في أضانها .. يتكلمو الليل كلو وُد وُد وُد لامن نامت ..
ضرب ليها من حداشر بالليل قال ليها: "عايز أكون معاك لمن يدخل أول
يوم في سنتك الجديدة .. خلّي التلفون في أضانك ونومي .. عايز أحس إنك
بتتفسييني .. عايز أحس انك جنبي حقتي براي" ..

أنا ما عارفة مشكلة النَّفس والأكسجين اللي هو فيها شنو دي ..
و لأنها سخلة؛ عملت كدة ..

صحت آذان الصبح لقت روحها طابّة التلفون؛ عايزة تقفلو سمعت صوتو قال
ليها: "يا أحلى حاجة في حياتي يا أنا يا عمري الليهو خمسة سنين بدأ يادوب
خليك ما تقفلي" ..

قالت ليهو: "إزيك يا أنا يا عمري البدا هسه ويبدا في كل يوم.. أنا قايمة
أصلي وأدعي" ..

قال ليها: "أدعي إنو الليلة نكون عندكم"..
 قالت ليهو: "بدعي إنو هسه تكون معاي"..
 قفلت السماعة قامت تصليي..دعت فُدرتًا..
 وانتظرت الليلة إنو يجي..
 بس الليلة دي ما جات..
 مرت ثلاثة شهور بعدها وه ماجات الليلة دي ..
 (عمر) ثلاثة شهور ما رفع السماعة ضرب وماقال حاجة أصلو ..
 وهي قالت ما ح تضرب ليهو ..
 ثلاثة شهور طَقْ تَمّت قام ضرب ليها..
 (سوهندا) وزنها بقى وزن الريشة .. قامت ليها هالات من عدم النوم و جَنُبة
 وشّها بقت محمّرة طوالي من طبّة الموبايل..
 قال ليها: "ما حسيتيني مُتّ ؟؟"..
 قالت ليهو: "إنت حاسي إني عايشة؟"..
 قال ليها: "أنا كنت بموت كل يوم تاني .. أنا بمسك يدي أتنّسّها بالنار عشان
 ما تضرب ليك.. كلمت أمي تاني وقالت ما عافية مني.. كلمتها تالت قالت
 شوف ليك موضوع تاني " ..

(سوهندا) مسكت السماعة شديبيد وقالت ليهو: "لا لا شوف عفو أمك أنا غيري بجي.. ما برضاها ليك تعيش من غير عفوها وما برضاها لي أعيشك معاي من دونها" ..

قال ليها: "بس ح يسكن حياتي زيك ال ح يجي غيرك ده؟ ح أنتفسو مع سيجارة الصباح زيك؟ ح أحضن صوتو في أواني وأولييهو زيك؟" ..

قعدت تبكي قالت ليهو: "ولا ح يكون في زول نبضات قلبي فاتحها هو ويدقها ولا ح يكون في زول ماشي في دمي وبتغدى بيهو زيك" ..

المهم بعد حنكك حنكك وصلو لإنو يحاول تاني ويكلم أمو بالواوضح إنو عايز (سوهندا).. لأنو الوكت ده كلو ما قالها واضح.. بس قال عايز يعرس برة أسرتهم..

"٥"

مرّت سنّتين..

سنّتين بي نفس مخدّر الكلام البياخدوهو الإّتين ..

بي نفس فهم نعمل حاجاتنا ويمكن لقدام تتسهّل ..

(سوهندا) سافرت لأختها في ألمانيا وقدمت لدكتوراة هناك وجاءت راجعة بعد

شهرين لأنها ما قدرت تقعد هناك .. هو ما معاها في نفس البلد .. هو ما

كل يوم بقول ليها: "تصبحي وإنتي في أحلامي طيبة " زي ما دايمًا بقول ..

وجات راجعة السودان وبدت كورس إنجليزي ونزلت شغل وخلّتو ..

ما قدرت تمشي كل يوم شغل وهي ما قادرة تشوفو لأنو وعدت روحها

ماتشوفو إلا يكون حقها ..

سنّتين بيتهم الإختارو ألوانو سوا؛ تمّ فيهم .. البُنا تمّ ..

وفرشوهو سوا.. مشو (المحاميد) وجابو من برّة باقي العفش.. لحد الكنبة

التركواز ببني ومساندها برتقالي صمّمتها (سوهندا)..

أحييي أنا قلبي وجعني..

سنتين (سوهندا) فيهم جا ود خالتها إتقدم ليها تاني .. بعد ما موضوع (ماهر) وخُطبتو المِن بدري الناس عرفوها إنتهت..

سنتين جا فيهم برضو ود خالتها (عثمان) .. جاء براهو كَلَمَ أمها إتو عايز بتها .. قال يشوف أول يمكن عندها زول وما قالت .. و(عثمان) ده قريب من خالته شديد..

أمها حاجة (عزيزة) قالت ليهو: "إنت زي أخوها ما بنفع أكلمها لإني ماخاتاك تعرّس أختك" ..

كسرت خاطر الولد رغم إنها بتحبو وقريب منها زي ماقلنا ..

وبعد مشى منها قالت لـ(سوهندا): "حاسّة قلبك ما حقك عند زول تاني فقلت أخرج ود أختي ولا أكنُك.. بس يا بتي العمر ماشي والليله إنتي صغيرة؛ بكرة لا.. عايزة أفرح بيبك وأشيل أولادك قبل أموت" ..

سنتيين كان فيهم عرس بنات خالتو التانيات وكانت (سوهندا) هي البتمشي السوق وتختار الكرفنة والجزمة والقميص والبنطلون..

و هي البتمشي تختار الحلاقة ال ح يحلقها ..

و هي العايشة معاهو وهي ما معاهو..

سنتين كان (عمر) هو البعترض على لون الجزمة والشنطة فيهم؛ بقول ليها: "ألوانك قاطعاها من راسك" ..

اليوم داك بعد تمّو سبعة سنين ضرب ليها قال ليها: "أنا آسف مسكت بيك زمن .. وما خلّيتك تشوفي خيارتك الثانية.. عيشي حياتك بعد ده أنا خلاص قررت أموت.. وما بنفحك كدة" ..

قالت ليهو: "ليه في شنو؟" ..

قال ليها: "أمي ما عايزة تخليني أفتح معاها الموضوع .. أفتحو تقفلو.. في عرس بنات خالتي وأنا مودّيتها حاولت أتكلم وما سمعتني.. أنا حاولت جادّي بس ما قدرت" ..

قالت ليهو: "حاولت جادّي تقوم تكلمها وإنت مودّيتها عرس؟" ..

قال ليها: "خنتها لي عديل برة أهلي ما بعّرس وأنا أمي صعبة ما بتقتنع ولو إقتنعت باقي أهلي ما ح يفتنعو ما ح ألقى زول واقف معاي ولا زول يستقبلني ولا في بيت ح يرضى نمشيهو زيارة ح يقاطعوننا .. أهلي وبعرفهم.. وهي عايزاني لبت أختها ومصرة" ..

قالت ليهو: "طيب من الأول ليه ما قلت كدة؟ مش عارف أمك عايزاك لبت أختها؟ لمن جيتي وإتكلمت معاي؟ ما كنت عارف؟ لَمّا إشترينا الحاجات سوا ويتسألني من لون الحيط ما كنت عارفهم صعبين؟ بعد سبعة سنين تقول لي عيشي حياتك وإنت عارف إنك حياتي عايز تمشي؟ بعد سبعة سنين تقول لي أنساك وأنا ما قاعدة أتذكرك عشان أنساك؟ ده كلام شنو ده؟ كنت وين السبعة سنين دي؟" ..

قال ليها: "آسف" ..

قالت ليهو: "آسف يعني شنو؟" ..

قال ليها: "آسف إني ضيِّعت سبعة سنين ولأني ما عايز الباقي من عمرك يضيع وإنتي منتظراني وما عايز أكون كدَّبت عليك ومسكت بيبك زمن أهو ده ضربت ليك وبقول ليك عيشي حياتك" ..

قالت ليهو: "متذكر لَمَّا بقول ليك ما عايزة أقفل الثلاثين وإنْت ماف في حياتي؟ تتذكر لمن قلت لي ح تكوني في حياتي أكيد؟ متذكر كمية الأمل الكنت معيَّشني ليهو؟ متخيِّل يعني شنو تجيب لي ضرة في بيتي البنيتو أنا؟" ..

قال ليها: "ضرة شنو؟ هسه بقول ليك أمشي عرسي (ماهر) وللا الإنتي عايزاهو غلطان أنا إني كلّمك تكسبي زمنك؟" ..

قالت ليهو: "لا ما غلطان إنت والله عدّاك الغلط.. أوكي إنت في بيت اهلك وأنا في بيت أهلي كل زول يفضل في حتّو" ..

وقفلت وضربت لصاحبها (إسراء) ..

كدة رجعنا للبداية البدينا بيها ..

"٦"

(إسراء) بعد جاتها وحكت ليها حاولت معاها تسكّتها ما عرفت.. تقول ليها
شئو بس..

قامت ضربت ليهو: "السلام عليكم كيفك" ..

سلم عليها عادي وسألها من ترتيبات عرسها ..

(إسراء) و(سوهندا) كانو متفقين يعرّسو ورا بعض بشهرين عشان ينبسطو
بعرس بعض وبدو يشترو في حاجاتهم حتى (سوهندا) جابت هدم من برة
معاها ليها لّمّا سافرت .. من كل شي جابت إثنين واحد ليها وواحد
لـ(إسراء)..

(إسراء) ردّت وورّتو إنو بجهّزو وقرّبو ..

المهم ..

قالت ليهو: "يا (عمر) معلّش بس مالك و(سوهندا)؟" ..

قال ليها: "والله الزولة دي رقيقة شديد ما بنتفع مع أهلي" ..

(إسراء) صدّبت فيها مطرة.. "كيف الكلام ده؟" ..

قال ليها: "أهلي صعبين و ح يعيّشوها في دوامة و ح يبعدو منها و ح يعزلوها
و هي ما ح تقدر تكافح عشان تخليهم يحبوها" ..

قالت ليهو: "وانت الكلام ده ما كنت عارفو؟" ..

قال ليها: "كنت عارف أكيد .. بس كان عندي أمل واحد منهم ح يتغير .. وما

حصل كدة .. أنا آسف بس ما عندي شي أقولو" ..

وقفل منها ..

(إسراء) طلعت من (سوهندا) مشت (دال) ل(عمر) عشان تفهم متو قالت

ليها: "ياخ الزول ده محترم شديد إلا تكون حاصلة ليهو حاجة يستحيل

يتصرف كدة ساي" ..

(سوهندا) قالت ليها: "أصلو ما تمشي ليهو ولا شي" ..

لكن هي برضو مشت .. صاحبتهما ماقدرة تخليها كدة ..

ما ح نقول (سوهندا) دخلت في حالة نفسية وبقت منكوشة نكشة العدو وبقت

تختّ تلج في عيونها قبل تنزل تسلم على أمها عشان ما يظهر عيونها

المحمرات والفيهم هالات بقن ..

وما ح نقول إعتزلت الناس والأكل أسبوع ..

وما ح نقول إتمنت تموت في كل صلاة كانت بتصليها ..

ح نقول إنو (إسراء) لمن مشت (دال) ما لقتو .. قالو ليها نزل إجازة زواج ..

وح نقول ..

بعد شهر (سوهندا) أبوها ما عجبو بِنُو ذبلانة كدة وما فهم مالها وبي نقّة من أمها قام قدّم ورقها في شركة وشالوها وضربو ليها .. وقال ليها الشركة حقت صاحبي وقال تخصصك مطلوب..
وح نقول إنو أول يوم تنزل شغل .. بِنْتَنِّم في الورق في يد محنّنة إتمدت ليها..

بدون زول يقول السلام عليكم رفعت راسها لِقَتو (عمر)..

ولأنها قصة عادية خلّوها كدة .. ما ح نقدر ننهيا ..

وما ح نقدر نقول إنو (عمر) إستقال من (دال) والشركة دي بقدره قادر هو شريك فيها وشركة جديدة لَنج ..
خلّوها كدة..

الحكاية الرابعة

لمحة من حياة أربع بنات

"١"

(هيام) و (يارا) و (فوزية) و (سعاد) صاحبات..

كل واحدة قصتها نخليها بس ساي..

(يارا) طرشاء خلقه الله.. آآي زي مابكمكم.. مابتسمع..

(يارا) مكسرة في واحد إسمو (إبراهيم)..

مكسرة جد.. (إبراهيم) ده سنيرهم واشتغل في الجامعة بعد داك.. مابعين ليها

زاتو..

(يارا) كل يوم ترجع البيت تقشعش دميعاتها وتحمد الله وتنوم بعد تدعي إئو

يبقي ليها..

يللا ممّا قامو الأربعة قامو سوا.. المدرسة سوا.. مقالب الأستاذات وكتابة الطباشير في ضهرهم وجدّيع اللّبان تحت كرعينهم.. غايّتو عاشو طفولتهم كويس.. ولعبو بّلي في الشارع مع أولاد الحلة..

الغريبة شخصياتهم مختلفة تماما من بعض .. (يارا) هي صاحبة المقالب والأفكار.. يعني طرشها ما أثر عليها وخلاها تنعزل و تتوقّوع من الناس ونكّش.. على العكس تماماً ..

(يارا) بتقرأ الشّفاه.. دخلت أول سنين الابتدائي مدرسة صم وبكم واتعلمت لغة الإشارة بس لمن اتعلمت لغة الشفاه لّقنها أسهل وأريح .. وشاطرة هي.. فقالت لأّمها عايّزة ينقلوها مدرسة صاحباتها ديل..

(هيام) زولة مرحة وجنّها ضحك.. أمها وأبوها انفصلو فترة من بعض بس رجعو تاني.. دي الفترة الوحيدة الكانت (هيام) مابتضحك فيها..

(فوزية) زولة رسميّة ماعندها تلت التلاتة كم.. الدّرب العدّيل بتقول ماف زيّو.. أول زول بيعترف بأنّهم عملو مقالب ويتاخذ دقّتها وتمشي.. مرات بتدّق بدل صاحباتها..

(سعاد) دي الرقيقة فيهم.. بت زي النسمة كدة.. الكلام بي سلّة الروح.. آآي
أنا حاقدة البتكلمو برقة ديل بسلو روجي..

(سعاد) من أول يوم في الجامعة.. وهي داخلة القاعة لاقاها زولاً ظريف كدي
وزحّ ليها من الباب ولمن داخلين اللاب فتح ليها الباب.. المهم الحركة
كسرتها ليك..

الزول ده إسمو (هشام).. آها بعد داك (هشام) و(سعاد) حبة حبة بقو برّة
قروب الصحابات والونسة بدت تبقي دقاقة دقاقة.. وحوبيكو حوبيكو.. (سعاد)
من أول يوم جا كلمها (هشام) حكّت لصاحباتها وبالتفصيل..
القصة مشت عادي لحد هنا ومافيها شي..
أصبرو لي بعد الخلفية التاريخية دي بس..

"٢"

(هشام) زول شايل بيتهم أبوهم زول عيان.. وهو الكبير.. زول مسؤول كدة..
و(سعاد) آخر العنقود.. (هشام) بقى بعد كدة: "طالعة وين لالا ماف لزوم
تمشي الحنة الفلانية.. بغير عليك من الناس.. ماتتكلمي مع الزول داك.. ده
مالو عايز شنو..". المهم خنق ليك (سعاد) خنقة السواد.. من سنة تانية لقط

كُرْعينو ومشي لآقي أخوها وقال ليهو: "عايز أختك" .. واشترو دبل فضة
ولبسوها..

(هيام) بتحب أخو (يارا) ممّا كانوا في اللّقة.. بتشوفو قلبها ببقى ماف.. بس
زي ماقلنا زولة بتضحك دايمًا ولذيذة كدة فمافي زول مركز معاها إلا (يارا)..

أها (يارا) دي يوم كدا غلبها كَوو كَوو..
قامت قعدت تكتب لـ(هيام) تحكي ليها ..

قالت ليها: "أستاذ (معتز) ده أنا ماعارفة ممكن أعمل شنو عشان أشيلو من
جواي.. جد تعبت .. يعني ماممكن كل يوم أكون بس منتظرة إنّي أشوفو من
بعيد.. أنا عارفاهو ما ح يعاين لي.. في زول بيعاين لطرشاء؟" ..

(هيام) قالت ليها: "أوعك أسمعك تقولي ع روحك طرشا تاني .. والله إنّي
رنا بريدك ياختي في حاجات تسمعيها لمن تقولي أرينتي أطرش.. يابت
عيشي اللحظة.. هو زاتو شين بي جآحاتو الكُبار ديل .. ياخ جآحاتو ورا
أضانو معقولة بس؟ صلعة وفي نصها خط شعر عشان نسميهم جلات" ..
(يارا) قعدت تضحك في وصف (هيام) ده..

آها في قعدتهم دي جاتهم (سعاد) تبكي .. قالت ليهم: "أنا ماقادرة خلاص..
إنفصلنا نحن" ..

عابنو ليدها لقو الدبلة ماف.. "يابت في شنو" ..

قالت ليهم: "إتخنت جد والله.. يعني عرس ود خالتي ما أمشيهو ياخ !! .. يقول لي أنا شاكي إنو بحبك!! .. ياخ أهو ده إثنيل عرس يجب لي شنو بعد ده؟" ..

(هيام) قالت ليها: "عابني كدي روقي أنا عندي تشيبس أكليهو أول عشان يزيد ليك الحموضة الإنتي حاساها دي" ..

خخخخ غايو (هيام) دي اصلها ماجادة..

(هيام) أدتها التشببس وقالت ليها: "أنا ح أفنش الخبير النفسي حقنا مابعرفها ما جات مالها لهسه" ..

مشت تفتش (فوزية) .. لقتها ليك واقفة وبتتكم بي نفس حار مع واحد .. أول ماشافت (هيام) طببًا من يدها وقالت ليهو: "السلام عليكم" .. (هيام) قالت ليها: "ده مش؟؟" ..

(فوزية) بي زعة كدة قاطعتها قالت ليها: "آآي ياهو" ..

قالت ليها: "مالو قال؟ كان واقف زي الطالب وإنتي الأستاذة الشائلة سوط؟؟" ..

(فوزية) قعدت تضحك بدل ترد قالت ليها: "فكك منو.. إنتي بتفتشي لي كنتي؟" ..

قالت ليها: "آي ياخ!! (سعاد) و(هشام) فركشو" ..

"٣"

(فوزية) خبطت صدرها قالت ليها: "ده منو ده؟ (هشام)؟" ..

و(يارا) خنّت يديها في راسها ..

(هيام) قالت ليها: "تبوسو فَعُونْجَة .. بيبوسو الكَّوْ .. تبوسو حلزونة ..

الحمار .. بيبوس شنو الغبي؟" ..

أها (سعاد) إتفتحت تالني بكا ..

قالت: "قال لي إحنا متزوجين تقريباً بيناتنا ورقة .. والزواج اساساً إشهار

والجامعة كلها عارفة وأهلك عارفين .. قال ماطلب مني شي كثير" ..

(فوزية) قالت ليها: "أسمعيني كويس دي أول مرة يقول كدة؟؟؟" ..

قالت ليها (سعاد): "لالا .. بس كنت بمشيها" ..

- "بتمشيها كيف يعني؟؟؟" ..

قالت ليها: "مايقف فيها بقعد أضحك ويقول ليهو خلاث هانت" ..

(هيام): "الضاحكآلا شنو يالسمحة لامن تبقي في النّفعة .. الضاحكآلا شنو

يالنجيضة لامن تلقي روحك ربنا يرحمك" ..

(فوزية) سكتت عرفت إنو ما ح تقدر تتكلم هسه مع فورة (هيام) وورق (يارا)

البُتْطَاقْش بتكتب فيهو ..

قالت ليهم: "عابنو أرح بيتنا كدي أول .. هنا ماينفع نتكلم.." ..

أها رجعو كلهم بيت (فوزية) .. كلهم جيران قلنا فماعدهم مشكله لو إتأخرو .. بس (فوزية) عديل وزعتهم ليك وقعدت ل(سعاد) ..

قالت ليها: "(سعاد) الموضوع أكبر من بوسة المرّة دي مادام وصلت طلّعتي دبلة الفضه وقبلها سكّتي ع المرات القبليها .. وقبيل قلتي قال بيناتكم ورقة وما حبيتأسالك قدام البنات .. ورقة شنو؟ و في شنو بصراحة؟؟" ..

(سعاد) سكتت ..

(فوزية) قالت ليها: "ما ح أضغط عليك مّتي ماتحسّي عايزة تتكلمي إتكلمي طيب؟ الليلة تبيتي معاي ح أمشي أكلّم خالتي أقول ليها عايزين نذاكر .. المسافة دي إسّنّمي وغيري أهو ده الدولاب" ..

مشت وجات لقت (سعاد) خشّت ليها جوة جلابية بيت وقعدت .. مشت هي زالاتها إسّنّمت .. جات لقتنا قاعدة سرحانة .. ما سألتها .. شالت حمّام جلسرين وقعدت تتّمسّح ..

فجأة (سعاد) قالت: "إتزوجنا عُرفي من قبل ثلاثة شهور .. وبتلاقي في شقة .. وهسه أنا حامل" ..

(فوزية) والاصلت تتمسح وسكنت.. جاها إحساس إنو (سعاد) بنقُضِفُضْ مع روحها أكثر من إنها بتتكلم معاها .. خافت لو قاطعتها وإتخلعت بصوت عالي الخُلة المخلوعاها داخلياً دي إنها توقّف كلام ..

(سعاد) واصلت: "أفنعني بموضوع الإشتهار والصراحة ماكنت عايزاهو يطير أنا جد بنقُفسو.. بحسو دمي الفى عروقي.. بفتش حروفو في أي شي.. بقرأ سوره الكهف عشان الهاء الفى اسمو.. أحييي يارب.. أقول ليهو تعال إتقدم ونعرس قبل أهلي يعرفو يقول أنا ماضربتك ع إيدك وزى ماعايزك إنتي زالااتك عايزاني كنتي!!!! .. وقال شنو ؟ قال الليلة موديني لي داية تنزل الجنين.. أعمل شنو هسه أنا بس؟؟ أحييي يااارب يارب" ..

(هيام) لمن رجعت (يارا) بيتهم لاقت (هيثم) أخو (يارا): "إزيك ووين إنت قاشر كدة ماشي وين؟" ..

قال ليها: "ماشي أقابل حبييتي" ..

(هيام) في قبضة تلج مسكت قلبها ..

قالت ليهو: "ماكلمتني ياخ إن شاء الله سمحة بس وماتشوكشك" ..

قال ليها: "تشبهك كدة" ..

(هيثم) قشّر لآتو كان ناوي يلاقي (هيام) في راس الشارع .. ماعندو مشوار

ولا ماشي يقابل حبييتو ولا عندو حبييتو دي زاتها غير (هيام) بس ماقال ..

قال ليها: "عايني الدنيا مغربت خليني أقدّمك" ..

ماشين كدا قال ليها: "(هيام) إنتي بتحبي؟" ..

قالت ليهو: "سجمي!! أجي يالبرقش أحب شنو؟ إلا الرسول" ..

قال ليها: "بتكلم جد.. مستغرب أنا زولة زيك كدة مالقت زول إقنعها" ..

قالت ليهو: "لو الزول بشبّحك معاناتها بقتنع" .. سكت كدا قال ليها: "رأيك

فيني شنو؟" ..

قالت ليهو: "من ياتو ناحية؟ يمين وللا شمال؟ خخخ" ..

واصل هو جادي ماكان رايق للخسنة الليلة؛ قال ليها: "من الجنبّة

التعجبك" ..

قالت ليهو: "إنت زول أخوي" ..

أخوي دي طعتو ليك بسكين .. قرب يقول ليها أخوك بتاع فانيلتك؟ بس

إستغفر ..

قال ليها: "كدي لو ما أخوك رأيك شنو؟" ..

قالت ليهو: "لو مازول كويس وراجل كدا ماكان إتكلمت معاك وللا شنو؟" ..

قال ليها: "شكلو شنو" ..

قعدت تضحك ..

آها وصلها وماكلّمها ولا شي ..

"٤"

(يارا) تاني يوم قشرت ببلوزة فُنْبُجِيَّة وإسكيرت جينز .. وطرحة فيها اللونين
 ديل وطلّعت خُصَلتًا اللونها بني والشنطة والجزمة والاكسسوارات الفُنْبُجِيَّة ..
 وطلّعت على الجامعة .. رسلت الصباح لـ(فوزية) و(سعاد) رسالة بس ما ردّو
 و(هيام) كانت منتظرها في المحطة ..

أها مشو الجامعة..

قامت كتبت لـ(هيام): "ماشة أسلم البحث لأستاذ (إبراهيم).." ..

أها مشت لأستاذ..

الراجل قايلها هادئة ما قايلًا ما بتسمع ..

سلّمتمو البحث..

قام قال ليها: "يعني إنتي أصلو ما بتتكلمي معاي ليه؟" دنقّرت في الواطة..

بتفكّر تكلمو إنها ما بتسمع وللا ح يؤثر على تقييم بحثها ده ولّ ما تقول

شي زاتو وتتخرج؟؟..

قام قال ليها: "طيب أفهم شنو؟" ..

وشها حمّر..

فهم إنها خجلت..

قام على حيلو قفل باب المكتب ..

العوقة السخلة لسه قاعدة بنفكر نقول ليهو وللا لا.. لأتو من الأساتذة
البتحترمُن جداً هي..

المهم..

جاء قعد في الكرسي الفُصاها قال ليها: "إنتي لافئة نظري من بدري.. زولة
أدب وأخلاق.. أها إنتي مخطوبة"..

عملت براسها: "لالا"..

"طيب بتحبي؟؟"

عملت براسها: "آي"..

مسك يدها.. قال ليها: "ياريت يكون بستاهلك"..

بعد شوية لمن ماردت.. قام حضنها ليك.. بقت تهز في رأسها وتدفر فيهو..
وهو لمن ما كورككت قال لالا دي حركات منها ساي..

ما ح ندخل في تفاصيل.. بس ح نقول إنو (يارا) ما حضرت ولا محاضرة
ورجعت بيتهم تبكي.. وغيّرت هدومها الداخلية المليانة دم.. و ما ح نعلق
إنو من الأساتذة البحترمومهم طُلابم بس مألومرة يعنل كدة.. عادةً بكونو
بنات هو بقول عليهم "ما ح نقول البقولو طبعاً عشان الكلام ده بقروهو ناس
تانيين ما إنتو براكم"..

(هيام) فنّشت ل(يارا) مالقتها..

و(فوزية) و(سعاد) مَحْنَقِيَات وما بردّو ع تلفونائهم.. (يارا) البترّد برسالة؛ ما ردّت ..

غايتو حضرت المحاضرات.. وهي طالعة لقت ليك (هيثم) منتظرها.. قال ليها: "دايرك براك في كلمتين"..

قعدت تضحك قالت ليهو بنغمة كدة: "إختاري إنتي متين ووين".. قال ليها: "بالضبط دايرك تحددي موقفك".. سكتت.. قالت ليهو: "(هيثم) في شنو"..

قال ليها: "عليبك الله ما تغلبي جاده خليك زي قبل شوية براي متوتر".. مشو قعدو في الكافتريا..

قال ليها: "عايزك تنوسطي لي عند زولة".. قالت ليهو: "جداً والله.. منو ومالها؟"..

قال ليها: "زولة عبارة عن قمر نزل هنا في الأرض عشان يسعدنا.. بسماًتاً تردّ الروح .. ضحكنا موسم فرح بيغشاني وينادي .. زولة خلقة وأخلاق كاملة الأوصاف .. قلبها أبيض من اللبن .. ومخها يوزن بلد .. زولة برّيدها لمن ما قادر أصلاً وأورّيهها .. لمن تجي ماشة والله الشارع ببقى فيهو نقطة ضو وaaaaااحدة حتتها هي و بس".. قعدت تضحك قالت ليهو: "(هيثم) يا أخوي زولة وللا ملاك دي"..

(فوزية) بتتكلم كدة وهي ماشة وجاية بالجد .. عاينت لقت (يارا) بتبكي..

قالت ليها: "ماتبكي عليك الله هسه فكري معاي" ..

(يارا) أشرت ليها: "أنا ذاتي" ..

(فوزية) ضربت صدرها قالت ليها: "إنت زاتك شنو؟" ..

المهم (يارا) شي كتابة وشي إشارة حكّت لـ(فوزية) ..

(فوزية) قعدت في الواطة وتكورك وتلطم في روحها .. و(يارا) تقفل ليها في

خشمها وتسكت فيها .. أم (يارا) جات جارية: "في شنو في شنو" .. (يارا)

كتبت ليها: "(فوزية) قالو مامسكو البحث حقها" ..

أم (يارا) قومت (فوزية) وطبّطبت عليها قالت ليها: "فُزُز ماتبقي جادة شديد

حبييتي .. لو الموضوع ماإتحلّ بمشي معاك أنا" ..

"٥"

(فوزية) بعد انْمَخَطَتْ كويس وَقَشَقَشَتْ دميعاتها .. قالت ل(يارا): "لازم نكلّم أمك" ..

أم (يارا) أستاذة جامعة ..

(يارا) عملت بأكانفينا حركة إنها ماعارفة ..

قالت ليها: "لازم يابت ده حقك" ..

المهم (فوزية) مشت كلمت أم (يارا) ..

الأم سَكَلَبَتْ وَاثَكَّتْ بِالتراب ..

وجات لبتّها هبَّتْها دق .. (فوزية) زالااتها إنتدقت لَمَن عايزة ترحّها من (يارا) ..

الإغتصاب والاحد ردة فعل أي زول تجاهو من الأهل .. الصدمة والغضب

والسكليب لو داخلياً لو خارجياً .. حاجة بتهدّ العوالم كلّها في ثانية واحدة ..

(يارا) إنْفَوْعَتْ في السرير وبَقَتْ بس بتعاين بعبيبيد كدا ..

الأم لبست طلعت مشت فتحت بلاغ في الأستاذ .. وجات راجعة ساقّت بنتّها ..

طبعاً كشف طبي والهدوم الداخلية ديك وقصة طويلة جد ح يبقى أذى نفسي

لأسرة كاملة ..

جايين راجعين من القسم لاقاهم الأب جنب باب البيت.. مسكتو الأم أحكيك
أحكيك أحكيك.. و أستاذ (إبراهيم) و البت والحصل وعرفت وماعرفت
وعملت وسويت..مشي جاب ليهو حبل ربط (يارا) في كراع السرير..ووقع
فيها خبت بخرطوش الموية..

ويكورك.. "أنا تنزلي عمّتي آآآ..؟؟" .. خبتك خبتك.. "أنا عملي فيني كدا
ياالطرشا" .. شحطك شحطك ..

بعد شوية خلااص غلبو الدقّ مع تيكّمّتها وخُعتو جدع الخرطوش وقعد
جنبها يبكي .. يبكي ويضرب في رוחو .. الأب ده حسّ إتو إندمر في ثانية
ووصمة العار ح تلاحقو عمرو كلو بدل تلاحق العمل كدة.. سبّ المجتمع
وسبّ الدنيا وسبّ البت وأمها وروحو وخرطوش الموية زاتو ..

غابتو الأم زالااتها أدوها شحطات .. وقام من قعدتو دي وطلع مشى على
الجامعة بي خرطوش مويّتو زاتو .. مشي فاير عيونو مَحْمَرّة .. الليلة جاك
الموت يا تارك الصلاة بس ..

وصل الجامعة لقي برة طلاب متكّلين ليهم تحت شجرة قام سألم: "أستاذ
(إبراهيم) مكتبو وين؟" ..

وصفّك وصفّك لامن وِصلو .. لقا ليك المكتب مققول .. بزعلتو دي ما فكر
إنو الراجل ده يمكن يكون مافي .. كسرك كسرك ودخل والغريبة إتو لقي ليك

الأستاذ موجود!! لا وكمان منداح مع واحدة .. نص عرايا .. ما ح نقول
أكثر من كدة لأتو ما بهمنا هنا؛ وللا شنو!!..

شَحَطْكَ شَحَطْكَ فيهم الإتنين والجامعة إنلّمت تتفرج .. وجرى زول نادى ناس
السيكيورتي ..

اها ناس السيكيورتي جو من هناك مسكو ليك عمك من الشحيط والأستاذ
والبت من إنهم يثشخطو؛ وودّوهم مكتبهم: "ياأخوانا في شنو"..
غايتو البت الكويس لمن جو خمت قميص الراجل وللا بلوزتها هي زاتها
ماعارفة؛ المهم إنها شالثم وإنثغطعت سريع سريع وجرّت طرحتها في وشها
نظام غطّو ..

المهم لحد هنا والموضوع بقى شرطة وبوليس وسين جيم ومابهمنا هنا في
قصتنا دي إن شاء الله يودوهو التونج (إبراهيم) والبت ديل ..
البهمنا إنو الأب زاتو دخلوهو الحراسة .. بعد أحكيك أحكيك قال ليهم:
"مابعرف!! بس يعرّسها .. الزول ده دمر حياتنا كلنا والبت دي بطرشا ده
أمشي بيها وين؟" ..

المهم أستاذ (إبراهيم) وقفوهو من الجامعة لسوء السلوك بعد الجوطة دي
ماتمت وبقى لجنة تحقيق في الجامعة ذاتها وأقوالي أقوالك .. وقال تُرُترُ

مابعرّس واحدة ((إغتصبها)) -زي ماقالو ليهو - ولّلا ((جاتو براها)) - زي ماهو قال - !! ..

الموضوع ده عدّا شهر .. (يارا) مريوطة يفكّوها للحمام بس ويريطوها تاني..
طيّب خلال الشهر ده بطن (سعاد) بدت تكبر وهمّها بدأ يكبر ..
و(هيثم) إتكلّم مع (هيام) تاني ووافقت..

و(فوزية) وافقت إنها تعرّس (هشام).. (هشام) إتقدّم رسمي وعقد علي
(سعاد).. و(سعاد) قالت ماعايزة عرس وحفلة .. ساقا ومشى بيها.. (سعاد)
بقت بايئة مع (فوزية) أكثر من بيتها.. و(سعاد) كلّمت أمها بعد العقد..
أمها قالت ليها: "ولا بنّي ولا بعرفك" ..

يعني شهر مأساوي بصورة غريبة إلاّ كان لـ(هيثم) و(هيام)..

أها يوم كدة (سعاد) جات بيتها تشيل غيارات و هي طالعة (هشام) كان
داخل لقي فرصة غايتو لأنو ممّا عرّسو هي زايغة منو عند صاحببتها ..
"إنتي طالعه وين؟ ماشة تلاقى منو؟ إنتي قليلة أدب" ومسكها دقاها دقّ
الترمس ..

طلعت منو جري ع (فوزية) لمن وصلّتا دمها سايل ..

(فوزية) سريع وقّفت ليها أمجاد وإتكرّكرو ناس بيتهم معاهم مشو المستشفى..
(سعاد) أجهضت..

"٦"

أها الأستاذ (إبراهيم) ده ماكلمتكم إئو معرّس وعندو ثلاثة شُفّع.. (إبراهيم)
 قعد شهر في السجن خلالو مرتو طلبت الطلاق بالمحكمة.. ونبّرتو ماخّلت
 ليهو شي ولقّطتُ عيالها مشت أهلها..

و كَلّمت أهلو إئو عمل شنو في بتّ الناس.. غايئو أمّو دخلت في صدمة
 سكرّي وأبوهو قال ليهو: "ماعافي منك".. و زي ماقلنا فصلوهو من الجامعة
 ..

المهم الشهر إنتهي قلنا..

(سعاد) بعد الاجهاض مشت بيت أهلها أمها تحضن فيها وتقول ليها: "رَبّنا
 يغفر ليك يابنّي عافية منك ورضيانه عليك بس حق الله إستغفري"..

(هشام) ما جا شاف مرتو نهاااااا.. وبعد شهرين رسل ليها ورقة الطلاق..
 أهل (سعاد) - عدا أمها - مافهمو أي شي.. أبوها مشي لـ(هشام): "ياود
 الناس إنت لمنّ سايقًا ماقلنا ليك جيب وجيب قلنا والله بنشتري راجل.. وكت
 دقّيت صدرك وجيتني وطلبتها مني.. كان تدق صدرك وتجيني وتقول عايز
 تطلقها.. مالقيتها في الشارع إنت.."

(هشام) قعد يضحك قال ليهو: "وحياتك ياعم لقيتها في الشارع والرخيص بمشي برخصتو" .. الرجل قال ليهو: "ده كلام شنو ياولد البتقول فيهو ده؟ شارع شنو اللقيتها فيهو؟" ..

قال ليهو: "بتك حامل من قبل العقد ياالجاي تقول لي بتي وبتّي ورجال وراها .. أها وريني قولك" ..

الرجل قَبْلَ مَنُو إتحرك خطوتين .. و رَبِّ وَقَع .. (هشام) جَلَّاهو ليك ومشي .. ناس الشارع جو خمّوهو .. ودّوهو المستشفى .. الرجل طلع عندو ضغط .. وإثّشَلَّ ..

طبعا عمك ماشايل معاهو غير بطاقتو كان .. راقد إسبوع ماف زول جايب خبرو .. وناس الحوادث طلّعهو من العناية بعد الأسبوع عشان ماف زول دفع .. غايّتو الرجل الله يشوفو ..

(هشام) اسبوع كدة ماسمع حاجة عنهم .. يوم لقا ليك أخو (سعاد) في وشو .. قال ليهو: "أبوي طلع من البيت قال جايبك وتاني مارجع .. ماعارفو يكون مشي وين؟" ..

(هشام) قال ليهو: "لالا طلع مني كويس وقال راجع ليكم" ..

غايّتو أخو (سعاد) حام المستشفيات مستشفى والأقسام قسم قسم .. زول سمع بالرجال ماف .. حتّن جا لـ (هشام) .. الناس دي قَلّقت تَبَّ ..

قام نزل إعلان في الجرايد معاهو صورة الراجل ورقم تلفونو.. وفتح بلاغ إئو أبوهو ده مفقود ..

بعد إسبوع متواصل من تنزيل الصورة.. ضرب ليهو واحد.. "حقّ الله بقّ الله.. ياخ الراجل المنزلين صورتو في الجريدة ده ودّينا هو الحوادث قبل إسبوع كدة كان لقينا هو مرمي في الشارع .. ولحد أول أمبارح كنا معاهو بس والله العين بصيرة والإيد قصيرة .. ماعدنا حق أكل اليوم عشان كان ندفع ليهو حق العناية .. المهم الزول ده في الحوادث لكن للأسف إئشّل" ..

المهم الأخو إئشكر الضرب ليهو وبقى مارق على المستشفى.. أها وصل ناس العناية قالو تَزُرُّ زول ما جانا .. كمان يبقو في إئو عالجو زول مابعرفوهو ومرمي في شارع وبدون أورنيك ٨!! وبيقو في سين جيم؟؟ بري!! نكروهو حطب ..

الولد ده لاقى من حطة لحتة.. ومن عنبر لي عنبر .. لحد ما وصل المشرحة.. عاين كداا تاني قال النتوكل.. دخل المهم حقّ الله بقّ الله.. البركة في بطاقة الراجل الكان شايلها بس.. لأتو إئوفى في نفس اليوم وودوهو المشرحة وقيدهو ببطاقتو قالو لامين يشوفو أهلو والاجراءات بتاخذ وكنت...

الأخو غايتو ما قدر .. قاعد متقن بيكي لحدّ المغرب بعد شاف أبوهو
 واستدلّ عليهو زي مابقولو .. حتنّ قام إنتفضّ وبدأ إجراءات يشيلو الجنمان
 ويطلّعوهو ..

"٧"

غايتو (سعاد) وأمها والباقيين مافهمو أي شي لمنّ جاهم أخوها داخل بأبوهو
 في عنقريب .. شالو من المستشفى وبتاع البوكس حلف مايشيل منوّ قرش ..
 الحلة إنتمتّ كلها .. إلّا (يارا) المربوطة ..
 أمها حنّست أبوها تحنيس يفكها عشان ناس الحلة مايفقدوها ومايأكلو وشها ..
 صاحبات الأربعة بكو الأبو بكا لمنّ بهناك .. باقي هم قامو سوا والأبّهات
 البلقي فيهم واحدة منهم غلطانة حتي لو مابتو بدّقها ما بزجا أبوها ولا بكّم
 أمّها .. يعني الأبّهات زالااتهم فرّد كدة وأصحاب ..
 غايتو الحمد لله ..

أها تالت يوم في العزا (هشام) جايي كان .. ماعارف في عزا ..
 جايي يشوف (فوزية) وين ويحاول يحنّكها أو يهدّها أو يذكرها إنهم إتفقو؛
 مافارقة ..

البت دي بسبب إنها صعبة ومأمدياهو وش دخلت ليهو راسو تَب .. ياكاتل
يامكتول ..

أها لقا الصيوان .. عمل فيها إنو جا هسه وسمع هسه و"الحاصل شنو ومتين
الكلام ده .. وطلع مني كويس الزول ده.. وحتى اتفقنا إني غلطان وندمان
والصراحة أنا إتصدمت لمن (سعاد) وقعت والبيبي مات وقمت إنفعلت
وطأقتها.. ياسلاالم !!! رينا يرحمو.. ومرتي وينها؟؟.. وكدي النعزيها ونقيف
جنبها" ..

ده طبعا كلام (هشام) ..

أحييي أنا ناؤلوني مفراكة زعلني والله بتمثيلو ده ..
قامو نادو ليهو (سعاد) .. ناس الحلة فاهمين إنها في بيت أهلها عشان تتعافي
وتشدّ حيلها حبة ..

المهم قالو ليها "زول عايز يشيل الفاتحة معاك" ..

طلعت لفتو ليك (هشام) .. طوالي وقعت فيهو خنق وتكورك: "إنت الكتلت
أبوي.. شكيتك على الله.. محل ماتقّبَل تَنَقَّل عليك .. تتشلّ وتموت قبل
يومك .. ياالرب يارب أشوف فيك يوم يارب " ووقعت بتبكي ..

قال (هشام) لأخوها: "عرفت طلققتها لشنو؟؟ الحالة دي كانت بتجيبها كتير" ..
الأخو طلع ليك شبشبو ومسكو دقاهو بلا مَغسة ..

قال ليهو: "أمي كلمتني بعد جيت منك ياكلب ياواطي" .. وَتَفَّ ليهو في وشو .. قال ليهو: "كلامها صح .. والله مأخليك والله الليلة موتك ع يدي" .. يازوووول ناس الحلة إلاً وقفو ثبتوهو .. بس لكن ماثبئو لِسِنَانُكُمْ والخبر إنتشر ..

أها (هشام) أخذ دَقَّتو .. ووصل بيتهم مَكَّح يَبْرُطِمُ "أنا يدقني ود الكلب .. أخو ال ... تيببيت" ... المهم شال التلفون وضرب لـ(فوزية) .. رَدَّت أمها ..

قال ليها: "وين فوزية" ..

قالت ليهو: "إنت منو؟" ..

قال ليها: "أنا راجلها" ..

قالت ليهو: "سجمي!! راجلها كيف يعني؟؟" ..

قال ليها: "كدة عديبيل لو مامصدقة بكرة بجيب ليك القسيمة" ..

الأم في بيت البكا طَلَّعت بتها قدامها ..

ضرب ليك الرقم ده وقال قال قال .. (فوزية) لأنها زولة رسمية و دُغْرِيَّة زي

ماقلنا حك ليها القصة حاصل وحاصل وحاصل ..

غايته الحمد لله الأم دي لاضغط لاسكري اللهم لاحسد .. قعدت كدة في

طرف السرير .. وشالت لهم ..

قالت ليها: "أول شي البنات ديل تاني دخلة ومرقة لبيوتهم زي أول ماف" ..

(فوزية) قالت ليها: "لكن يأمي .. "

قالت ليها: "الجّما.. البقولو يتسمع ماباكر باكر أسمع بيك إنتي برضو ..
وكدي لامين ده يجي بكرة نشوفو.. وبعد داك أشوف ممكن نسوي شنو في
المصيبة دي" ..

"٨"

أها بكرة جا..

أم (فوزية) زولة دُغرية أكثر من بتها وأصلو ماعندها بسنديس من أبو
(فوزية)؛ من بالليل كلمت أبو (فوزية)؛ والأبو زول مدي بناتو مساحة حرية
ومقدّرئها ليهو ..

ناداها وقال ليها: "الزول الجايي بكرة ده عندك معاهو شي؟؟" ..

حككت ليهو عديبيل الحاصل ..

قال ليها: "كويس لامين يجي" ..

أها حبيبي جا يِكشّح في التراب و دق الباب ع أساس المرة براها ..
وممكن يحنكها ويقنعها إنو متزوج بتها وتخاف من الفضيحة تقوم تضغط
أبوها يعمل عرس زي حق (سعاد) ما يكلفو كتير وتبقى (فوزية) حقتو لأنو
فهم إنها غشّتو ومتهرّبة منو.. لكن فتح ليهو الأب..

"أهلا مرحب إفضل" ..

غايته بعد أخذ خُلتو ونزلها بكباية عصير كاالرية ..

قال ليهو: "خير؛ ماعرفتك ياولدي" ..

طبعاً قرر وكت أصلها بايظة بايظة يقوم يشوف عمك ده وشكلو زول مسكين

قام قال ليهو: "والله يا حاج ما عايز أصدملك؛ بس أنا متزوج بتك و دي

الورقة" ..

طلع ليهو ورقة قسيمة .. صورة مزورة من قسيمة (سعاد) ..

الأبُّ أول ماشافها قعد يضحالك ههاااه هاه ههاااه ..

قال ليهو: "إنت ماقرت القسيمة دي وللا شنو؟ أنا وكيل العروس ياخ .. أهو

ده اسمي" ..

وأشّر ليهو ع الاسم ..

وواصل: "خلاس وكت أنا الوافقت واسمي قاعد مامشكلة .. بس كدي نكّرني

متين كان هو الزواج ده؟!!!" ..

(هشام) صبت فيهو مطره وقام يتكبكب ..

الرجل قال ليهو: "طيب عايزك في مشوار .. قوم" ..

ومسكو ليك من يدو .. مشو القسم ..

وهم داخلين قال ليهو: "يا عم في شنو؟" ..

قال ليهو: "لالا ماف شي و ده مالمشوار العايزك ليهو .. دي شغلة عايز
أفضيها قبل مشوارنا" ..

أها لمن دخلو قال ليهم: "عايز أفتح بلاغ تهديد وتزوير" ..
وتعالو شوفو الجرسة .. عمك طلع لواء ..

كدة (هشام) حجرو غطس .. يازوووول في طولك في عرضك قال ليهم: "بس
كدة .. وأقول ليكم كلام جريمة زنا مع بت صاحبي بس ماعايز اسمها يجي" ..
ياسلاالم (هشام) ده شحطوهو بالسوط وأدوهو ليك ثلاثة سنين زي الورد ..

(سعاد) ممّا عرفت قعدت تزغرد .. غايتو بالغت مع موضوع البكاء بس نقول
شنو عاد .. وقالو لناس الحلة (هشام) مختلس عشان كدة إتطلقت منو ..

في نص الكلام الحاصل ده (هيثم) قال عايز يخطب (هيام) رسمي وكلم
أبوهو ..

أبوهو قال ليهو: "نحل مشكلة أختك أول" ..

أهاااااااااا اللواء أبو (فوزية) بجاي بجاي عمل قضية للأستاذ مع (هشام) إنهم
بجيبو بنات ويهدّوهم .. مش قلنا الأهات أصحاب؟ وزعلو ليك إنو بناتم ديل
وقعن كدة ما سمّن وفجأة كدة كلهن ليه ماتعرف!! ..

وماتسألوني عملو القضية دي كيف لأنني ماعارفة!! ..

ومشى لأبو (يارا) قال ليهو: "بتك عايزها لولدي (هاشم) .. مابلقى أحسن منها لولدي" ..

(هاشم) ده زول طيبان كدة ودخل الكليه الحربية فضل ليهو سنة واحدة ويتخرج و بريد (يارا) من زمان ..
ياسلاام ده كلام جميل مش كدة؟ ..

بس المشكلة (يارا) المربوطة دي القالت ليهم: لا .. وماوافقت ..

(يارا) ياحليلها منكوشة زي المجنونة..

المهم أمها قالت يمكن الربطة والحبسة نفسنو بيها أخير نفكها بعد ده حبة حتن نسألها تاني وأهو ربنا حلأها من عندو وجاب ليها السُترة لحد حنتها ..
أها يومهم الفكوها شالت السكين وقطعت يديها..

(يارا) ودّوها المستشفي الناس مافهمت ليها حاجه.. مالها وليه ومتين و في شنو؟؟؟؟ أسئلة كتبييرة ما اتسألت والجزء الإِتسأل ما ليهو إجابة وماممكن يتجاوب ..

خَيْطَك خَيْطَك خَيْطَك خَيْطَو يديها..

(يارا) لِحقوها بس دخلت في حالة سكات وعدم تعبير علي طرشها عليها ..
أدّوها منوم ونامت.. صحت بعد أربعة ساعات فتحت عاينت كداللا وغمضت .. نامت وماصحت تاني..

الحكاية الخامسة

توحد

"١"

(سيلين) صحت الصباح بتفكر جادة..

ليه إتطلقت من (كريم)..

حاولت تتذكر..

طيب أسبابها القالتها إنو زول بخيل ماشغال بيها بتاع ونسات وشات وهظار

مع أي زولة إلا هي.. حسّت إنها ولا شي في حياتو.. وما حيفرق كثير

معاهو كونها مشت وللا قعدت مادام هو عايش حياتو عادي مع غيرها..

(سيلين) ما إتطلقت طوالي حنّسها (كريم) وحاول إتو يضغط بعد التحانيس

عليها ببتها (خمائل).. وهي ركبت راسها إتو ياخ سبعة سنين كفاية.. لو

بتتغير كان إتغيرت..

قامت رسّلت من الصباح رسالة لروحها .. في آخر لحظة رسّلتها لروحها بدل

ترسلها ليهو..

قالت ليهو/ليها: "حبك قبل ما أتولد.. بحبك وإنّت فكرة بس كنت جواي"..
 موبيلها صقر؛ الرسالة وصلت.. أخذت سرحة هي بين الإرسال والإستقبال
 وفكرت في القلناهو فوق.. لمن صفر بدون تركيز فتحت الرسالة.. وقعدت
 تبكي..

إتمنت لو كان قال ليها كدة في يوم من الأيام العاشوها سوا دي..

الأسباب الما قالتها هي مع نفسها مابتحاول تتذكرها.. وإحنا ما ح نقولها هسه
 .. خلونا مع الأسباب القالتها..

إستغفرت وعابنت ل(خمائل) الجات بعد إنتظار سنتين..

أي زول في العيلة كان بقول ل(كريم): "إتأخرتو مالكم ياخ .. ولسة مابقيتو
 ثلاثة؟"..

و أي زول بعرفم يرمي في الكلام إئو البت دي شكلها ما بتولد وأكسب زمك
 وعرس ثاني.. سنتين مدورات بنفس الفهم ده ..

(خمائل) جات..

بس عندها عيب خلقي..

(خمائل) بت ايوة.. بس إتشخصت إئها عندها توحده..

(خمائل) ما بتمشي لزول .. اللعب البنلعبو مع روحها .. ما بنتكلم كلمتين
 على بعض وما مع أي زول.. كلمات جديدة ماعندها.. واقفة في كلمات
 بسيطة منهم ماما وبابا .. ومرة مرة بتأخذ ليها جنبنة كدة بعيبيد لو في ناس
 كتار وبتقعد تنوني وهي بتتهوزز قدام وورا ..

الموضوع لمن كثير وبقي شكلو غريب و(كريم) كورك لمن فتر في البت و "تعالى سلمى على عمو" و "يابت مالك" والبت ما عندها شي لزول في رايو ؛ قامت (سيلين) ودتها الدكتور واتأكدو انو التشخيص القالوهو قبل سنة ك شك ساكت حقيقي وواقعي.. وبتهم دي عندها توحد..

من هنا بدأ (كريم) النقة والإهانات و "هسه الناس تقول شنو؟ جايب لي بت مخأفنة؟ أمشي بيها وين؟ يقولو متخلفة؟" ..

(كريم) زول حبوب ما عندهو عوجة غير إتو ما يحب النكد ولا يستحملو زي مايقول.. زول هو الكبير في بيتهم.. بس مامسؤول من شى.. أبوهو تاجر كبير عنده مصانع غلال.. وهو من بدري مشى إستقر في هولندا..

زمن هولندا لجوء وقصص زي دي.. مشى إشتغل شهرين في دبي وصاحبو ركّب ليهو فكرة لجوء هولندا.. طبعاً ما ح نقول الطبخة الطبخها وقالها عشان يقدم لجوء.. ما ح نقول غير إتو إشتغلّ حتة مناطق النزاع والصراعات الحاصلة وقال أمه جنوبية ومضطهد والقصص دي..

المهم سافر من دبي على هولندا وأهلوه عاد عزمو الحلة كلها انو ولدنا سافر هناك عشان إشتغل وكدة.. عاد مغترب أوروبي..

تمّ عشرة سنين حتّى نزل السودان لأول مرة..

ما ح نقول برضو نزل بوثيقة متحرك على أساس ماشي مصر وجاء راكب بالبر ورشى ناس الحدود .. طبعاً لأنهم ما برتثو مش كدة؟..

المهم يوم رجع ونزل عند أهلوه وحقّ الله بقّ الله جات داخلة واحدة من هناك؛ تبارك رجعة ود جيرائهم؛ عبارة عن حاجة كدة خطفت النفس من جنبو.. الواحدة دي ياها (سيلين)..

بعد ساعة وهي في نفس ذات القعدة .. التلفون دبّت فيهو حياة وجات طالعة
 منو رنة واهتز برسالة..
 فتحتها بلهفة و بجوع قلبها لقت إئو عيونًا أكلتها..
 "ياهبله موبايلك مالو مقفول؟"
 الرسالة من صاحبنتها طلعت ..
 رمت التلفون تاني وقعدت تبكي بهيستيريا..

 ده علاقتو شنو بقصنتنا؟

"٢"

(سيلين) بتعاين ل(خمائل) النائمة وبيتذكر يوم (كريم) لاقاها تاني يوم من
 جيتو في راس الشارع منتظرة المواصلات.. وسلّم عليها..
 كان بعين ليها في عيونها أصلو ماإتخطّى معاينتو لحتة تانية زي ماإتعودت
 من الناس وكانت بتهيج وتكورك وتزعل وتقول للزول القدامها "عاين لي في
 وشي" .. أداها إحساس إئو زول محترم وكمان واقفين ساعة بيتكلمو عن شنو
 ما بتتذكر ..
 اليوم البعدو طلعت أبدر.. متوقعة تلاقيهو.. فعلاً لقتو واقف زي كأنو
 منتظرها.. وركب معاها المواصلات لحد حتة شغلها.. يادوب شغالة ليها كم
 شهر كانت.. ونزل معاها ودخل قعد.. وجو راجعين سوا.. الوقت ده كلو

إتكلمو في أي شي.. دهشتو من السودان إئو إتغير التعامل والناس وإئو بقي
أوسخ..

إئو البلد ماشة لأكعب مما خلاها..

الغلا الحاصل وكيلو الطماطم الزاد..

مع إئو أهلو مرتاحين بس ما أداها إحساس إئو مازول كادح عادي وحرزان
وشايل همّ البلد..

حكى ليها عن سفرتو هولندا وإئو ندمان إئو قدّم لجوء كان.. وإئو هسه بحمد
رنا إئو قدم لجوء لأنو بالوضع الحالي ده ماكان إطلاقا قدر يستحمل يقعد
وكان نقف لَمّ الله غفر ليهو وغالباً كان طلع معارضة زاتو..

حكى ليها إئو لمن سافر ما إحتاج يشتغل يغسل حمامات ولا صحون لأنو
أهلو كانوا برسلو ليهو.. بس إشتغل في النهاية في فُرن عشان ورقو يمشي..
لأنو مفروض يكون لاجئ مقطّع ما عندو التكتح..

حكى ليها عن نومو في أوضة واحدة مع إثنين تانيين وإئو الكويس ماكان
بلاقيهم زاتو لأنو كل زول شغّال في وقت مختلف.. وإئو بعد خمسة سنين
قرر يقرأ ودخل كم كورس حتّن يادوب السنة الفانت قدر يقدم لجامعة عديل..
بالعربي حكى ليها تفاصيل حياتو الأهلو زاتمّ ما عارفنّها..

وهي كانت بتسمع أكثر من تحكي..

بعد شهر ركوب مواصلات وتوصيل من وإلى شغلها.. قرر يقول ليها "عايزك
في حياتي"..

هي زاتها مامتذكرة حسّت بشنو غير فرحة.. شغلها زاتو مرقت منو اليوم داك
وخلّتو قاعد.. مشت مشوااااا بكرعينها لحد سوق الجنوبيين واشترت ليها
اسكيرت جينز.. ومشت شربت ليها عرديب من السوق العربي الإتكسر ده..

وقالت تخش مول الواحة تاني قالت لشنو زاتو..ورجعت بيئُم لقتو واقف في المحطة..

مرّت جنبو قالت ليهو: "موافقة"..

وعرّسو..

أبوة بالبساطة دي..

العيلتين بعرفو بعض والأمور ممتازة والدنيا وردية والعرس تمّ في أقل من شهر..

ماكان محتاجة تتحبس ولا شئ لأنها أصلا نجفة الله يحفظها ولأنهم قررو ماقادرين يصبرو وهو زاتو راجع هولندتو دي عشان يرسل ليها..

أهاااا المرسال زاتو قصة كان.. إنها تدخل هولندا وهو لسة جوازو ما استلمو.. دخلوها تهريب.. ما ح ندخل في التفاصيل.. بس وقتها ماقال ليها ح أدخلك تهريب.. قال ليها ح نمرّ ب إيطاليا وفرنسا رحلة شهر غسل متأخرة.. الخلاصة بقي إتو وصلتو..

مع إتو القصة ماكانت محتاجة لأنها طلّعت ليها فيزا في أمانة الله .. فيزا طالبة بس تقولو شنو.. ولو ما فيزتها دي ماكانت قدرت تطلع ببتها بعد داك..

في هولندا إتشخصت بتها إتو عندها توحد..

هولندا بتحمل ليها ذكريات كل الألم العاشتو في حياتها ومأظن تعيش زيو تاني..

برضو ما ح نقيف في إنها مرقت كيف ولشنو..

مرقت ببتها عمر سنة..

ورجعت ثاني بصورة رسمية بعد إستلم ورقو ورسل ليهم زيارة.. بعد سنة تانية..

السنة القعدتها في السودان كانت حاسّة إنها بتتقطع وهي بعيدة من (كريم) بتقعد كل يوم بتتوم على صوتو في الاسكايب.. اليوم كلو عيونها مابين بتها ومابين موبايلها وانها ترسل واتسبياً وفيسبوكياً ليهو.. عيشها حلم جميل..

إنكلمو في أي شي .. سياسة إجتماع إقتصاد .. أي شي.. كانوا بقرو الكتاب سوا قبلهم وهم في الخط سوا..

وبعد يخلصو يحضنها في التلفون ويأشر على صدورو يقول ليها: "نومي هنا ده مكانك"..

رجعو السودان سوا قبل ماتتطلق بشهرين..

حلوين كدة وطائري حب كدة لمن الناس بتعلق عليهم..

يوم الساعة ٣ ص تلفونو ضرب وهي كانت بتصلي قيام ليل لبتها.. اها رفعتو..

لقتها ليك واحدة..

الصرحة ليك ياالله البت عينها قوية قالت ليها: "وين (كريم)".. قالت ليها: "إتي منو؟"..

قالت ليها: "أنا (درة)؛ إنتي (سيلين)".. اهاا كلمة من هنا كلمة من هناك..

عرفت إنو (كريم) من قبل ما تمشي مشيتها الأخيرة دي إتعرف على الزولة دي في الفيسبوك والحب والشوق والريد والهيام.. وإنو كان بقلل منها عشان يرسل لـ(درة) لأثا مابتساهر زيها.. يعني وازن وقتو كويس وموزعو..

هااااا قام العفارىت إنتططت في وشها.. وفنّشت موبايلو.. مع إنو ماعندها الحركة دي.. لقت زي (درة) دي في أربعة تانيات..
صحتو ليك طوالي " (درة) دي منو؟" ..

لأنها الوحيدة الفى الخمسة ديل الإتفق معاها نزلتو السودان يعرسها..
أذ حاجة بقى إنو مانكر ولا زاغ ولا إتردق ولا إتككب؛ طوالي قال ليها:
"خطيبتى" ..

الصراحة أنا أحبيهو على الوضوح ده..

كلمة من هنا كلمة من هناك وقالت ليهو: "طلقني" ..

وقد كان..

طلقها وهو بضحك قال ليها: "كدة إرتحت من بتك المخلقنة دي" ..

هنا (سيلين) دمعتها جرت كرررر كدا لمن إتذكرت بتها دي..

عاينت لبتها الممكن يوم تحضنها وتتحضن ليها ويوم تحضنها وتكورك
ماعايزة تتحضن ليها..

أمها جات داخلة "صباح الخير؛ مالك صاحية بدري كدة ياماما؟" ..

قالت ليها: "ولاحاجة ماما كنت عايزة أصلي وبعد داك ماقدرت أنوم" ..

أمها قلبها زي العصرتو يد باردة كدة.. قالت ليها: "الليلة ماشة مركز أنيس؛
مش؟" ..

قالت ليها: "أبوة قالو عندهم برنامج كويس ل(خمائل)".

"٣"

لأنها لمحة حِكْوَتنا دي من حياة (سيلين) و (خمائل) ح نقفز بالزمن ونقول:
بعد ثلاثة سنين مما بدينا الحِكْوَة دي:

(خمائل) قيموها قبل ثلاثة سنين فَنَشُو خلفيتها وخلفية عيلتها ومستوى والديها
التعليمي في أول مقابلة ديك والبعدها..

كانت مرحلة طويلة كدة وخطوات كثيرة عشان بعد داك يقيسو ليها مقدرتها
على الكلام ويقدرو يقيمو طيف التوحد اللي هي فيهو ويختو ليها أهداف..
كل ماتخلص هدف منهم يقررو يرفعوها للبعدهو.. وإذا مااستجابت لحاجة منهم
يبقى الخطة الموضوعه كلها حسب الفات بتتغير ويبدو واحدة جديدة بأهداف
جديدة..

الحلو إنها كانت بتقدر تقرأ لكن كلام ده مافي زي ماقلنا.. فبقت واحدة من
التحديات الإِتختت ليها إتو تقرأ وكل مرة يزيدو حبة صعوبة الحاجة البتقراها
.. البنية بالنسبة لعمرها ده ذكية.. بس زي ماإنتو عارفين أطفال التوحد أكبر
مشكلة بتلاقيهم هي مهاراتهم الإجتماعية أول شي.. عشان بس تثق في زول
من المعلمات أو أي زول يدخل دائرتها جديد كان براهو قصة..

تعليم أطفال التوحد ما زي تعليم الأطفال العاديين..

(سيلين) صاحبت المدرّسات وقرت لمن فترت عن التوحّد وعملت ماجستير فيهو .. ولمن لقت الموضوع ده كبير ومنتشر و في أهل ما عارفين يمشو بأطفالهم وين فتحت مركز لمساعدة الأهل..

بتوريهم التوحّد هو زاتو شنو ..

إنو طفل بس مختلف وطريقة إختلافو دي هي البتميزو من غيره من الأطفال.. إنو مامفروض يخجلو متو أو يدسّوهو ويتوارو عن المجتمع.. ع العكس مفروض الحولهم يتقبّلو طفلهم ده بمنظرو ده وبدون ما يحاكموهو أو يشفقو عليهم أو حتى يلتفتو هم كأهل لنظرات التشقي وللا الشفقة وللا السخرية حتى..

أكثر حاجة محتاجنها كأهل طفل توحّد إنو تكون حالتهم النفسية هم زاتهم كويسة وإنو يمدّو حبال الصبر لأنّو مابتعالج بين يوم وليلة.. أي تحسن مهما كان بسيط هو خطوة كبيرة بتستاهل الزول يقيف فيها وينبسط..

إذا إتعلم كلمة جديدة.. مرحلة الحمام إذا قدر يدخل براهو .. إذا قدر يربط كلمات مع بعض .. إذا قدر يتأقلم مع برامج الرسم او الموسيقى أو الرياضة حتى .. ده كلو عبارة عن إحتفال بإنجاز ..

الحاجات البسيطة المتوقّعة من الأطفال العاديين والناس مابتقيف فيها كثير؛ عند أطفال التوحّد بتعتبر إنجاز..

(سيلين) هي زاتها عاشت أيام كانت حاسّة بضغط عجيب على أعصابها.. ما بتتحمل كلمة كانت بتنتقال في حق بنتها أو حقها.. ومن زولة هادئة بقت زولة فتيلها قصير.. أقل شي بتزّد بصورة ماحلوة "بتي ومبسوطة بيها

والماعاجبو يقع البحر" بقت بتغلّف تعاملها مع الناس أكثر شي.. بطّلت تنوم كثير.. تصحى نص الليل لو نامت بدري مخلوعة وبنفتش في إئو بئها وين.. إنعزلت من الناس فترة شهرين كدة وتاني قررت تكون قوية عشان بتها.. الكلام البتقولو للأهل ده عبارة عن خلاصة تجربتها الشخصية المابتخل تعرضها ليهم.. وما بتخل لو سألوها من وضعها الإجتماعي إنها تقول إنها مطلقة ..

الكلام البتقولو عبارة عن خلاصة برامج صن رايز والخطط الدراسية السلوكية وشغل الجمعية البريطانية للتوحد¹ وجمعية التوحد يتحدث الأمريكية² وخلاصة أي شي لقتو قدامها وقرتو وخلاصة دراستها بتاعة الماجستير..

في التلاتة سنين دي ناس الحلة أكلو وش ناس بيت (سيلين) داخلين طالعين يالما شمات "مالها بتكم دي ما بيتكلم؟ ماتكون متخلفة بس" .. "ياحليلها والله مع إئو حالاتها عدل" .. "بري لو عندي بت زي دي بدسّها ولا بورّيها الناس خليك من إئي كمان أفتح نفسي أطلع بيها" ... كمية الشفقة والتحسر والتشقي الشافئ (سيلين) من الناس خلّ دنيته ملخبطة زي الجملة فوق دي.. أهل (كريم) الصراحة ليك ياالله وقفو معاها وأبوهو قال إلا يسوقا الامارات قالو فيها مراكز كويسة.. وولدهم ماسألوهو كثير لأنّو "دي حياتو وهو حر فيها" وما إتدّخلو .. وهو زاتو لا عرس لا شي.. رجع هولندتو دي وقعد فيها .. حتى (درة) ما رسل ليها..

¹ The National Autistic Society. <http://www.autism.org.uk>.

² Autism Speaks. <http://www.autismspeaks.org>.

أبوة المراسيل فوق القبيل ديك مارّد عليها ولا هبّو ليها ثاني.. وما حاسّي
 إنّو غلطان ولاشي .. وفي رايو أصلاً مفروض تكون عارفة إنّو ما ح يعرسها
 وإنو كان ضياع زمن منهم الاتنين وونسة ساكت زي ماقال ليها ..

في الثلاثة سنين دي (خماثل) إتحسنّت كثير .. بتحب الموسيقى وعندها بيانو
 بالجنبّة كدة قديم وهلكان لكن بتحبو وتعزف فيهو .. بتحب حبوبتها شدييد أم
 أبوها وبتجري عليها لمّا يجوهم . مع إنها مابتعاين ليها مباشرة في وشها بس
 بتحضنها .. لمّن تكون قاعدة في البيت بتمشي تقعد جنب حبوبتها أم (سيلين)
 .. الأكل زاتو إتحسن بعد ماكانت مابتاكل ..
 ممكن نقول إنها بقت أقرب لطفل طبيعي في عمرها ..

أطفال التوحد مظلومين دايمًا وين ماكانو .. أهلهم معانين دايمًا لو ماصبرو ..
 المجتمع قاسي وما بيرحمهم إطلاقًا حتى لو حاول يتّفهم ..
 ده آخر حاجة كانت بتفكر فيها (سيلين) وهي ماشة الصباح سايفة بتها على
 المركز بتاعها ..

فهرس الحكايات

الصفحة	الحكاية
6	الحكاية الأولى: داون وأشياء أخرى
101	الحكاية الثانية: دنيا
164	الحكاية الثالثة: قصة عادية
186	الحكاية الرابعة: لمحة من حياة أربع بنات
215	الحكاية الخامسة: توحد



- أطفال مرضى متلازمة داؤون (المنغولين) زي ما ينادوهم كتالار في المجتمع؛ هل قادرين يتعامل المجتمع معاهم بدون رفض؟ هم زاتهم هل قادرين يتعاملو مع الناس بدون ما يُعتوهم ينعوت ويقللو منهم؟ أحاسيسهم ومشاكلهم وأحلامهم شنو؟..

- الأخطاء الطبية البقت شماعة ممكن يتعلق عليها موت زول عديل وممكن فعلاً تكون أخطاء؛ هل ممكن نتكلم بدون ما الناس تنفعل؟ نعرض البحصل عشان نُحْتُو قدامنا ونشوفو؟..

- الإغتصاب ما بين إنو تَسْتِرو وينعَطِطو والبت غلطانة حتى لو كانت طرشاء أو من ذوي الاعاقات أياً كانت؛ وما بين إنو الأم والأب يقيفو فيهو وبطالبو بقصاص المرتكب لجريمة زي دي مهما كان وضو الإجتماعي..

- الزواج المتعدد وأسبابه وتقبل الطرف الثاني ليهو ولو في أولاد التقبل ح يكون كيف .. والزواج العرفي البقى في فترة موضة كدة وبقي يختفي وبجي راجع..
- المخدرات اليقُت ماشة جاية بين فئات كثيرة وإنتشرت..

- الحب والانتظار الممكن تكون نهايتو إتو الناس ماتعرس عشان الأسر مارضيانة .. عشان القبيلة وللا الحزب وللا الجهوية..

الجزء الثاني من حكاوي سودانية بيحاول يعرض مشاكل بقت ماشة ومُتَغَلِغلة ويمكن مسكوت عنها ويمكن لا..

كدي أقبو الغلاف بهناك وأفتحوهو وتعالو أحجّكم بوجع ناس كُتار..

لبنى عصام